

**Si₂ carta le₂'uig₅₄ a₂ca₂jmo₃ San
Pablo ne₄ dsa₂
CORINTIOS**

*Jmo₅ Pa₄ si₂ le₂'uig₅₄ a₂chein₂ ne₄ Guá'₅ i₂chan₂ juig₂
Corinto*

¹ Jniá₂ Pa₄, co₂në₅ ca₂rë₃'ñió₃ dsí₅ Diú₄, ca₂të₃
'éi₂ a₂lén₂g₂ dsa₂ i₂chen₄ quián₅ Te₁gui'₅₄ Jesucristo;
jnia'₅₄ co₂dsia₅ quian'₅₄ Sóstenes rin'₅₄ jniog₄, ² jmo₂₃
si₂ carta la₂ a₂dsian'₄ ja₁con₂ guá'₅ quián₅ Diú₄, dsa₂
chan₂ juig₂ Corinto, dsa₂ i₂ma₂të₅ Diú₄ a₂lén₂ dsa₂
i₂le₃chan₂ lë₅ 'í₁ le₃quíó'₅ Cristo Jesús; co₂dsia₅ bá₄
quian'₅₄ ca₂le₃jín₃ i₂jme₂juin'₂ Te₁gui'₅₄ Jesucristo
ca₂le₂con₂ mi₂güí₃, a₂lín₅ 'éi₂ Te₁gui'₅₄ quián₅,
juí₁lia'₂ quián₂ jniog₄ táng₃: ³ Juí₁chan'₂ bá₄ 'nia'₂
'ei₅ tei₄, juí₁jme₂gu'₅₄ bá₄ Diú₄ i₂lín₅ jmei₂ jniog₄,
juí₁jme₂gu'₅₄ Te₁gui'₅₄ Jesucristo ján₃.

Jme₂gu'₅₄ Diú₄ tē₂le₃ quian'₅₄ Cristo

⁴ Ca₂le₃o₃ jmí₄ bá₄ cué₅ jniá₂ ti₁'mag'₄ Diú₄
o₄quián'₂ 'nia'₂, ia₁ ca₂jme₃gu'₅₄ bá₄ Diú₄ tē₂le₃
quian'₅₄ Cristo Jesús. ⁵ Tē₂le₃ ia₁ a₂chan'₂ 'nia'₂
le₃quíó'₅ Cristo, Diú₄ bá₄ ma₂ca₂jme₃'o₅₄ 'nia'₂
ca₂le₃jě₃ ne₅₄ a₂dse₃ quió'₅, juí₁lia'₂ jág₁ a₂'ña'₂
'nia'₂, juí₁lia'₂ ca₂le₃jě₃ a₂tin'₂ 'nia'₂ nē₃. ⁶ Le₂në₅ bá₄
ca₂le₃jě₃ 'e₂ niog₅ ca₂jme₁tag₅ jnia'₅₄ tē₂le₃ quió'₅
Cristo, ma₂ca₂rë₃ti₃ bá₄ tē₂le₃ quian'₅₄ 'nia'₂. ⁷ Jaun₂
lë₃, tsá₃ ma₃'e₂ 'nió'₅ quián'₂ 'nia'₂ jua'₅₄ a₂cué₃ Diú₄
caun₂ bí₂ a₂gu₂dsí₂, tē₁lia'₂ jan'₅₄ 'nia'₂ a₂'ín₂ 'au'₂
a₂jme₃jnia₅ Te₁gui'₅₄ Jesucristo quián₂ jniog₄. ⁸ 'Éi₂

bá₄ jme₃'o₅₄ náu'₁ 'nia'₂ tiá₂ ca₂të₂ jmig₄ jë₁ca₂tó'₂,
ia₁jaun₂ tsá₃'e₂ dso₄ rin'₂ 'nia'₂ jë₁ma₂ca₂të₂ jmig₄
quió'₅ Te₁gui'₅₄ Jesucristo. ⁹ I₂jme₃ti₃ bá₄ Diú₄
ca₂le₃jě₃ jág₁ quió'₅; 'éi₂ bá₄ ma₂ca₂të₃ 'nia'₂ 'ag₃
caun₂ jág₁ quian'₅₄ Jesucristo ja₁ñi'₅₄, Te₁gui'₅₄
quián₂.

A₂tsi₂jñ₅ dsa₂ dsia₂₃ mi'₅₄ jmo₂₃ le₁dsain'₅₄

¹⁰ Rin'₅₄ jniog₄, mi₅ jniá₂ ja₁con'₂ 'nia'₂ quian'₅₄ 'éi'₃
quió'₅ Jesucristo Te₁gui'₅₄ quián₂, 'éi'₂ 'nia'₂ caun₂
jág₁, tsá₃ dsia₂ 'nia'₂ mi'₅₄ a₂jmó'₂ le₁dsong'₅₄. Të₂le₃
ca₂tín'₂ bá₄ 'nia'₂ tóng'₄ 'ei₅ caun₂ jág₁ jen'₂ 'nia'₂,
ju₁lia'₂ 'a₂lia'₂ ñí'₂ 'nia'₂, a₂dsi₂jio₅'au'₂ ně₃. ¹¹ Juí₂
jniá₂ 'nia'₂ le₂ně₅, rin'₅₄ jniog₄, ia₁ ca₂rë₃chá₃ jág₁
juá'₂ dsa₂ familia quián₅ Cloé, 'a₂lia'₂ lě₅ tion'₅₄
'nia'₂, a₂niog₅ mi'₅₄ jin'₄ 'nia'₂. ¹² Co₂'nió'₄ le₃jua'₅₄
jág₁, jma₃quén₅ bá₄ ma₂lě₅ jag'₅₄ 'nia'₂ tiong'₅₄. I₂lin'₅₄
ma₂juá'₂: “I₂quián₅ Pa₄ bá₄ jniá₂”; i₂lin'₅₄ guë'₂
juá'₂ táng₃: “Jniá₂ guë'₂ líng₅ i₂quián₅ Pe₄”; sián'₂
guë'₂ juá'₂ táng₃: “Jniá₂ guë'₂ líng₅ dsa₂ i₂quián₅
Apolos”; i₂lin'₅₄ guë'₂ juá'₂ táng₃: “Jniá₂ guë'₂ líng₅
i₂quián₅ Cristo.” ¹³ ¿O₃ bá₄ le₁dso'₄ ma₂i₂lě₂ quió'₅
Cristo ně₁jua'₂ le₂jaun₂? ¿O₃ bá₄ Pa₄ i₂ca₂të₁ton'₅₄
cróg₄ o₄quián'₂ 'nia'₂? Le₂jaun₂ guë'₂ ján₃, ¿O₃ bá₄
lia'₂ con'₂ lě₅ 'éi'₃ quió'₅ Pa₄ ca₂jñó'₂ 'nia'₂ jmig₂?*
¹⁴ Ti₁'mag'₄ Diú₄ tsá₃ jniá₂ ca₂chóng₃ jmig₂† 'i₁jan'₂
'nia'₂, jñia'₅₄ lia'₂ Crispo quian'₅₄ Gayo, ¹⁵ con'₂ tsá₃
lě₅ jua'₅₄ a₂dsia₃ dsa₂ a₂ca₂chóin₃ jniá₂ jmig₂† lia'₂
con'₂ lě₅ 'éi'₃ quió₃. ¹⁶ (Jñia'₅₄ lia'₂ familia quián₅
Estéfanos bá₄ ján₃, dsá₂ dsí₃ ca₂chón₃ jniá₂ jmig₂.

* **1:13** lit. “ca₂i₃tian'₃ 'nia'₂ jmig₂.” † **1:14** lit. “ca₂tióg₃ jmig₂.”

† **1:15** lit. “a₂ca₂tiáin₃ jniá₂ jmig₂.”

Jaun₂ tsá₃ ma₃dsá₂ dsí₃ jua'₅₄ chan₂ guě₄ i₂sián'₂
 ca₂chón₃ jniá₂ jmig₂.)§ 17 Ia₁ tsá₃ ta₁ jaun₂ ca₂chei₃
 Cristo jniá₂ jua'₅₄ a₂tsón₄ jniá₂ jmig₂ dsa₂,* con'₂
 jnja'₅₄ lia'₂ a₂qui'_{ě4} jág₁ a₂tín'₄ dsa₂ bá₄, on₃jua'₅₄
 qui₁ton₁ jág₁ jua'₅₄ a₂jmo₅₄ a₂ŋí₄ tĩg₂, con'₂ tsá₃ lě₅
 jua'₅₄ a₂tsá₃ ta₁ tí₄ a₂ca₂guen₃ Cristo 'mú₃ ne₄ cróg₄.

Cristo i₂lĩn₅ bí₂ quió'₅ Diú₄

18 Jág₁ dse₃ la₂, 'a₂ lia'₂ ca₂jon₃ Cristo ne₄ cróg₄,
 lě₅ jág₁ co₄ tē₂le₃ ja₁con₂ dsa₂ i₂tion'₅₄ jui₅ dsí₃'én₂.
 La₁ tē₂le₃ quián₂ jniog₄ i₂tio'₅₄ jui₅ a₂tág'₄, lě₅ jui₅bí₂
 quió'₅ Diú₄. 19 Ia₁ jui₁lia'₂ juá'₂ ne₄ Si₂:
 Co₂dsia₅ 'én₄ jniá₂ jui₁lia'₂ a₂tĩn₂ dsa₂

i₂ŋí₄ lě₃ ŋi₅ jmo₅,

ján₃ guě'₂ jmo₅₄ cau₅ jág₁ a₂ŋí'₂ dsí₅
 dsa₂ i₂jmo₅ a₂ŋí₄ lě₃ 'ŋioi₅₄.†

20 ĸ'E₂ bá₄ ta₁ tén₄ jui₁lia'₂ dsa₂ i₂ŋí₄ tĩn₂ ně₃, jui₁lia'₂
 tē₅, o₃ jui₁lia'₂ dsa₂ i₂ŋí₄ ŋi₅ dsia₃ ca₂le₃jě₃ 'a₂ lia'₂
 niog₅ lě₅ mi₂güí₃ la₂? Ia₁ ca₂le₃jě₃ 'e₂ niog₅ ŋí'₂ dsa₂
 mi₂güí₃ la₂, 'ŋiog₅ bá₄ Diú₄ ma₂jmo₃ jág₁ jaun₂ a₂tsá₃
 ta₁ tí₄. 21 Ia₁ jui₁lia'₂ ca₂'náu'₃ dsí₅ Diú₄ jmo₃, tsá₃
 ca₂rě₃cuig₅ dsa₂ mi₂güí₃ tē₂le₃ quian'₅₄ jág₁ a₂ŋí'₂
 dsí₅ guioin₅₄, a₂jaun₂ bá₄ ca₂rě₃'ŋi₃ dsí₅ Diú₄ a₂lióin₂
 dsa₂ i₂'én₂ jág₁ quió'₅, tē₂le₃ quian'₅₄ jág₁ a₂ca₂'ě₂
 dsa₂, caun₂ jág₁ a₂jmo₅ dsa₂ mi₂güí₃ dsí₅ caun₂ jág₁
 co₄.

22 Jui₁lia'₂ dsa₂ judíos ně₃, 'nio₃ tē₃ ne₅₄ léi₄ juě'₂,
 dsa₂ griego ně₃ 'no'₂ jág₁ a₂le₃ŋí₂ dsí₅, 23 la₁ia₁

§ 1:16 lit. “ca₂tián₃ jniá₂ jmig₂.”
 † 1:19 Isaiás 29:14.

* 1:17 lit. “a₂tián₄ jniá₂ jmig₂ dsa₂.”

jnia'₅₄ ně₃, qui₂'ě₅ jág₁ 'ín₅ jnia'₅₄ Cristo i₂ca₂jón₃ tē₁ton₅₄ cróg₄. Jág₁ ně₅ ně₃, lě₅ caun₂ a₂jnág₅ jui₅ ja₁jme₁rě₂'én₂ dsa₂ judíos, ján₃ bá₄ lě₅ caun₂ jág₁ co₄ tē₂le₃ quió'₅ dsi₂nau₂. ²⁴ La₁ tē₂le₃ quió'₅ dsa₂ i₂ma₂tě₅ Diú₄, lia'₂ dsa₂ judíos lia'₂ dsa₂ griegos táng₃, 'ín₅ jnia'₅₄ Cristo i₂lín₅ jui₅bí₂ quió'₅ Diú₄, i₂lín₅ jág₁ a₂ŋí'₂ dsí₅ Diú₄ ně₃. ²⁵ Ia₁ co₂'nió'₄ jág₁ co₄ quió'₅ Diú₄, juá'₂ dsa₂ mi₂güí₃, jág₁ ně₅ bá₄ a₂lě₅ a₂dsen₅₄ quen₅ guě₄ lia'₂ con'₂ guě₄ jág₁ a₂ŋí'₂ dsí₅ dsa₂ mi₂güí₃. Já₃ bá₄ jui₁lia'₂ a₂jmo₅ dsa₂ dsí₅ a₂'uan₅₄ quió'₅ Diú₄, a₂jaun₂ guě₄ dsón'₂ a₂'io₅ guě₄ bí₂ lia'₂ con'₂ guě₄ bí₂ quió'₅ dsa₂ mi₂güí₃.

²⁶ Rin'₅₄ jniog₄, ca₂tín'₂ bá₄ 'nia'₂ 'nau'₅₄ 'au'₂ 'a₂ lia'₂ ca₂tě₃ Diú₄ 'nia'₂. Tsá₃ juin'₅ 'nia'₂ i₂tín₂ ŋi₅ lia'₂ con'₂ lě₅ ŋi₅ dsa₂ mi₂güí₃; já₃ guě₄ tsá₃ juin'₅ 'nia'₂ 'au'₂ bí₂; tsá₃ juin'₅ 'nia'₂ ca₂rě₃chán'₃ jui₁lia'₂ familia dsen₅₄ ně₃. ²⁷ La₁ia₁ ma₂quió'₂ Diú₄ jág₁ a₂jmo₅ dsa₂ mi₂güí₃ dsí₅ jág₁ co₄, a₂jmo₃ a₂tě₃tsin'₅₄ o₂guí'₃ dsa₂ i₂lín₂ ŋí'₂ guě₄ dsí₅. Já₃ bá₄ ma₂quió'₂ Diú₄ jág₁ a₂jmo₅ dsa₂ mi₂güí₃ dsí₅ jág₁ 'uan₅₄, a₂jmo₃ a₂tě₃tsin'₅₄ o₂guí'₃ jui₁lia'₂ dsa₂ i₂lín₂ a₂'uain'₂. ²⁸ Ma₂quión'₂ Diú₄ jui₁lia'₂ dsa₂ i₂jín₂ dsa₂ mi₂güí₃ i₂tsá₃ 'e₂ quen₅, i₂sion₅ guě₄, i₂tsá₃ 'e₂ lín₅, a₂tón₂ 'uě₃ jui₁lia'₂ i₂ŋí₄ lě₃ dsen₅₄ lín₂, ²⁹ ia₁jaun₂ tsá₃ 'ein₂ lé₂ dsia₃ jág₁ tá'₅ le₃ne₄ Diú₄. ³⁰ 'Njog₅ bá₄ Diú₄ ma₂jmo₃ a₂tion'₅₄ 'nia'₂ le₃quió'₅ Cristo Jesús, i₂ma₂lín₅ i₂ŋí'₂ dsí₅ quián₅ Diú₄ o₄quián₂ jniog₄. Co₂'nió'₄ le₃jua'₅₄, tē₂le₃ quian'₅₄ Cristo bá₄ ma₂guei₃ Diú₄ jniog₄ ně₂jag₄ bá₄ a₂tsá₃ 'e₂ dso₄ rag₂; tē₂le₃ quian'₅₄ Cristo bá₄ jág₂ Diú₄ jniog₄ dsa₂ le₁jín₃

i₂lě₅ 'í₁ quiáin₅; tē₂le₃ quian'₅₄ Cristo bá₄ ján₃, ca₂'ág₂ táng₃ caun₂ jág₁ quián₂ jniog₄ quian'₅₄ Diú₄. ³¹Jaun₂ lě₃, jui₁lia'₂ juá'₂ ne₄ Si₂, “Jui₁lia'₂ dsa₂ i₂dsia₅ jág₁ tá'₅, jui₁dsia₁₂ jág₁ tá'₅ le₃quió'₅ Te₁gui'₅₄.”†

2

Jág₁ quió'₅ Cristo, a₂ca₂ηó₃ ne₄ cróg₄

¹ Rin'₅₄ jniog₄, lia'₂ con'₂ ηeg₅₄ ja₁con'₂ 'nia'₂, i₁chei₁₂ 'nia'₂ jág₁ tí₅ la₂ quió'₅ Diú₄, tsá₃ jaun₂ ca₂jmo₃ jua'₅₄ ca₂juíg₂ 'nia'₂ jág₁ ca'₅₄ jui₁lia'₂ jmo₅ dsa₂ i₂ηí₄ tin₂. ² Lia'₂ con'₂ jme'₁eng₅₄ quiang'₅₄ 'nia'₂, tsá₃ 'e₂ jág₁ siá'₂ jme'₁nio₃ le₃guion₅₄, jnia'₅₄ lia'₂ ca₂ne₅₄ jág₁ quió'₅ Cristo bá₄, i₂tē₁ton₅₄ cróg₄. ³ Ca₂dsióg₃ jniá₂ ja₁con'₂ 'nia'₂ a₂líng₅ jan₂ dsa₂ 'uan₅₄, gó'₅, jleng₂₃ 'ηio₅ lín₃. ⁴ Lia'₂ jme'₁ca₂jme'₁ting₂₃ 'nia'₂ jág₁ dse₃, tsá₃ ca₂jmo₃ jág₁ jui₁lia'₂ jmo₅ dsa₂ i₂tin₂; jmá'₃ lia'₂ quian'₅₄ jág₁ a₂jme₂jnia₅ jui₅bí₂ quió'₅ Jme₂dsí₂ Jnió₅ bá₄ ca₂'ě₂ jniá₂ jág₁, ⁵ ia₁jaun₂ tē₂le₃ quian'₅₄ jui₅bí₂ quió'₅ Diú₄ bá₄ lě₅ a₂'én'₂ 'nia'₂, on₃jua'₅₄ lia'₂ con'₂ lě₅ tin₂ dsa₂ mi₂güí₃.

Jme₂jnia₅ Diú₄ ja₁con'₂ dsa₂ mi₂güí₃ tē₂le₃ quian'₅₄ Jme₂dsí₂ quiáin₅

⁶ La₁ia₁ dsia₂ bá₄ jnia'₅₄ jág₁ ca'₅₄ a₂tag₂ a₂ne₄ jin₄ rin'₅₄ i₂ma₂ron₂, la₁ on₃jua'₅₄ jág₁ ca'₅₄ a₂cha₂ mi₂güí₃ la₂, on₃ quē'₂ jág₁ ca'₅₄ quió'₅ dsa₂ i₂gon₂ mi₂güí₃ la₂, i₂qui₂dsi₃ηí₂. ⁷ Tē₂le₃ jág₁ a₂jme₁rē₂'ma₄ quió'₅ Diú₄ la₂ bá₄ 'ě₅ jnia'₅₄, qui₂chei₂ jnia'₅₄ dsa₂ ca₂le₃jě₃ a₂nio₅ dsí₅ Diú₄ jmo₃ a₂jlá'₁ o₄quián₂ jniog₄

† 1:31 Jeremías 9:24.

né'₃ guë₄ a₂nio₃ mi₂güig₃. 8 Ca₂lia'₂ i₁jan₂ dsa₂ can'₅₄
 i₂qui₂dsi₅ 'éi'₃ mi₂güig₃ la₂ ma₂ca₂rë₃ñí'₂ jág₁ la₂; ia₁
 jua'₅₄ mei'₂ guë₃ ca₂rë₃ñí'₂, tsá₃ jme₁tíoin₃ ne₄ cróg₄
 Te₁gui'₅₄ 'uan'₂ quián₂. 9 La₁ia₁, jui₁lia'₂ juá'₂ ne₄ Si₂:
 Tsá₃ ne₄ dsa₂ ma₂të₂,
 on₃ guë'₂ ma₂nág₂,
 on₃ guë'₂ ma₂i₂jiog₅ dsí₅ dsa₂

a₂ma₂jmo₃ Diú₄ co₂jñia₅₄ quió'₅ dsa₂ i₂'nio₃.*

10 La₁ të₂le₃ quián'₅₄ Jme₂dsi₂ quián₅, Diú₄ bá₄
 ma₂ca₂jme₃jnia₅ a₂jaun₂ ja₁con₂ jniog₄. Ia₁ Jme₂dsi₂
 'éi₂ bá₄ téi₂ si₂ jág₁ juë'₂ a₂niog₅ cha₂ quió'₅ Diú₄
 'ñiog₅.

11 Të₂le₃ jin₄ dsa₂ mi₂güig₃ guioin₅₄ guë'₂ ně₃, ħ'ein₂
 bá₄ qui'₅₄ jmig₄ le₃ñi₅ 'e₂ dsi₂jiog₅ dsí₅ riin'₅₄, jñia'₅₄
 lia'₂ jme₂dsi₂ quió'₅ 'ñiog₅ bá₄ dsa₂ a₂'i₄ të₂dsi₅ ñi₅?
 Le₂jaun₂ bá₄ lë₅ le₃quió'₅ Diú₄. 'I₁jan₂ tsá₃ 'ein₂
 ma₂ca₂rë₃ñi₅ 'a₂ lia'₂ dsi₂jiog₅ dsí₅ Diú₄; jñia'₅₄ lia'₂
 'ñiog₅ bá₄ Jme₂dsi₂ ñi₅. 12 Tsá₃ jme₂dsi₂ quián₅
 mi₂güig₃ la₂ ma₂guén₄ jniog₄; Jme₂dsi₂ a₂já₅ ja₁con₂
 Diú₄ bá₄ i₂ma₂ca₂guén₄ jniog₄, ia₁jaun₂ le₃ñí'₂ dsi₅
 jniog₄ ca₂le₃jě₃ 'e₂ a₂ma₂cuë₃ Diú₄ jniog₄ ia₁ a₂'ua₁
 dsí₅. 13 Jniog₄ ně₃, le₂ně₅ lë₅ ca₂le₃jě₃ jág₁ a₂dsia₂
 jniog₄ con'₂ lë₅ ma₂ca₂jme₃tag₅ Jme₂dsi₂ quián₅
 Diú₄, on₃jua'₅₄ con'₂ lë₅ jág₁ a₂ñí'₂ dsí₅ dsa₂ mi₂güig₃.
 Le₂ně₅ bá₄ jme₂jniá₁ jnia'₅₄ jág₁ a₂gu₂dsi₂ qui₂chei₂
 jnia'₅₄ dsa₂ i₂gu₂dsi₂.†

14 Jui₁lia'₂ dsa₂ i₂tsá₃ lín₅ i₂gu₂dsi₂ ně₃, tsá₃ guein₂₃
 jág₁ quió'₅ Jme₂dsi₂, ia₁ lë₅ jág₁ co₄ bá₄ la₂ le₃quió'₅
 'éi₂. Tsá₃ lé₂ le₃ñí'₂, ia₁ ca₂le₃jě₃ a₂ně₅ qui₂jióg'₂ 'í₁

* 2:9 Isaiás 64:4. † 2:13 o₃, "qui₂chei₂ jnia'₅₄ dsa₂ a₂gu₂dsi₂."

të₂le₃ quian'₅₄ Jme₂dsí₂ bá₄. ¹⁵ La₁ dsa₂ i₂gu₂dsí₂
në₃, qui₂con₂ 'í₁ le₃jě₃, la₁ia₁ 'i₁jan₂ tsá₃ lé₂ le₃con₂ 'í₁
ja₁coin₂. ¹⁶ Ia₁:
¿'Ein₂ bá₄ 'éi₂ i₂ñi₅

'a₂ lia'₂ dsi₂jio₅ dsí₅ Te₁gui'₅₄,
jua'₅₄ lé₂ le₃jme₃tñ₂₃ 'éi₂?†

La₁ jnio₄ në₃ dsi₂jio₅ dsí₅ ju₁lia'₂ dsi₂jio₅ dsí₅
Cristo.

3

Rin'₅₄ jnio₄ i₂jmo₅ ta₁ jme₂tñ₃ ne₄ Diú₄

¹ Rin'₅₄ jnio₄, tsá₃ ca₂lě₃ jua'₅₄ juig'₅₄ 'nia'₂ ju₁lia'₂
'nia'₂ dsa₂ i₂jio₅ con'₂ lě₅ Jme₂dsí₂, të₂le₃ ju₁lia'₂
'nia'₂ dsa₂ i₂jio₅ con'₂ lě₅ ni₁ñi₁ bá₄ ca₂juig'₂ jniá₂
'nia'₂, në₂jag₄ bá₄ guein₂ le₃quió'₅ Cristo. ² Jmá'₃
lia'₂ jág₁ a₂tsá₃ juí'₅ bá₄ ma₂ca₂jme₁tñ₅ jniá₂ 'nia'₂,
në₂jag₄ bá₄ guein₂ bē'₅₄ i₂'ín'₂ dsi'₅₄ i₂tsá₃ ma₂lé₂ guě'₃
má₃ bēn₂. Dsón'₂ bá₄ jaun₂, tsá₃ ma₂lé₂ nág'₁ 'nia'₂
jág₁ bēn₂. ³ Ia₁ lia'₂ lín₅ dsa₂ i₂jio₅ con'₂ lě₅ ni₁ñi₁ bá₄
guě₄ lín₅ 'nia'₂. Ia₁ të₁lia'₂ tion'₅₄ 'nia'₂ le₂jaun₂ a₂uig'₅
'au'₂ 'nia'₂, a₂qui₂tsín'₂ 'nia'₂ në₃, ¿Tsa₁ i₂nio'₅₄ 'nia'₂
con'₂ jio₅ ni₁ñi₁? ¿Tsa₁ i₂nio'₅₄ 'nia'₂ ju₁lia'₂ i₂nio₅
dsa₂ mi₂güig'₃? ⁴ Ia₁ chi₂jua'₂ chan₂jan₂ i₂juá'₂: “Dsa₂
quián₅ Pa₄ bá₄ jniá₂”; i₂lín₅₄ guě'₂ dsia₅ táng₃, juá'₂:
“Jniá₂ guě'₂ lín₅ dsa₂ quián₅ Apolos”, ¿on₁jua'₅₄ lia'₂
lín₅ dsa₂ mi₂güig'₃ bá₄ lín₅ 'nia'₂?

⁵ Jaun₂ në₃, ¿'ein₂ 'éi₂ Apolos? Le₂jaun₂ guě'₂
¿'Ein₂ 'éi₂ Pa₄? Jñia'₅₄ lia'₂ dsa₂ i₂jme₂tñ₃ ta₁ ne₄ Diú₄
bá₄ lág₅ jniá'₅₄ i₂i₂nio₄ jme₂tñ₁ dsa₂ ju₁lia'₂ ca₂lě₃

† 2:16 Isaías 40:13.

jme₁ca₂rē₃'én'₂ 'nia'₂ tē₂le₃ quió'₅ Te₁gui'₅₄. Le₂jau₂ le₂jau₂ jnia'₅₄ ma₂ja₂náu₅ jmo₂ ta₁ con'₂ lē₅ ma₂cuē₃ Te₁gui'₅₄. ⁶ Jnia'₅₄ con'₂ ca₂jan₃ jon₂ bá₄ jniá₂; Apolos guē'₂ ca₂séi₂ jmīg₂. La₁ia₁ 'ñiog₅ bá₄ Diú₄ ca₂jmo₃ ca₂i₃cón₃. ⁷ Jaun₂ ně₃, dsa₂ i₂jne₅, quian'₅₄ guē'₂ i₂séi₂ jmīg₂, tsá₃ 'e₂ tin₂ 'éi₂; jnia'₅₄ lia'₂ 'ñiog₅ bá₄ Diú₄ jmo₂₃ a₂dsi₂cón₃. ⁸ Jui₁lia'₂ dsa₂ i₂jne₅ quian'₅₄ guē'₂ dsa₂ i₂séi₂ jmīg₂, co₂rē₂ bá₄ téin₅ ta₁. Jaun₂ le₂jaun₂ bá₄ gue₃ 'liain'₅₄ le₂jain₂ le₂jain₂ lia'₂ con'₂ lē₅ ta₁ quió'₅. ⁹ Jme₁tí₁ jnia'₅₄ ne₄ Diú₄ quian'₅₄ rin'₅₄ jmo₂ ta₁; 'nia'₂ bá₄ líng'₅ co₂'nió'₄ 'uē₃ ja₁nau₂ ja₁lé₂ ta₁. O₃ lé₂ le₃jua'₅₄ ján₃, lín'₅ 'nia'₂ ně₂jag₄ caun₂ 'né₅ a₂chí'₅ quió'₅ Diú₄. ¹⁰ 'Uig₅₄ ia₁ a₂'ua₁ dsí₅ Diú₄, ca₂cuē₃ ta₁ a₂tsi'₅₄ 'uig₅₄ 'ia'₂, co₂'nió'₄ jan₂ tē₅'ia'₂ bá₄ líng'₅. I₂sián'₂ guē'₂ táng₃ jui₂₃ ne₄ jaun₂. Le₂jan₂ le₂jan₂ i₂jui₅ ně₃, ca₂tíin₂ con₂ 'í₁ rē₂ chi₂jua'₂ rē₂ bá₄ jui₂₃ tioin'₅₄. ¹¹ Ia₁ 'i₁jan₂ tsá₃ ma₃'ein₂ lé₂ chi'₃ 'uig₅₄ siá'₂, jnia'₅₄ lia'₂ con'₂ caun₂ a₂ma₂chí'₅ bá₄; a₂jaun₂ lín₅ Cristo 'ñiog₅. ¹² Ně₃ ně₃, jui₁lia'₂ ja₁jui₅ dsa₂ ne₄ 'uig₅₄ jaun₂ quian'₅₄ cu₄nióg₄, cu₄tiog₂, quian'₅₄ ni₁cang₁ tág₅ jlá'₁, o₃ jui₁lia'₂ ja₁jui₅ 'e₂ dsa₂ quian'₅₄ jau₅₄ 'ma₂ o₃ quian'₅₄ ni₁ñei₂, ni₁'ma₂ ta₅ ně₃, ¹³ tion₅₄ bá₄ le₃jniá₂ ta₁ quió'₅ le₂jan₂ le₂jan₂. Jmīg₄ i₁jáun₃, si₂ bá₄ jme₃jnia₅ a₂jaun₂, jióg'₂ 'í₁ ně₃ 'a₂ lia'₂ lē₅ ta₁ quió'₅ le₂jan₂ le₂jan₂. ¹⁴ Chi₂jua'₂ ca₂jiog₃ a₂ca₂chí'₃ dsa₂ jaun₂, gue₃ bá₄ 'liain'₅₄; ¹⁵ la₁ ně₁jua'₂ ca₂cáu₂ ně₃, dsi₃'én₂ bá₄ quió'₅. La₁ jnia'₅₄ con'₂ lióin₂ jmá'₃ 'ñiog₅, ně₂jag₄ bá₄ jan₂ dsa₂ i₂ja₂lag₃ ca₂lón₂ ne₄ si₂ bá₄ lé₂.

¹⁶ ¿Tsa₁ ñi'₅₄ 'nia'₂, guion'₅₄ bá₄ 'nia'₂ líng'₅ guá'₅ quió'₅ Diú₄, ton'₂ guá'₅ Jme₂dsí₂ quián₅ Diú₄ tē₂'au'₂ 'nia'₂? ¹⁷ Ně₁jua'₂ 'ein₂ ca₂'én₂ guá'₅ quió'₅ Diú₄, Diú₄

ně₃ co₂dsia₅ 'éin₂ dsa₂ 'éi₂. Ia₁ i₂jñi₅ bá₄ guá'₅ quián₅ Diú₄, jaun₂ guion'₅₄ bá₄ 'nia'₂ líng'₅ guá'₅.

18 'Ijan'₂ 'nia'₂ tsá₃ 'ein₂ jui₁le₂gan₂. Chi₂jua'₂ chan₂ i₂lín₂ 'ñio₅ lín₃ ñí'₂ dsí₅ lia'₂ con'₂ lě₅ ñí'₂ dsí₅ dsa₂ mi₂güí₃, jui₁jmo₁₂ co₂dsia₅ ne₂jag₄ bá₄ a₂tsá₃ 'e₂ ñi₅, ia₁jaun₂ gué₄ dsi₅óg₄ léin₂ tē₃dsón'₂ dsa₂ i₂tín₂ i₂ñi₅. 19 Ia₁ ca₂le₃jě₃ a₂ñi₄ 'ñio₅ tñ₂ dsa₂ mi₂güí₃, ca₂le₃jě₃ a₂jaun₂ tsá₃ 'e₂ quen₅ le₃ne₄ Diú₄. Ia₁ ne₄ Si₂ juá'₂: “Diú₄ join₂₃ dsa₂ jě₄ mai₅₄ quió'₅ guioin₅₄.”* 20 Juá'₂ ne₄ Si₂ ján₃: “I₂ñi₅ bá₄ Te₂gui'₅₄ 'a₂ lia'₂ qui₂dsi₂jio₅ dsí₅ dsa₂ i₂tín₂, a₂tsá₃ 'e₂ ta₁ tí₄.”† 21 Jaun₂ lě₃, 'i₁jan₂ tsá₃ jui₁dsia₁₂ jág₁ tá'₅ le₃quió'₅ dsa₂ mi₂güí₃. Ia₁ a₂ca₂tín'₂ 'nia'₂ bá₄ ca₂le₃jě₃ a₂cha₂. 22 Pa₄, Apolos, Pe₄, ‡ mi₂güí₃ a₂chong₂ jnio₄, 'mú₃, jmí₄ rē₂ně₃, jui₁la₂ jmí₄ 'i₅óg₃ ně₃: ca₂le₃jě₃ bá₄ ně₅ lě₅ quián'₂ 'nia'₂. 23 Le₂jaun₂ guē'₂ ján₃, i₂quián₅ Cristo bá₄ 'nia'₂; Cristo guē'₂ lín₅ i₂quián₅ Diú₄.

4

Ta₁ a₂ca₂tín₂ dsa₂ i₂chen₄ quián₅ Cristo

1 Jaun₂ bá₄ ně₃, con'₂ jñia'₅₄ dsa₂ i₂jme₂ti₃ ta₁ ne₄ Cristo bá₄ ca₂tín₂ dsa₂ jág₂ jnia'₅₄, a₂niog₅ ne₄ jnia'₅₄ jág₁ a₂jme₁rē₂'ma₄ quió'₅ Diú₄. 2 Con'₂ siá'₂ táng₃, chi₂jua'₂ le₂ně₅, jaun₂ bá₄ tion₅₄ ca₂tín₂ jui₁lia'₂ dsa₂ i₂niog₅ gu₂ ta₁ le₂'éi₂, jme₃ti₃ quian'₅₄ ta₁ a₂ca₂ñi₂. 3 Tē₂le₃ quió₃ jniá₂ ně₃, tsá₃ a₂nag₅₄ jaun₂ ně₁jua'₂ ca₂quion'₂ 'nia'₂ 'í₁ le₃ja₁cong₂, o₃ ně₁jua'₂ ca₂cáun₃ 'í₁ dsí₂tan₅₄ dsa₂ mi₂güí₃ 'e₂. Ca₂lia'₂ jñia'₅₄ 'ñi₅ó₃, tsá₃ cáun₅ 'í₁ le₃ja₁cong₂ 'ñi₅ó₃. 4 'I₁caun₂ tsá₃ 'e₂

* 3:19 Job 5:13. † 3:20 Salmo 94:11. ‡ 3:22 griego: Cefas.

dsi₂jñi₅ dsi₃. La₁ on₃jua'₅₄ le₂në₅ o₂'ag₅ jág₁ a₂tsá₃ 'e₂
rë₂cáng'₄. 'Njog₅ bá₄ Te₁gui'₅₄ i₂con₂ 'í₁ quió₃. ⁵Jaun₂
tsá₃ lë₁caun₂ de'₂ 'nia'₂ 'í₁ tē₃jñiá₅. Jë₁ma₂guán'₅
Te₁gui'₅₄, téi₂ si₂ ne₄ a₂rë₂'ma₄ a₂jmo₅-dsá₅ dsa₂ jë₄
qui₁né'₃; jme₃jñiai₂₃ ca₂le₃jë₃ a₂njog₅ qui₂dsi₂jñia₅
dsí₅ dsa₂. Jaun₂ guë₄ gue₃ dsa₂ 'liain'₅₄ a₂cuë₃ Diú₄
a₂'ñio₂ dsí₅ quió'₅ le₂jain₂ le₂jain₂.

⁶Rin'₅₄ jniog₄, a₂dse₃ quián'₂ bá₄ 'nia'₂ juá'₅ jniá₂
ca₂le₃jë₃ a₂në₅, a₂'íng₅ Apolos quian'₅₄ guë'₂ 'ñió₃
jniá₂. Juá'₅ le₂në₅ ia₁jaun₂ tē₂le₃ quian'₅₄ jág₁ jáng'₅
léi₄ nē₅ quián₂ jnia'₅₄, le₃tñ'₂ 'nia'₂, a₂tsá₃ jmó'₂ 'nia'₂
ñag₅₄ guë₄ con'₂ lë₅juá'₂ ne₄ Si₂, con'₂ tsá₃ ñó₅ nē₁jua'₂
ca₂jmo'₅₄ 'nia'₂ rón'₂ o₄quió'₄ jan₂, a₂jñ'₅₄ 'nia'₂ sion₅
i₂sián'₂. ⁷¿'Ein₂ 'éi₂ 'ag₅ 'ne₂ a₂dseng'₃ guë₄ lia'₂ con'₂
guë₄ ríng'₂? ¿'E₂ bá₄ bí₂ 'au'₂ jua'₅₄ tsá₃ ma₂cuë₃
Diú₄ nē₃? ¿'E₂ guë'₂ lë₃ dsia'₂ jág₁ tá'₅ nē₂jag₄ bá₄
a₂ca₂jñag'₂ 'ñiag'₂ a₂cha₂ quiáng'₂ jmo'₂?

⁸Jmo'₂ 'nia'₂ 'au'₂ 'ñio₅ lín₃ dse₃ ma₂chang'₂;
ma₂cha₂ quián'₂ 'nia'₂ ca₂le₃jë₃. Ma₂jmo'₂ 'nia'₂
'au'₂ ma₂tiáng'₅ can'₅₄ bá₄ 'nia'₂, tsá₃ ma₃quiong'₅₄
jnia'₅₄. ¡Jua'₅₄ mei'₂ guë₃ dsón'₂ dsi₂jó'₃ ma₂gon'₂
'nia'₂! Jaun₂ bá₄ jme₁lé₂ gon₂ jnia'₅₄ co₂lë₅ quian'₅₄
'nia'₂ jua'₅₄ mei'₂ guë₃ le₂jaun₂. ⁹Ia₁ lín₂ jniá₂, lia'₂
lë₅ bá₄ tē₂le₃ jë₁ca₂tó'₂ bá₄ ma₂chei'₃ Diú₄ con'₂ jnia'₅₄
i₂lág₅ dsa₂ i₂chen₄ quián₅, a₂jág₂ dsa₂ lia'₂ ja₁jín₂
dsa₂ i₂ma₂'í₄ 'éi'₃ dsián₃. Ma₂ja₂lén₂ dsa₂ jág₂ jnia'₅₄
nē₂jag₄ a₂lë₁'io'₂ tē₅ dsí₅ jág₃ ca₂lë₃jín₃ i₂chan₂, lia'₂
dsa₂ mi₂güí₃ lia'₂ ángeles nē₃. ¹⁰Dsa₂ co₄ bá₄ 'ag₅
dsa₂ jnia'₅₄ o₄quió'₄ Cristo; 'nia'₂ guë'₂ ma₂jmo'₂
'ñio₅ lín₃ ma₂ñí'₂ 'au'₂ jui₁lia'₂ tē₂le₃ quió'₅ Cristo.
Ma₂jmo'₂ 'nia'₂ 'ñio₅ lín₃ tiá₂ ma₂tióng'₂; jnia'₅₄ guë'₂

jag'⁵⁴ táng₃ ně₂jag₄ dsa₂ 'uan⁵⁴. Jme₂gan₃ dsa₂ 'nia'₂; jnia'⁵⁴ guě'₂ ně₃ tsá₃ jei⁵⁴ dsa₂. ¹¹ Ca₂lia'₂ jnió₂ jmig₄ ně₃, ja₂náu₅ jnia'⁵⁴ a₂'ong₄, qui₂rě₂quein₂ dsi₅, tsá₃ cha₂ a₂qui'⁵⁴, tsá₃ dsi₂néi₂ cha₂ 'io₁ jnia'⁵⁴. Dsa₂ guě'₂, con'₂ lě₁co₂jmóg'₂. ¹² Ja₂náu₅ jnia'⁵⁴ jmo₂ ta₁ quian'⁵⁴ gu₂-tag₄ guio⁵⁴. Jui₁lia'₂ jme₁tě₂'o'₂ dsa₂, caun₂ jág₁ dse₃ bá₄ qui₁jein'₄ jniá₂ quió'₅. Jui₁lia'₂ jme₁co₂'ein₅ dsa₂, la₁ jmo₂ bá₄ jnia'⁵⁴ tió'₃ dsi₅. ¹³ Chan₂ guě'₂ dsa₂ i₂dsia₅ 'ag₅ 'liǵ'⁵⁴, la₁ caun₂ jág₁ dse₃ bá₄ cuě'₂ táng₃ jnia'⁵⁴. Jáǵ₂ dsa₂ ně₂jag₄ ti₁'ŋe'⁵⁴ a₂tsá₃ ta₁ tí₄, ně₂jag₄ bá₄ jme₁qui₅ quió'₅ dsa₂ mi₂güǵ₃ ně₃, ca₂lia'₂ jnió₂ jmig₄ ně₃.

¹⁴ On₃jua'⁵⁴ ia₁jaun₂ cán'₁ 'nia'₂ o₂guí'₃ tó'₅ jniá₂ jág₁ la₂ ne₄ si₂. A₂jaun₂ bá₄ jmo₂₃ jág₁ tě₃jniá₅ ja₁cong'₂, ně₂jag₄ bá₄ chi'₂-guein₂ quiáng₃ i₂'nióg₃ guě₄ lín₃. ¹⁵ Ia₁ o₁jnia'⁵⁴ guia₃ mei₅ tē₅ ca₂rě₃chán₃ i₂jme₃tag₅ 'nia'₂ le₃quió'₅ Cristo, la₁ tsá₃ jin₅ néi'₅ 'nia'₂ chan₂. Ia₁ le₃quió'₅ Cristo Jesús, tē₂le₃ quian'⁵⁴ jág₁ dse₃ quió'₅, ca₂lín₃ jniá₂ néi'₅ 'nia'₂. ¹⁶ Jaun₂ lě₃, mi₅ jniá₂ ja₁con'₂ 'nia'₂, jaun₂ tón'₂ 'nia'₂ jui₅ i₁nio'₄ 'nia'₂ ja₁ma₂ŋi₃ jniá₂.

¹⁷ 'Uǵ⁵⁴ jaun₂ bá₄ tsín₂ jniá₂ Timoteo, i₂jmo₅ jniá₂ dsi₃ co₂'nió'₄ guein₂ quiáng₃ i₂'nióg₃ guě₄ lín₃, i₂rě₂ti'⁵⁴ le₃ja₁con₂ Te₁gui'⁵⁴. 'Éi₂ bá₄ jmo₃ dsiog'₂ 'au'₂ 'nia'₂ 'a₂ lia'₂ lě₅ chan₂ jniá₂ a₂'éng₂ le₃quió'₅ Cristo, lia'₂ con'₂ lě₅ jme₂tǵng₁ guá'₅ ca₂le₂con₂ ja₁siá'₂. ¹⁸ I₂lín⁵⁴ 'nia'₂ ma₂i₂niog'⁵⁴ jmo'₂ 'nia'₂ róng'₂, a₂lín'₂ 'nia'₂ a₂tsá₃ ma₃dsióg₄ jniá₂ i₁jǵng₁₂ 'nia'₂. ¹⁹ La₁ ŋi'⁵⁴ ta₁ la₂ bá₄ 'nio₃ dsióg₄ i₁jág₃ ně₁jua'₂ ca₂cuě₃ Te₁gui'⁵⁴ jmǵg₄. Jmǵg₄ jaun₂ le₃guion⁵⁴ jniá₂, on₃jua'⁵⁴ jmá'₃ jáǵ₁ tá'₅ a₂dsia₅ dsa₂ jin'₄ 'nia'₂ tióin'⁵⁴, le₃guion⁵⁴ jniá₂ ján₃ 'a₂ con'₂ bí₂ 'io₂₃. ²⁰ Ia₁ jui₁lia'₂

ja₁gon₂ Diú₄, on₃jua'₅₄ a₂jñia'₅₄ dsi₂lé₂ jmá'₃ jág₁;
a₂quian'₅₄ ju₁í₅bí₂ bá₄ ján₃. ²¹ ¿'E₂ 'niog'₂ 'nia'₂: a₂'i'₁'é₃
jniá₂ uig₅ jë₁ma₂dsióg₃, o₃ a₂dsióg₄ jniá₂ caun₂ dse₃
a₂'nió₃ jniá₂ 'nia'₂ a₂'ua₁ dsi₃'e₂?

5

Jau'₂ 'í₁ quió'₅ jan₂ dsa₂ i₂ca₂'nú₂ dso₄

¹ 'E₂ ca₂rë₃chá₃ jág₁, a₂chan₂ jan₂ jin'₄ 'nia'₂ 'no₂₃
dso₄, a₂jmo₂₃ a₂lë₅ quián₅ bá₄ dsa₂ mí₂ quián₅ jmei₂.
Caun₂ dso₄ ca₂lia'₂ jñia'₅₄ dsa₂ i₂tsá₃ cui₅ Diú₄ bá₄
guë₄ tsá₃ jmo₂₃ le₂në₅. ² jmo'₂ guë₄ 'nia'₂ 'au'₂
a₂tióng'₅₄ dse₃ jmo'₂ róng'₂ tióng'₅₄! i'Nió'₄ jme₁tón'₂
'nia'₂ qui'₁-'áu'₂ 'lia'₂ 'au'₂! Dsa₂ i₂ca₂'nú₂ dso₄ në₅
ca₂tín₂ o₃'iin₅ bá₄ jin'₄ 'nia'₂ në₅. ³ O₁jñia'₅₄ tsá₃
quian'₅₄ jniá₂ 'nia'₂ dsi₁ne₁, la₁ 'eng₅₄ bá₄ ja₁në₅
quian'₅₄ 'nia'₂ të₂le₃ quian'₅₄ jme₂dsí₂; ma₂cáun₃
jniá₂ 'í₁ ja₁con₂ dsa₂ i₂ca₂jmo₃ le₂në₅, në₂jag₄ bá₄
a₂chéng'₅ 'ñió₃ të₃dsón'₂. ⁴ Tión'₂ 'nia'₂ long'₂ o₄quió'₄
Te₁gui'₅₄ Jesús, a₂'en₅₄ jniá₂ të₂le₃ quian'₅₄ jme₂dsí₂
quió₃, quian'₅₄ ju₁í₅bí₂ quió'₅ Te₁gui'₅₄ Jesús, ⁵ a₂jin'₅₄
'nia'₂ dsa₂ 'éi₂ o₄gú₃ Satanás, ia₁jaun₂ qui₂dsi₃'én₂
ni₁ñi₁₂, ia₁jaun₂ tín'₂ jme₂dsí₂ quió'₅ jmig₄ i₁jáun₃
quió'₅ Te₁gui'₅₄.

⁶ Tsá₃ dse₃ a₂dsia'₂ 'nia'₂ jág₁ tá'₅. ¿Tsa₁ ñi'₅₄
'nia'₂, “Quian'₅₄ ca₂jui₄ bá₄ levadura guion'₂ ta₁jë₂
ti₁can₁”? ⁷ Jñiá'₃ 'nia'₂ levadura gui'₅₄, ia₁jaun₂
lén'₂ 'nia'₂ co₂'nió'₄ ca₂míg₂ ti₁can₁ a₂tsá₃ levadura
quian'₅₄, ju₁lia'₂ të₃dsón'₂ lín'₅ 'nia'₂. Ia₁ 'ñiog₅ bá₄
Cristo ca₂join₃ ñó₃ a₂rë₂jein'₅₄ ne₄ Diú₄ o₄quián₂
jniog₄; a₂lín₅ já'₂ cha'₂ i₂ca₂jon₃ Jmig₄ Të₂'in₅₄
quián₂. ⁸ Jaun₂ lë₃, jme₁go₃ jniog₄ Jmig₄ jaun₂,

on₃jua'₅₄ quian'₅₄ levadura gui'₅₄, on₃ guë'₂ quian'₅₄
a₂'lig'₅₄ qui₂dsi₂jnia₅ dsi₅ jniog₄ ja₁con₂ rin'₅₄, on₃
guë'₂ jmó₁ uig₅ dsi₅ ja₁con₂ rin'₅₄; tē₂le₃ jme₁go₃
jniog₄ quian'₅₄ jág₁ tí₅ dsi₂jó'₃.

⁹ Ne₄ si₂ carta quió₃ a₂ca₂tsíng₂ ne'₅₄ 'nia'₂ le₂jniá₅,
ca₂juá'₃ a₂tsá₃ jme₁quian'₅₄ 'nia'₂ dsa₂ i₂nió'₅ jág₁
quian'₅₄ dsa₂ i₂tsá₃ lě₅ dsi₂i₂gu₂. ¹⁰ On₃jua'₅₄ jaun₂
rē'₂ juá'₅ jniá₂ a₂qui₂dsi₃uín'₃ 'nia'₂ co₂dsia₅ co₂nei'₅₄
ja₁con₂ dsa₂ i₂'no₅ dso₄, ja₁con₂ dsa₂ i₂'ua'₂ dsí₅,
dsa₂ i₂'ang₅, dsa₂ i₂qui₂jme₂juin'₂ diú₄ lag₄ ně₃. Ia₁
co₂nei'₅₄ jme₁'uín'₃ 'nia'₂ mi₂güí₃ la₂, jua'₅₄ mei'₂
guě₃ le₂jaun₂. ¹¹ A₂la₂ bá₄ juá'₅, a₂tsá₃ dsi₂ten₅₄
jme₁jen'₂ 'nia'₂ 'nio₅ lin₃ 'ei₅ caun₂ jág₁ quian'₅₄ jan₂
i₂jmo₅ a₂lin₅ jan₂ rin'₅₄ jniog₄, chi₂jua'₂ ján₃ guë'₂
nió'₅ jág₁ quian'₅₄ i₂tsá₃ lě₅ dsi₂i₂gu₂, chi₂jua'₂ 'ua'₂
dsí₅, chi₂jua'₂ jme₂juin'₂ diú₄ lag₄, chi₂jua'₂ qui₂juá'₂
jág₁ uig₅, chi₂jua'₂ qui₂i₂noi₅₄ le'₁ein₅, chi₂jua'₂
qui₂'ang₂₃ ně₃. On₃ guë'₂ ca₂tín'₂ 'nia'₂ quē'₅₄ quian'₅₄
dsa₂ le₂'éi₂. ¹² Tsá₃ ca₂tín₂ jniá₂ cáun₄ 'í₁ ja₁con₂ dsa₂
i₂tsá₃ quiong'₅₄ jniog₄. Diú₄ bá₄ i₂con₂ 'í₁ ja₁con₂ dsa₂
'éi₂. ¹³ La₁ia₁ 'nia'₂, ca₂tíng'₂ caun'₅₄ 'í₁ jmá'₃ lia'₂ dsa₂
i₂quiong'₅₄ jniog₄. Jaun₂ ně₃: “Dsen₅₄ 'nia'₂ cau₅ dsa₂
'lin'₅₄ i₂'en₅₄ jin'₄ 'nia'₂.”*

6

Mi'₅₄ a₂cha₂ jin₄ dsa₂ 'én₂ 'ni₂₃ riin'₅₄ ne₄ dsi₂tan₅₄
i₂tsá₃ 'én₂

¹ Jui₁lia'₂ jme₁chan₂ 'ein₂ 'nia'₂ 'nio₃ dsia₃ dso₄ 'ni₃
rin'₅₄, ċ'a₂ bá₄ lia'₂ tiá₂ 'au'₂ o₁dsia'₄ dso₄ ne₄ ju₁lia'₂

* **5:13** Deuteronomio 17:7; 19:19; 21:21,24; 24:7.

dsa₂ i₂tsá₃ Diú₄ cuin₅, 'nió'₄ a₂jme₁juig'₅₄ 'nia'₂ dsa₂
 quián₅ Diú₄? ² ¿Tsa₁ ŋi'₅₄ 'nia'₂ jua'₂ dsa₂ juig₂
 quián₅ Diú₄ bá₄ guè'₂ i₂con₂ 'í₁ quió'₅ dsa₂ mi₂güig₃?
 Chi₂jua'₂ 'nia'₂ i₂caun'₂ 'í₁ quió'₅ dsa₂ mi₂güig₃ ně₃,
 ¿'en₁ jmá'₃ guè'₂ tsá₃ 'ein₂ i₂tin₂ chan₂ i₂lé₂ jme₃rě₃
 ju₁lia'₂ mi'₅₄ me'₂? ³ ¿Tsa₁ ŋi'₅₄ 'nia'₂ jua'₂ le₂jio₅
 ángeles bá₄ quiong₅₄ jniog₄ 'í₁ quió'₅? ¡'Ē₂ gué₄ bá₄
 jaun₂ ca₂tág₂ jniog₄ jme₁rě₂ 'e₂ caun₂ o₂me'₅₄ dsi₅
 rě₂cha₂ ne₄ gua'₅₄ 'uë₃ la₂! ⁴ Chi₂jua'₂ 'e₂ caun₂ mi'₅₄
 cha₂ quián'₂ 'nia'₂, r'in'₅₄ jniog₄, ¿'e₂ lě₃ o₂nó'₅ 'nia'₂
 o₂dsia'₅₄ dso₄ ne₄ dsa₂ i₂tsá₃ 'e₂ quen₅ le₃quió'₅ guá'₅?
⁵ Juá'₅ jniá₂ le₂ně₅ ia₁jaun₂ le₃guen'₅₄ 'nia'₂ ca₂la₂. ¿O₃
 bá₄ 'i₁jan₂ jmá'₃ tsá₃ 'ein₂ chan₂ jin'₄ 'nia'₂ i₂qui'₅₄
 jmig₄ jme₃rě₃ mi'₅₄ a₂niog₅ jin₄ r'in'₅₄? ⁶ ¿Rě₂ gué₄
 dsióg₅, lín'₂ 'nia'₂, ju₁lia'₂ jan₂ r'in'₅₄ jniog₄ dsi₂dsiá₃
 dso₄ ne₄ dsa₂ i₂tsá₃ 'én₂?
⁷ Chi₂jua'₂ ma₂tion'₅₄ 'nia'₂ mi'₅₄ jin'₄ 'nia'₂, co₂dsia₅
 ma₂tán'₂ bá₄ 'nia'₂ jág₁ chi₂jua'₂ le₂jaun₂. ¿Tsa₁ dse₃
 gué₄ jmo₃ dsa₂ co₂ŋei'₅₄ tió'₃ dsí₅ a₂caun₂ lě₁dsi₂ŋi₂
 jmóg'₂ r'in'₅₄? ¿Tsa₁ dse₃ gué₄ guén₄ jniog₄ ju₁'ang₁₂
 'e₂ 'ang₃ quián₂? ⁸ La₁ 'nia'₂ ně₃, jmag'₅₄ dsa₂,
 'ang'₂ quió'₅ dsa₂; ca₂tě₂ ja₁con₂ rín'₂ 'nia'₂ guiong'₅₄
 jmo'₂ le₂ně₅. ⁹ ¿O₃ bá₄ tsá₃ ŋi'₅₄ 'nia'₂, tsá₃ ja₁gon₂
 Diú₄ ca₂tín₂ dsa₂ i₂tsá₃ cuin₅ Diú₄? Tsá₃ cuin₅ 'nia'₂
 jmig₄ jua'₅₄ a₂le₃gang'₂, ia₁ ju₁lia'₂ dsa₂ i₂nió₄ nió'₅
 jág₁ quian'₅₄ dsa₂ i₂tsá₃ lě₅ dsi₂i₂gu₂, ju₁lia'₂ dsa₂
 i₂qui₂jme₂juin'₂ diú₄ lag₄, ju₁lia'₂ dsa₂ ŋe'₂ i₂dsi₂jnia₅
 dsí₅ lia'₂ dsi₂jnia₅ dsí₅ 'io₅₄, * ju₁lia'₂ dsa₂ ŋe'₂ i₂nió'₅
 jág₁ quian'₅₄ dsa₂ ŋe'₂ r'in'₅₄, ¹⁰ ju₁lia'₂ dsa₂ 'ang₂,
 dsa₂ i₂'ua'₂ dsí₅, dsa₂ i₂nió₄ 'en₅, dsa₂ i₂nió₄

* 6:9 o₃, “dsa₂ ŋe'₂ i₂'nag₅ quió'₅.”

qui₂dsia₂₃ jág₁ tëjá_{g1}, dsa₂ i₂lí'₂ cu₄ tële₃ quian'₅₄
a₂'ñioi₅₄ jme₂gain₂₃ riin'₅₄: dsa₂ le₂'éi₂ ně₃, tsá₃
ca₂tíin₂ ja₁gon₂ Diú₄. **11** Le₂ně₅ bá₄ jme₁chan'₂ i₂lin₅₄
'nia'₂ le₂jñiá₅. La₁ 'ñiog₅ bá₄ Diú₄ ma₂qui₂ca₂rín'₃
jme₂dsí₂ quián'₂ 'nia'₂, ma₂lě₅ 'í₁ quiáin₅, ca₂guei₃
Diú₄ 'nia'₂ ně₂jag₄ bá₄ a₂tsá₃ 'e₂ dso₄ rin'₂ 'nia'₂,
të₂le₃ quian'₅₄ Te₁gui'₅₄ Jesús, quian'₅₄ guë'₂ Jme₂dsí₂
quián₅ Diú₄ quián₂.

A₂'nió'₅ jmo₃ dsa₂ 'í₁ ni₁ñi₁₂

12 Chan₂ dsa₂ i₂juá'₂: “I₄ bá₄ 'éi'₃ le₃jmo₃ dsa₂
'e₂ 'nio₃ jmo₃.” Dsón'₂ bá₄ dsau₅, la₁ tsá₃ jua'₅₄
ca₂le₃jě₃ jaun₂ jme₂'o₅₄. Dsau₅ bá₄ “I₄ 'éi'₃ le₃jmo₅₄
jniá₂ ca₂le₃jě₃ 'e₂ 'nio₃ jmo₅₄”, la₁ia₁ tsá₃ cuín₄ jniá₂
jmig₄ jua'₅₄ co₂dsia₅ jin'₄ jniá₂ co₂ñei'₅₄ ne₄ 'i₁caun₂.
13 Dsau₅ bá₄ jui₁lia'₂ juá'₂ dsa₂: “Lě₅ má₃ o₄quió'₄
rě₂tú'₅ dsa₂; rě₂tú'₅ guë'₂ dsa₂ lě₅ o₄quió'₄ má₃.” La₁
já₅ jmig₄ a₂'én₂ Diú₄ ta₁tin₃. La₁ tsá₃ ta₁ jaun₂ qui'₅
ni₁ñi₁₂ jua'₅₄ a₂'no₃ dsa₂ dso₄ quian'₅₄ i₂sián'₂. Ta₁
a₂qui'₅ ni₁ñi₁₂, a₂jme₃ti₃ ta₁ ne₄ Te₁gui'₅₄ bá₄ jaun₂;
jaun₂ Te₁gui'₅₄ ně₃ i₂cuë₅ bí₂ quió'₅ ni₁ñi₁₂. **14** Ia₁
jui₁lia'₂ ca₂jme₃jen'₅₄ Diú₄ Te₁gui'₅₄ quian'₅₄ jui₅bí₂
quió'₅, le₂jaun₂ bá₄ jmo₃ a₂jein'₅₄ guë'₂ jniog₄ ján₃.

15 ¿Tsa₁ ñi'₅₄ 'nia'₂ jaun₂ a₂tén₅ të₂le₃ quió'₅ Cristo
bá₄ ni₁ñi'₁ 'nia'₂? ¿On₃ bá₄ lě₂ le₃tion₄ jniog₄ jui₁lia'₂
a₂tén₅ ni₁ñi₁ Cristo le₃ja₁con₂ jui₁lia'₂ jan₂ 'io₅₄ i₂'nag₅
quió'₅? ¡Tsá₃ jui₁le₅₄ bá₄ le₂jaun₂! **16** ¿Tsa₁ ñi'₅₄
'nia'₂, jui₁lia'₂ jan₂ dsa₂ ñe'₂ i₂nió'₅ jág₁ quian'₅₄
jan₂ 'io₅₄ i₂'nag₅ quió'₅, co₂'nió'₄ caun₂ ni₁ñi₅ bá₄ lě₅
jě₁le₃oin₃ le₂jaun₂? Ia₁ ne₄ Si₂ juá'₂: “Co₂'nió'₄ caun₂
ni₁ñi₅ lě₂ le₃oin₃ le₂jaun₂.”† **17** La₁ jui₁lia'₂ jan₂ dsa₂

† **6:16** Génesis 2:24.

i₂rē₂quian'₅₄ Te₁gui'₅₄, co₂'nió'₄ jan₂ jme₂dsí₂ bá₄ lé₂ quiaín'₅₄.

¹⁸ Cuíng₄ 'nia'₂ ja₁con₂ a₂'lig'₅₄ jui₁lia'₂ a₂qui₂'no₅ dsa₂ dso₄ quian'₅₄ i₂sián'₂. Jui₁'e₂ guě₃ dso₄ siá'₂ a₂'no₅ dsa₂, 'no₂₃ le₃co'₅₄ ni₁ñi₁₂ bá₄. La₁ jui₁lia'₂ dsa₂ i₂nió'₅ jág₁ quian'₅₄ i₂tsá₃ lín₅ dsi₂i₂gu₂, 'no₂₃ dso₄ ja₁con₂ ni₁ñi₁ 'ñiog₅ bá₄. ¹⁹ ¿Tsa₁ ñi'₅₄ 'nia'₂ a₂lě₅ ni₁ñi'₁ 'nia'₂ caun₂ guá'₅ ja₁'en₅₄ Jme₂dsí₂ Jñió₅ i₂ma₂cuín₃ Diú₄? Jaun₂ tsá₃ lě₅ jua'₅₄ a₂tén'₅ guion'₅₄ 'nia'₂; ²⁰ ia₁ i₂ma₂ca₂lán₂ 'mu'₅₄ lín₃ Diú₄ 'nia'₂. Jaun₂ bá₄ lě₃ ca₂tín'₂ 'nia'₂ jme₁gan'₃ Diú₄ tē₂le₃ quian'₅₄ ni₁ñi'₁ 'nia'₂.

7

A₂to'₂ jág₁ dse₃ tē₂le₃ quió'₅ jui₁lia'₂ dsa₂ i₂jén'₂ gu₂

¹ La₂ jein'₄ jniá₂ jág₁ quián'₂ 'nia'₂ a₂juá'₂ 'nia'₂ ne₄ si₂ a₂ca₂chen'₂ 'nia'₂ ne₃. ² Dsón'₂ bá₄ dse₃ jua'₅₄ mei'₂ guě₃ co₂ñei'₅₄ tsá₃ jén'₂ dsa₂ ñe'₂ gu₂; la₁ 'uig₅₄ ia₁ ñí₄ lě₃ qui₂i₂nio₄ dsa₂ jmo₂₃ 'lig'₅₄ jmig₄ nē₃, jaun₂ bá₄ lě₃ co₂ñei'₅₄ jui₁jen'₅₄ bá₄ dsa₂ mí₂ dsa₂ ñe'₂ gu₂, jui₁le₂chan₂ bá₄ dsi₂i₂gu₂ le₂jain₂ le₂jain₂. ³ Dsa₂ ñe'₂ guě'₂ nē₃ ca₂tín₂ jme₃ti₃ ca₂le₃jě₃ con'₂ a₂ca₂tín₂ jme₃ti₃ le₃ja₁con₂ dsa₂ mí₂ quiaín₅; le₂jaun₂ guě'₂ dsa₂ mí₂ nē₃ ca₂tín₂ jme₃ti₃ táng₃ le₃ja₁con₂ dsi₂i₂gu₂ ca₂le₃jě₃ con'₂ a₂ca₂tín₂ jme₃ti₃. ⁴ On₃jua'₅₄ a₂ca₂tín₂ 'ñiog₅ dsa₂ mí₂ ni₁ñi₁₂ 'ñio'₂; a₂ca₂tín₂ dsa₂ ñe'₂ quiaín₅ bá₄ ján₃. Já₃ guě'₂ le₂jaun₂ dsa₂ ñe'₂ táng₃, on₃jua'₅₄ a₂ca₂tín₂ 'ñiog₅ 'éi₂ ni₁ñi₁₂; a₂ca₂tín₂ dsa₂ mí₂ quiaín₅ bá₄ ján₃. ⁵ Tsá₃ lě₁jmo₂ 'nia'₂ jua'₅₄ a₂tsá₃ guéin'₄ le₂jang'₂ le₂jang'₂, jñia'₅₄ lia'₂ chi₂jua'₂ 'niog'₂ jmó'₂ 'nia'₂ caun₂ jág₁ a₂tsá₃ tiáng'₄ 'nia'₂ co₂lě₅

tin₃-ni₅ jmig₄ ia₁ a₂'niog'₂ jmó'₂ ca₂ne₅₄ chi₁léng'₄
 Diú₄, jme₂'ing'₄ tē₁lia'₂ jmig₄ jaun₂. Jē₁ma₂ca₂ñi₂
 jmig₄ jaun₂, tián'₂ táng₃ 'nia'₂. Ia₁ con'₂ tsá₃ ñó₅
 nē₁ca₂cáun₃ táu₂ i₂sē₃dsen₃ nē₁jua'₂ tsá₃ ca₂tió'₃ 'au'₂
 'nia'₂.

⁶ Ca₂le₃jē₃ a₂juá'₅ jniá₂ nē₅ cuē₅ jniá₂ 'nia'₂ jmig₄,
 on₃jua'₅₄ rē'₂ a₂ton'₂ jniá₂ 'nia'₂ caun₂ 'éi'₃. ⁷ Con'₂
 juá'₅ jniá₂ 'ñi₃ó₃, 'nio₃ jniá₂ jua'₅₄ ca₂le₃jín₃ bá₄ dsa₂
 ñe'₂ lín₅ lia'₂ líng₅ 'ñi₃ó₃; la₁ con'₂ nē₅ tin₂ Diú₄
 jma₃quén₅ ma₂cuē'₃ dsa₂ 'a₂ lia'₂ niog₅ lín₅ dsa₂
 le₂jain₂ le₂jain₂.

⁸ Ju₁lia'₂ dsa₂ i₂tsá₃ gu₂ le₁jen'₂, ju₁lia'₂ dsa₂ mí₂
 i₂ma₂'ní₂ nē₃, juá'₅ jniá₂ 'e₂ guē₄ dse₃ jua'₅₄ co₂ñei'₅₄
 bá₄ tsá₃ ma₃jéin'₂ gu₂, tiain'₃ ju₁lia'₂ chan₂ jniá₂ tsá₃
 'ein₂ gua₅₄ quiang'₅₄. ⁹ La₁ia₁ nē₁jua'₂ tsá₃ qui'₅₄
 jmig₄ jmo₃ tió'₃ dsí₅ nē₃, ju₁jein'₅₄ gu₂, ia₁ ja₂lin₃
 guē₄ dse₃ bá₄ jéin'₂ co₂ñei'₅₄ gu₂, lia'₂ con'₂ guē₄ a₂ñi₄
 dsín'₂ 'ñiog₅.

¹⁰ La₁ juá'₅ jniá₂ juí₂ ca₂le₃jín₃ ju₁lia'₂ i₂ma₂tián'₅
 le₁jen'₂ gu₂, tsá₃ ma₃o₁tein'₅₄ rñin'₅₄ le₂jain₂ le₂jain₂.
 'Éi'₃ nē₅ on₃jua'₅₄ 'éi'₃ quió₃ jniá₂ 'ñi₃ó₃; 'éi'₃ quió'₅
 Te₁gui'₅₄ 'ñiog₅ bá₄ nē₅. ¹¹ La₁ nē₁jua'₂ chan₂ jan₂
 dsa₂ mí₂ ca₂téin₂ dsí₂i₂gu₂, ju₁gua₂ bá₄ tei₄ 'ñiog₅;
 o₃ ju₁'ei₅₄ bá₄ táng₃ caun₂ jág₁ quian'₅₄ dsí₂i₂gu₂ 'e₂.
 Le₂nē₅ bá₄ ju₁lia'₂ dsa₂ ñe'₂ táng₃, tsá₃ 'nió'₅ téin₂
 dsa₂ mí₂ quián₅.

¹² Juí₂ jniá₂ ju₁lia'₂ i₂sián'₂, (jág₁ quió₃ 'ñi₃ó₃,
 on₃jua'₅₄ 'éi'₃ quió'₅ Te₁gui'₅₄): Chi₂jua'₂ tsá₃ 'én₂ dsa₂
 mí₂ quián₅ ju₁lia'₂ jan₂ dsa₂ 'én₂ rñin'₅₄ jniog₄, la₁
 nē₁jua'₂ 'ñio₂ bá₄ dsí₅ dsa₂ mí₂ 'éi₂ guá₅ quiong'₅₄,

tsá₃ 'nió'₅ téi₂ rin'₅₄ jniog₄ 'éi₂. ¹³ O₃ chi₂jua'₂ dsa₂ ñe'₂ i₂tsá₃ 'én₂ lín₅ dsi₂i₂gu₂ jan₂ dsa₂ mí₂ i₂'én₂, la₁ nē₁jua'₂ 'ñio₂ bá₄ dsí₅ guá₅ quaiin'₅₄ dsa₂ mí₂ 'éi₂, ján₃ bá₄ tsá₃ ca₂tín₂ dsa₂ mí₂ téi₂ ján₃. ¹⁴ Ia₁ jui₁lia'₂ dsi₂i₂gu₂ i₂tsá₃ 'én₂ ně₃, ma₂jmo₅ bá₄ Diú₄ a₂lě₅ 'í₁ tē₂le₃ quian'₅₄ dsa₂ mí₂; dsa₂ mí₂ i₂tsá₃ 'én₂ ně₃, lě₅ bá₄ 'í₁ quián₅ Diú₄ tē₂le₃ quian'₅₄ dsa₂ ñe'₂ i₂'én₂ rin'₅₄ jniog₄. Jua'₅₄ mei'₂ tsá₃ le₂jaun₂, 'uín₂ chi'₂-guein₂ quián'₂ 'nia'₂ tsá₃ le₁jín₃. La₁ia₁, lia'₂ con'₂ tí₅ jág₁, ma₂ñio₅ bá₄ 'éi₂. ¹⁵ La₁ jui₁lia'₂ dsa₂ ñe'₂ o₃ dsa₂ mí₂ i₂tsá₃ 'én₂ ně₃, chi₂jua'₂ tion₅₄ 'nio₃ téin₂ riin'₅₄, jui₁tein₅₄ riin'₅₄. Tsá₃ lě₅ jua'₅₄ rē₂jnág₅ jui₅ quió'₅ dsa₂ i₂'én₂ rin'₅₄ chi₂jua'₂ le₂jaun₂. * Ia₁ ma₂tē₃ Diú₄ jniog₄ a₂le₃chong₂ le₁'ág₄ tei₄ dsi₅. ¹⁶ Ia₁, ċ'a₂lia'₂ ñi'₅₄ 'ne₂ dsa₂ mí₂, jua'₅₄ lé₂ long'₅₄ dsi₂i₂gog'₂? Le₂jaun₂ guē'₂ 'ne₂ dsa₂ ñe'₂, ċ'a₂ bá₄lia'₂ ñi'₅₄ jua'₅₄ lé₂ long'₅₄ dsa₂ mí₂ quiáng'₂?

¹⁷ Jñia'₅₄ lia'₂ jui₁i₂nio₄ dsa₂ le₂jain₂ le₂jain₂ jui₁lia'₂ niog₅ lě₅ jui₅ ma₂chei'₃ Te₁gui'₅₄, lia'₂ con'₂ lě₅ ma₂tē₅ Diú₄. 'Éi'₃ ně₅ cuē₅ jniá₂ ca₂le₃jín₃ guá'₅. ¹⁸ Chi₂jua'₂ i₂lín₅₄ ma₂le₁uín₁ lo₄ lia'₂ con'₂ jme₁ca₂rē₃'éin₂ ca₂tē₃ Te₁gui'₅₄, tsá₃ jui₁jme₂tsiín₃ léi₄ jaun₂. O₃ chi₂jua'₂ 'ein₂ ca₂rē₃'én₂ le₃quió'₅ Te₁gui'₅₄ tē₃ tsá₃ rē₂uín₄ quió'₅, tsá₃ jui₁guein₁₂ uín₃ quió'₅. ¹⁹ Ia₁ tsá₃ 'e₂ dsen₅₄ ta₁ jua'₅₄ rē₂uín₄ o₃ tsá₃ rē₂uín₄ quió'₅ dsa₂ te₁i₂nioi₅₄. A₂jme₃ti₃ 'éi'₃ quió'₅ Diú₄ bá₄ dsa₂ dsen₅₄ ta₁. ²⁰ Le₂jan₂ le₂jan₂ bá₄ dsa₂ ca₂tín₂ le₃chain₂ lia'₂ con'₂ lín₅ 'ñiog₅ lia'₂ con'₂ jme₁ca₂tē₃

* **7:15** lit. "Tsá₃ chi₁'ñe'₅₄ dsa₂ i₂'én₂ rin'₅₄ chi₂jua'₂ le₂jaun₂."

Te₁gui'₅₄. ²¹ Chi₂jua'₂ jme₁líng'₄ dsa₂ i₂jme₂ti₃ a₂tsá₃ 'liang'₅₄, lia'₂ con'₂ jme₁ca₂tě₃ Te₁gui'₅₄, tsá₃ jmo₂ 'i₅ 'au'₂ a₂jaun₂; la₁ chi₂jua'₂ ca₂cuín₃ jmig₄ a₂tsá₃ ma₃lég'₂ dsa₂ i₂jme₂ti₃ ta₁, ja₂lín₃ guě₄ dse₃ quio'₅₄ ju₁₅ jaun₂. ²² Ju₁lia'₂ dsa₂ i₂jme₁lín₄ i₂jme₂ti₅ ta₁ ne₄ dsa₂ lia'₂ con'₂ jme₁ca₂tě₃ Te₁gui'₅₄, la₁ rě₂ně₃ ně₃ ma₂lín₅ dsa₂ i₂jme₂ti₃ le₃ja₁con₂ Te₁gui'₅₄. Ján₃ bá₄ guě'₂ le₂jaun₂ ju₁lia'₂ dsa₂ i₂tsá₃ 'ein₂ ne₄ jme₁jme₂ti₃ lia'₂ con'₂ jme₁ca₂tě₃ Te₁gui'₅₄ la₁ rě₂ně₃ guě'₂ ně₃, ma₂lín₅ dsa₂ i₂jme₂ti₃ ta₁ ne₄ Cristo. ²³ I₂ca₂quín₁ 'mu'₅₄ lín₃ bá₄ 'nia'₂ ca₂láu₂ Cristo. Jaun₂ tsá₃ ma₃cuín₅ 'nia'₂ jmig₄ jua'₅₄ a₂jme₁ti'₄ guě₄ ne₄ dsa₂ mi₂güí₃. ²⁴ Le₂ně₅ bá₄ jaun₂, 'nia'₂ rin'₅₄ jniog₄, ju₁tión'₂ bá₄ 'nia'₂ lia'₂ jme₁líng'₄ lia'₂ con'₂ jme₁ca₂tě₃ Diú₄ 'nia'₂.

²⁵ Ně₃ ně₃, ju₁lia'₂ dsa₂ mi₄ i₂tsá₃ dsa₂ ŋe'₂ ma₂jio₅, tsá₃ 'e₂ 'éi'₃ ma₂ŋi₂ jniá₂ ja₁con₂ Te₁gui'₅₄. La₂ cuě₅₄ jniá₂ jág₁ lia'₂ con'₂ ŋí'₂ dsi₃, co₂'nió'₄ jan₂ i₂tí₅ jág₁ quió'₅ ia₁ a₂ŋéi₂ dsi₅ Te₁gui'₅₄. ²⁶ Jaun₂ líng₂, ja₂lín₃ guě₄ dse₃ jua'₅₄ co₂ŋei'₅₄ guě₄ ju₁chan'₂ bá₄ 'nia'₂ 'a₂ lia'₂ lě₅ chang'₂, 'uig₅₄ ia₁ 'ŋio₅ lín₃ cha₂ o₂me'₅₄ dsi₅ jmig₄ rě₂ně₃. ²⁷ Chi₂jua'₂ ma₂jen'₂ gog'₂, tsá₃ jmó'₂ 'au'₂ jua'₅₄ téng'₄ ríng'₂. Chi₂jua'₂ tsá₃ ma₂jen'₂ guě'₂ gog'₂, tsá₃ lě₁'nág'₂ dsa₂ mí₂ i₂ne'₅₄ quiang'₅₄. ²⁸ La₁ ně₁jua'₂ ca₂jen'₂ guě'₂ gog'₂, on₃jua'₅₄ 'e₂ dso₄ jaun₂. Le₂jaun₂ bá₄ ján₃ ju₁lia'₂ dsa₂ mi₄, chi₂jua'₂ ca₂jéin'₂ gu₂, on₃jua'₅₄ 'e₂ dso₄ jaun₂ ján₃. La₁ jnia'₅₄ lia'₂ a₂jaun₂ bá₄ juá'₅ jniá₂, le₃chain₂ quian₅ o₂me'₅₄ dsi₅ mi₂güí₃ la₂. A₂jaun₂ tsá₃ jme₁'nio₃ jniá₂ dsi₂ŋí'₂ 'nia'₂.

29 A₂la₂ bá₄ 'nio₃ jniá₂ juá'₄, r_{in}'₅₄ jniog₄. Tsá₃ ma₃uě₂ le₃'ag₄ a₂dsióg₄ Jmig₄ quió'₅ Te₁gui'₅₄. 'Uig₅₄ jaun₂, juíg₂ jniá₂ 'nia'₂: nē₃ tē₂le₃ ne₄ jui₅, ca₂le₃jín₃ i₂ma₂tián'₅ quian'₅₄ dsa₂ mí₂, jui₁le₂chain₂ nē₂jag₄ bá₄ a₂tsá₃ dsa₂ mí₂ quiáin₅ chan₂. 30 Jui₁lia'₂ dsa₂ i₂chan₂ qui₂le₁qui'₂ dsí₅, jui₁jmo₁₂ bá₄ dsí₅ nē₂jag₄ bá₄ a₂tsá₃ 'e₂ o₂i₁ dsí₅ chain₂. Le₂jaun₂ guē'₂ jui₁lia'₂ dsa₂ i₂jmo₅ 'io'₂, ca₂tiín₂ bá₄ jmo₃ nē₂jag₄ bá₄ a₂tsá₃ dse₃ chain₂. Le₂jaun₂ guē'₂ ján₃ jui₁lia'₂ dsa₂ i₂qui₂lá₅ 'e₂ lá₅, jui₁jmo₁₂ bá₄ dsí₅ nē₂jag₄ bá₄ on₃jua'₅₄ a₂quió'₅ 'e₂ ma₂lá₃. 31 Le₂jaun₂ guē'₂ jui₁lia'₂ dsa₂ i₂jmo'₂ ta₁ a₂cha₂ mi₂güig₃ la₂, jui₁jmo₁₂ bá₄ dsí₅ nē₂jag₄ bá₄ a₂tsá₃ chi₂quai₂₃ jmig₄ a₂jaun₂. Ia₁ ma₂ja₂quián₃ dsí₃ñí₂ bá₄ lia'₂ lē₅ mi₂güig₃ la₂.

32 Jaun₂ 'nio₃ jniá₂ tsá₃ tón'₂ 'nia'₂ qui₂le₁quian'₄ 'nia'₂ o₂i₁ dsí₅. Ia₁ jui₁lia'₂ jan₂ dsa₂ ñe'₂ i₂con'₂ 'ñio'₂ i₂tsá₃ dsa₂ mí₂ quian'₅₄, 'i₅ dsí₅ tē₂le₃ quió'₅ Te₁gui'₅₄, ton'₂ jmo₂₃ bá₄ a₂'ñio₂ dsí₅ 'éi₂. 33 Ia₁ jui₁lia'₂ dsa₂ i₂jen'₂ gu₂ nē₃, 'ñio₅ lín₃ guē₄ dsan₂ dsí₅ jui₁lia'₂ 'e₂ a₂niog₅ cha₂ mi₂güig₃, 'a₂ lia'₂ jmo₃ a₂'ñio₂ dsí₅ 'io₅₄ quiáin₅. 34 Jma₃quén₅ bá₄ dsí₂jio₅ dsí₅. Jui₁lia'₂ jan₂ 'io₅₄ i₂tsá₃ gu₂ ma₂rē₂jen'₂, o₃ jan₂ dsa₂ mi₄ 'e₂, 'ñio₅ guē₄ dsan₂ dsí₅ tē₂le₃ o₄quió'₄ Te₁gui'₅₄, a₂'nio₃ léin₂ 'í₁ le₃ja₁con₂ Diú₄, lia'₂ le₃quió'₅ ni₁ñi₁₂, lia'₂ le₃quió'₅ jme₂dsí₂ nē₃. La₁ jui₁lia'₂ dsa₂ mí₂ i₂ma₂chan₂ dsí₂i₂gu₂ guē'₂ nē₃, 'ñio₅ lín₃ guē₄ dsan₂ dsí₅ jui₁lia'₂ 'e₂ niog₅ cha₂ mi₂güig₃, 'a₂ lia'₂ jmo₃ a₂'ñio₂ dsí₅ dsa₂ ñe'₂ quiáin₅.

35 A₂dse₃ quián'₂ bá₄ 'nia'₂ juá'₅ jniá₂ le₂nē₅, on₃jua'₅₄ rē'₂ a₂jni₄ jniá₂ quián'₂ 'nia'₂, tē₂le₃ ia₁jaun₂

le₃chan'₂ 'nia'₂ lia'₂ con'₂ dsi₂ten₅₄, ia₁jaun₂ lé₂
jang'₅₄ 'nia'₂ 'au'₂ ne₄ Te₁gui'₅₄ tē₃ tsá₃ jnág₅ cha₂.

36 La₁ chi₂jua'₂ 'ein₂ chan₂ jan₂ dsa₂ mi₄
i₂jme₁ma₂lí₅₄ já_{g1} a₂jéin'₂ gu₂ quiain'₅₄, ton'₂
ma₂ca₂ñí₂ jmíg₄ i₁jéin'₂ gu₂, chi₂jua'₂ lín₂ a₂tsá₃
jmo₂₃ lia'₂ dsi₂ten₅₄ ja₁con₂ 'éi₂, chi₂jua'₂ le₂jaun₂
dsi₂ten₅₄ lé₂ a₂jéin'₂ gu₂, ju₁jmo₁₂ bá₄ 'a₂ lia'₂ 'ñio₂
dsí₅; lé₂ bá₄ qui₂jéin'₂ gu₂, ia₁ on₃jua'₅₄ 'e₂ dso₄ jaun₂.

37 La₁ ju₁lia'₂ dsa₂ i₂ma₂'ei₅ caun₂ dsí₅, on₃jua'₅₄
a₂'nió'₅ 'ein₂ qui₂chi₂quióng₂ jmíg₄, tē₂le₃ qui'₅₄
jmíg₄ jmo₃ 'í₁ 'ñiog₅, a₂dse₃ bá₄ jaun₂. 38 Jaun₂ le₂nē₅
bá₄, ju₁lia'₂ dsa₂ i₂jén'₂ gu₂, a₂dse₃ bá₄ jmo₂₃; la₁ia₁
ju₁lia'₂ i₂tsá₃ jén'₂ gu₂ ja₂lín₃ gué₄ dse₃ jmo₂₃.†

39 'I₄ 'éi'₃ jiog₃ dsa₂ mí₂ jñiai₃ dsi₂i₂gu₂ 'a₂ con'₂
jñia'₅₄ jmíg₄ chan₂ 'éi₂. Nē₁ca₂jon₃ dsi₂i₂gu₂ gué'₂ nē₃,
jaun₂ gué₄ le₃jñi₅₄ guá₃ táng₃ jén'₂ gu₂ chi₂jua'₂ 'ein₂
quiain'₅₄ 'nio₃, la₁ lē₃ jua'₅₄ lín₅ dsa₂ 'én₂ 'éi₂. 40 La₁
ja₂lín₃ gué₄ dse₃ le₃chain₂ jua'₅₄ co₂ñei'₅₄ tsá₃ ma₃gu₂
jén'₂ táng₃. Le₂nē₅ con'₂ lín₂ jniá₂ bá₄. Qui₂dsi₂jio₅
dsi₃ con'₂ lē₅ jio₅ Jme₂dsí₂ quián₅ Diú₄ bá₄, lín₂ jniá₂.

8

Ju₁lia'₂ ñi₄ já'₂ a₂qui₂rē₂jen'₅₄ ne₄ diú₄ lag₄

† 7:38 o₃, “La₁ chi₂jua'₂ 'ein₂ chan₂ jan₂ ja₁míg₄ i₂jē₁ca₂ñi₅ ñi₂ a₂jéin'₂
gu₂, chi₂jua'₂ le₂jaun₂ lín₂ dsa₂ a₂dsi₂ten₅₄ gué₄, ju₁jmo₅₄ bá₄ 'a₂ lia'₂
'ñio₂ dsí₅, lé₂ bá₄ cuiñ₃ ja₁míg₄ a₂jéin'₂ gu₂, ia₁ on₃jua'₅₄ 'e₂ dso₄ jaun₂.
La₁ nē₁jua'₂ chan₂ gué'₂ i₂lín₂ on₃jua'₅₄ a₂'nió'₅ 'ein₂ qui₂chi₂quióng₂
jmíg₄, 'nio₃ a₂tsá₃ gu₂ jén'₂ bá₄ ja₁míg₄, caun₂ bá₄ 'ei₅ dsí₅ a₂tē₃gua₄
ja₁míg₄ le₂jaun₂ tē₃ tsá₃ gu₂ jén'₂, a₂dse₃ bá₄ jaun₂. Jaun₂ le₂nē₅ bá₄,
'ein₂ qui₂cuiñ₅ ja₁míg₄ qui₂jen₂ gu₂, a₂dse₃ bá₄ jmo₂₃. Le₂jaun₂ gué'₂
ju₁lia'₂ i₂tsá₃ cuiñ₅ ja₁míg₄ a₂jen'₂ gu₂, ja₂lín₃ gué₄ dse₃ bá₄ ján₃.”

1 La₂ juá'₄ táng₃ jui₁lia'₂ cuente quió'₅ η₁₄ já'₂ a₂qui₂jén'₅ dsa₂ ne₄ diú'₄ lag₄. Dsón'₂ bá₄ jaun₂ cha₂ a₂ne₄ jniog₄, ca₂le₃jág₃. Jui₁lia'₂ a₂η₁₅ dsa₂ ně₃, a₂jaun₂ bá₄ jmo₅ a₂róin₂; la₁ jui₁lia'₂ a₂'nio₃ dsa₂ riin'₅₄, a₂jaun₂ bá₄ jmo₅ a₂dsi₂cóin₃. ²Chi₂jua'₂ chan₂ i₂juá'₂ ma₂tiin₂, tsá₃ bá₄ guě'₄ 'e₂ ma₂tiin₂ lia'₂ con'₂ dsi₂ten₅₄ le₃tiin₂. ³Chi₂jua'₂ 'ein₂ tē₃dsón'₂ 'nioi₃ Diú₄, i₂cuin₅ bá₄ Diú₄ dsa₂ le₂'éi₂.

4 Jaun₂ ně₃, jág₁ jui₁lia'₂ a₂qui₂g'₂ dsa₂ η₁₅ a₂ma₂tē₁no₁ nē₂jén'₃ dsa₂ ne₄ diú'₄ lag₄: ne₄ bá₄ jniog₄ jaun₂, 'i₁caun₂ tsá₃ 'e₂ quen₅ jui₁lia'₂ diú'₄ lag₄ ne₄ gua'₅₄ 'uē₃ la₂, ia₁ jnia'₅₄ lia'₂ jan₂ bá₄ Diú₄ chan₂.

⁵Jui₁'a₂ guě'₃ la₂ chan₂ i₂tē'₂ dsa₂ diú'₄ guei'₅₄ i₂juí₃g₃ quian'₅₄ ne₄ gua'₅₄ 'uē₃, (ia₁ tē₃dsón'₂ lē₅ le₂jaun₂ ně₃, a₂niog₅ chan₂ juin₅ “diú'₄”, ján₃ guě'₂ le₂jaun₂ juin₅ i₂gon₂ ján₃), ⁶la₁ tē₂le₃ quián₂ jniog₄ ně₃, jnia'₅₄ lia'₂ jan₂ bá₄ Diú₄ chan₂, i₂lín₅ Jmei₂ jniog₄, i₂ca₂jmo₃ ca₂le₃jě₃ 'e₂ niog₅ cha₂. Le₂jaun₂ guě'₂ jniog₄ ně₃ chong₂ o₄quió'₄ 'éi₂. Jnia'₅₄ lia'₂ jan₂ tan₅₄ bá₄ i₂gon₂, i₂lín₅ Jesucristo. Tē₂le₃ ne₄ o₄quió'₄ 'éi₂ bá₄ ca₂lě₃ ca₂le₃jě₃ a₂cha₂, ca₂tē₂ jniog₄ guio₅₄ ně₃, chong₂ tē₂le₃ quian'₅₄ 'éi₂.

7 La₁ tsá₃ ca₂le₃jín₃ η₁₅ a₂ně₅. I₂chan₂ bá₄ guě'₄ i₂qui₂ma₂tiin₂ dsí₅ jme₂gain₃ diú'₄ lag₄, jmo₂₃ bá₄ guě'₄ dsí₅ jui₁lia'₂ jme₁qui₂g'₂ η₁₅ a₂ma₂jáu'₅ ne₄ diú'₄ lag₄, 'uig₅₄ ia₁ a₂'uan₅₄ jme₂dsí₂ quió'₅, tsá₃ caun₂ a₂qui₂dsi₂jein₃ dsí₅, ma₂ca₂rě₃'iog₅ bá₄ jme₂dsí₂ quió'₅. ⁸Dsón'₂ bá₄, on₃jua'₅₄ o₄quió'₄ má₃ náu₂ jniog₄ rē₂ ne₄ Diú₄. Ia₁ on₃jua'₅₄ a₂náu₂ rē₂ guě'₄ ne₄ 'éi₂, ně₃jua'₂ ca₂que₅₄, on₃ guě'₂ jua'₅₄ a₂tsá₃ rē₂ tióg₂ ně₃jua'₂ tsá₃ ca₂que₅₄ guě'₂ táng₃. ⁹La₁ia₁ jag₄

de₂ 'nia'₂, ia₁ con₂ tsá₃ ñó₅ në₁qui₂ca₂sén'₂ ju₁lia'₂
 i₂'uan₅₄, 'uig₅₄ ia₁ a₂rë₂na₄ ju₁ quián'₂ 'nia'₂ a₂lé₂
 le₃quío'₅₄. ¹⁰ Chi₂jua'₂ ñi'₅₄ 'ne₂ rë₂ 'a₂ lia'₂ dsi₂ten₅₄
 jmó'₂, në₁jua'₂ ca₂jág₂ jan₂ rin'₅₄ i₂'uan₅₄, i₂tsá₃ lin₄
 rë₂ ñí'₂ dsí₅, a₂ñéi'₂ quë'₂ ja₁tión₂ diú₄ lag₄, ¿'e₂ bá₄
 lé₂ në₁jua'₂ ca₂tiá₂ dsí₅ 'éi₂ guë'₃ a₂ma₂rë₂jen'₅₄ ne₄
 diú₄ lag₄? ¹¹ O₄quío'₄ a₂ñi'₅₄ 'ne₂ jaun₂, dsi₃ 'én₂ ríng'₂
 i₂'uan₅₄ guë'₄ në₃. Ca₂jon₃ Cristo o₄quío'₄ 'éi₂ bá₄ ján₃.
¹² Ia₁ në₁jua'₂ jmo'₂ 'nia'₂ a₂tsá₃ caun₂ a₂qui₂dsi₂jein₃
 dsí₅ ríng'₂ i₂'uan₅₄, 'nau'₂ 'nia'₂ dso₄ tē₂le₃ ne₄ Cristo.
¹³ Jaun₂ lē₃, chi₂jua'₂ léi₄ 'ñi₃ bá₄ jniá₂ jmo₂₃ a₂tan'₂
 dso₄ ríng'₃ o₄quío'₄ 'e₂ a₂guë'₂, ja₂lin₃ guë'₄ dse₃ o₁líg'₂
 jmig₄ tsá₃ ma₃quig'₅₄ ñí₅, ia₁jaun₂ tsá₃ ma₃tiáin'₃
 dso₄.

9

Ju₁lia'₂ a₂ca₂tín₂jan₂ dsa₂ i₂chen₄ quián₅ Jesús

¹ Dsón'₂ bá₄ rë₂na₄ ju₁ a₂ca₂tíng₂ ca₂le₃jě₃ con'₂
 lē₅ ca₂tíng₂ ia₁ líng₅ dsa₂ i₂chen₄, ia₁ ma₂ca₂jing₅₄
 bá₄ Jesús i₂lín₅ Te₁gui'₅₄ quián₂. Guion'₅₄ bá₄ 'nia'₂
 në₃, líng'₅ co₂'nió'₄ ta₁ a₂rë₂jniá₂ quió₃, tē₂le₃ quió'₅
 Te₁gui'₅₄. ² 'An₁ chan₂ bá₄ i₂lín₅₄ jmo₅ dsí₅ a₂tsá₃ lín₅
 jniá₂ dsa₂ i₂chen₄ quián₅ Te₁gui'₅₄. La₁ 'nia'₂ në₃,
 ca₂tín'₂ bá₄ 'nia'₂ jmó'₂ 'au'₂, le₂nē₅ líng₅, ia₁ 'nia'₂ bá₄
 líng'₅ i₂jáng'₅ léi₄ ta₁ quió₃, a₂tē₃dsón'₂ líng₅ jan₂ dsa₂
 i₂chen₄ quián₅ Te₁gui'₅₄.

³ Ju₁lia'₂ dsa₂ i₂con₂ 'í₁ ja₁con₂ jniá₂, le₂la₂ bá₄ lē₅
 jág₁ a₂jein'₅₄ jniá₂ quió'₅: ⁴ ¿o₃ bá₄ tsá₃ ca₂tín₂ jniá₂
 gue₅₄ ca₂le₃jě₃ 'e₂ cuë₅ dsa₂ a₂guë'₅₄, o₃ 'e₂ cuë₅ dsa₂
 a₂gui'₅₄ ján₃? ⁵ ¿o₃ bá₄ tsá₃ ca₂tág₂ jnia'₅₄ jniá₂ jan₂

dsa₂ m'í₂ i₂én₂ i₂jen'₄ jnia'₅₄ gu₂ quian'₅₄, ju₁lia'₂ jmo₅
 dsa₂ i₂chen₄ sián'₂ quian'₅₄ guë'₂ chi'₂ rin'₅₄ Te,gui'₅₄
 'ñiog₅, ju₁lia'₂ chan₂ Pe₄* në₃? ⁶ ¿O₃ bá₄ lín'₂ 'nia'₂,
 jñia'₅₄ lia'₂ jniá₂ quian'₅₄ Bernabé ca₂tág₂ jmó₁ ta₁
 a₂'nióg₂ a₂dsi₃ñág₂? ⁷ ¿Ein₂ bá₄ 'lióg₂ jme₂tí₃ chi₂jua'₂
 'ñiog₅ bá₄ qui₃ 'liain'₅₄ a₂dsi₂ñi₂? ¿I₂'ein₂ bá₄ 'éi₂
 i₂chéin'₅ ni₁uing₂ uvas jua'₅₄ tsá₃ guë'₃ guë'₂ m'íg₂
 jaun₂? O₃ ju₁lia'₂ dsa₂ i₂jmo₅ ta₁ jme₂can'₅₄ chein₄
 lau₂, ¿Ján₃ guë'₂ tsá₃ lé₂ le 'ín'₂ dsí'₁ já'₂? ⁸ Tsá₃ o₁len'₂
 'nia'₂ jua'₅₄ jniá₂ a₂lë₁juá'₅ con'₂ lë₂ dsí₃ 'ñió₃; já₃
 bá₄ le₂në₅ juá'₂ ne₄ Si₂ 'Éi'₃. ⁹ Ia₁ chi₁ton₅ ne₄ Si₂
 'Éi'₃ quió'₅ Moisés le₂la₂: “Tsá₃ tó'₂ 'nia'₂ 'nei₅₄ mi₂'o₄
 ca₁ju₁i₅ i₂jmo₅ ta₁ i₂chén₂ m'íg₂ trigo.”† ¿A₂'i₅ dsí₅ Diú₄
 ca₁ju₁i₅ a₂juá'₂ le₂jaun₂? ¹⁰ ¿O₃ a₂juá'₂ o₄quián₂ jniog₄
 bá₄? Dsón'₂ bá₄ o₄quián₂ jniog₄ bá₄ ca₂i₃to'₅₄ 'éi'₃
 në₅ ne₄ Si₂. Ia₁ le₂jaun₂ bá₄ lë₅ ju₁lia'₂ dsa₂ i₂quia'₂
 'uë₃ quian'₅₄ guë'₂ dsa₂ i₂cág'₅ m'íg₂ trigo. Tsá₃
 a₁jaun₂ jua'₅₄ a₂lë₁jmo₅ dsa₂ 'éi₂ ta₁ a₂jmo₂₃, jua'₅₄
 tsá₃ 'ín₂ dsí₅ a₂ca₂tín₂ a₂cág'₃ jaun₂. ¹¹ Jaun₂ le₂në₅,
 chi₂jua'₂ jaun₂ ma₂jñí₁ jnia'₅₄ jë₄ quián'₂ 'nia'₂ caun₂
 jon₂ a₂gu₂dsí₂, ¿a₁lín₃ 'ñio₅ lín'₂ 'nia'₂ jua'₅₄ a₂cag'₄
 ca₂la₂ ja₁con'₂ 'nia'₂ ju₁lia'₂ a₂dsi₃ñág₂ jnia'₅₄ të₁lia'₂
 chong₂? ¹² Chi₂jua'₂ ca₂tín₂ dsa₂ sián'₂ a₂jme₁'oin'₄
 'nia'₂, 'ë₂ guë'₄ bá₄ ca₂tág₂ jnia'₅₄.

La₁ tsá₃ 'e₂ ma₂ca₂chi₁quian₁ jnia'₅₄ 'nia'₂ jm'íg₄
 jua'₅₄ a₂mi₂ a₂ca₂tág₂ jnia'₅₄ jaun₂. Ma₂jmó₁ bá₄
 jnia'₅₄ tió'₃ dsí₅ ca₂le₃jë₃ ia₁jaun₂ tsá₃ lë₅ jua'₅₄ cha₂
 jnág₅ a₂qui₂dsi₃'ag₅ já₁ dse₃ quió'₅ Cristo. ¹³ ¿Tsa₁
 ñi'₅₄ 'nia'₂, ju₁lia'₂ dsa₂ i₂niog₅ ne₄ a₂jñió₅ dsí₂néi₂

* 9:5 griego: Cefas. † 9:9 Deuteronomio 25:4.

guá'⁵, guě'⁵ ju_ilia'² a₂cha₂ dsi₂néi₂ guá'⁵; ju_ilia'² dsa₂ i₂tion'⁵⁴ qui₂jme₂ti₃ ne₄chei₂ ně₃, já_n₃ guě'² quein'⁵⁴ gue₂₃ a₂jén'⁵ ne₄chei₂? ¹⁴ Já_n₃ bá₄ le₂jaun₂ ca₂jmo₃ Te₁gui'⁵⁴ 'éi'³, ju_ilia'² dsa₂ i₂nio₄ qui₂'ě₂ já_g₁ dse₃, quian'⁵⁴ ta₁ jaun₂ le₃chain₂. ¹⁵ La₁ jniá₂ ně₃, tsá₃ 'e₂ ma₂ca₂chi₁quian₁ jniá₂ jmig₄ 'nia'² jua'⁵⁴ a₂tion⁵⁴ lé₂ a₂ca₂tíng₂. On₃ guě'² jua'⁵⁴ jaun₂ jmo₅ jniá₂ si₂ la₂ ne'⁵⁴ 'nia'² jua'⁵⁴ a₂'ín₂ dsi₃ a₂jmó'² le₂jaun₂ quian'⁵⁴ jniá₂. ¡Tě₂le₃ quió₃ jniá₂, ja₂lin₃ guě'⁴ dse₃ jua'⁵⁴ jóng₂, lia'² con'² guě'⁴ ně₃jua'² 'ein₂ jné₅ ju_i₅ a₂tsá₃ ma₃jme₁ti₁₂ guě'⁴ ta₁ quió₃ a₂jmo₂₃ táng'⁵!

¹⁶ La₁ia₁, ju_ilia'² jme₁'ě₅ jniá₂ já_g₁ dse₃, tsá₃ ca₂tín₂ jniá₂ dsia₅₄ já_g₁ tá'⁵, ia₁ tion⁵⁴ 'nió'⁵ ca₂tíng₂ bá₄ qui₂'ě₄ dsa₂ já_g₁ dse₃. ¡E₂ guě'⁴ ju_ig₂ jniá₂ ně₃jua'² tsá₃ ma₃ca₂'ě₃ jniá₂ já_g₁ dse₃! ¹⁷ Ia₁ ně₃jua'² 'ě₅ jniá₂ já_g₁ dse₃ a₂'ñio₂ dsi₃ 'ñió₃, gue₅₄ bá₄ 'liang'⁵⁴. La₁ ně₃jua'² tsá₃ jmo₂₃ a₂'ñio₂ dsi₃ 'ñió₃, a₂lě₁jme₂tí₁ bá₄ jniá₂ ta₁ a₂niog₅ gu₃ jmo₅₄. ¹⁸ ¿Na₅ bá₄ 'lian'⁵⁴ jniá₂ jaun₂ ně₃? A₂jaun₂ bá₄ 'lian'⁵⁴ jniá₂: a₂lé₂ qui₁'ě₄ jniá₂ já_g₁ dse₃ ja₁con₂ dsa₂, a₂tsá₃ 'lia'⁵⁴ can⁵⁴, on₃jua'⁵⁴ chi₁quiang₁₂ jmig₄ gue₅₄ a₂ca₂tíng₂.

¹⁹ O₁jnia'⁵⁴ la₂ jin⁵⁴ jniá₂, on₃jua'⁵⁴ chan₂ 'ein₂ ne₄ jme₂tí₁, la₁ jmo₅₄ jniá₂ dsi₃ ně₂jag₄ bá₄ i₂ma₂rě₂ 'ñe'⁵⁴ jniá₂ quián₅ ca₂le₃jin₃, ia₁jaun₂ lé₂ le₃léi₂ guě'⁴ juin₅ dsa₂ tě₂le₃ quió'⁵ Cristo. ²⁰ Ju_ilia'² jme₁'eng⁵⁴ quiang'⁵⁴ dsa₂ judíos, jmo₂₃ dsi₃ ně₂jag₄ bá₄ líng₅ co₂'nió'⁴ jan₂ dsa₂ judío, ia₁jaun₂ cuin₃ jmig₄ a₂jóin₄ jniá₂. Ju_ilia'² ja₁con₂ dsa₂ i₂tion'⁵⁴ 'Éi'³ quió'⁵ Moisés, jmo₅₄ jniá₂ dsi₃ ně₂jag₄ bá₄ a₂'eng⁵⁴ 'Éi'³, ia₁jaun₂ jón₄ jniá₂ ju_ilia'² i₂tion'⁵⁴ 'Éi'³, (o₁jnia'⁵⁴ la₂

tsá₃ 'Éi'₃ jaun₂ 'eng₅₄ tē₃dsón'₂). ²¹ Tē₂le₃ quió'₅ guē'₂ jui₁lia'₂ dsa₂ i₂tsá₃ tion'₅₄ 'Éi'₃ ně₃, ján₃ bá₄ co₂ring₂ quian'₅₄ dsa₂ 'éi₂ jmo₂₃ dsi₃, ia₁jaun₂ jóng₄ jui₁lia'₂ dsa₂ i₂tsá₃ tion'₅₄ 'Éi'₃, (o₁jñia'₅₄ la₂ tsá₃ lon₄ jniá₂ ne₄ 'Éi'₃ quió'₅ Diú₄, a₂'eng₅₄ bá₄ 'éi'₃ quió'₅ Cristo). ²² Jui₁lia'₂ ja₁con₂ dsa₂ 'uan₅₄ i₂tsá₃ lin₄ ma₂'én₂ rē₂, ján₃ bá₄ le₂jaun₂ jmo₂₃ dsi₃ líng₅, ia₁jaun₂ jóng₄ jui₁lia'₂ i₂'uan₅₄. Ja₁con₂ ca₂le₃jín₃ dsa₂ ma₂jmo₃ jniá₂ dsi₃ a₂co₂ring₂ quian'₅₄ ca₂lē₃jín₃, ia₁jaun₂ cuin₃ jmig₄ a₂lé₂ le₃lión₂ i₂lin₅₄. ²³ Ca₂le₃jě₃ a₂ně₅ jmo₅ jniá₂ o₄quió'₄ jág₁ dse₃, ia₁jaun₂ bá₄ quen'₅₄ jniá₂ tē₂le₃ quian'₅₄ jág₁ dse₃.

²⁴ ¿Tsa₁ ñi'₅₄ 'nia'₂ jui₁lia'₂ dsa₂ i₂i₂nio₄ co₂chi'₅₄ jme₁co₂₃, ca₂le₃jín₃ bá₄ 'éi₂ i₂nioi₅₄, la₁ i₂jan₂ tan₅₄ jui₁lia'₂ i₂lí'₂ bá₄, gue₅ premio? Le₂jaun₂ bá₄ 'nia'₂ ján₃, quen'₂ bí₂ o₂nóg'₅ co₂chi'₅₄ ia₁jaun₂ guéi'₁ 'nia'₂ premio. ²⁵ Ca₂le₃jín₃ dsa₂ i₂jme₂tin₅ ia₁ cha₂ ja₁lé₄ jág₁ a₂dsi₃cáu₂, jmo₂₃ 'í₁ 'ñiog₅, ia₁jaun₂ bá₄ lí'₂ caun₂ corona a₂jñiog₅ co₂'na₂. La₁ jniog₄ ně₃ quen'₂ bí₂ léi₂ caun₂ corona a₂jñiog₅ co₂tan₅₄ bá₄. ²⁶ Jaun₂ le₂ně₅, 'ñió₃ jniá₂ ně₃, on₃jua'₅₄ a₂lē₁i₂ñi₄ jniá₂ co₂chi'₅₄; jaun₂ jme₁quín'₂ jniá₂, on₃jua'₅₄ a₂lē₁dsi₂dsí₂ ja'₂. ²⁷ Tē₂le₃ jma'₄ cuē₅ uig₅ ñi₃ 'ñió₃, ně₂jag₄ bá₄ a₂rē₂'ñe'₅₄, con'₂ tsá₃ ñó₅ ně₁jua'₂ tē₁tsing'₄ 'lig'₅₄ 'ñió₃, lia'₂ con'₂ jme₁ca₂jme₁ting₅ i₂sián'₂.

10

To'₂ jág₁ a₂tsá₃ jme₃gan₃ dsa₂ diú₄ lag₄

¹ Tsá₃ 'nio₃ jniá₂ jua'₅₄ a₂tsá₃ ñi'₅₄ 'nia'₂ rin'₅₄ jniog₄, a₂jme₁tion'₅₄ dsa₂ can'₅₄ quián₂ jnia'₅₄ ma₂líg'₂ né'₃

jnei₅, jaun₂ guě₄ ca₂ŋi₃ ca₂le₃jín₃ Jmi₁ŋí'₄ Guéin₂.
² Ca₂tón'₂ dsa₂ co₂lě₅ ca₂le₃jín₃ quian'₅₄ Moisés jě₄
 jnei₅ quian'₅₄ jě₄ jmi₁ŋí'₄ ně₃. ³ Le₂jaun₂ bá₄ ján₃,
 ca₂guě'₃ co₂dsia₅ ca₂le₃jín₃ má₃ a₂gu₂dsí₂; ⁴ ca₂'in'₃
 jmig₂ a₂gu₂dsí₂ ján₃. Ia₁ ca₂'in'₃ jmig₂ a₂ca₂'ia₂ dso'₂
 ni₁'lau₂ a₂gu₂dsí₂ jaun₂ a₂ca₂jme₃quiong'₅₄ ca₂le₃jě₃
 jmig₄ tioin'₅₄ jui₅. Ni₁'lau₂ jaun₂ ně₃, Cristo bá₄ 'éi₂.
⁵ La₁ia₁, mei'₂ tsá₃ le₃jín₃ dsa₂ 'éi₂ ně₃, tsá₃ ca₂jmo₃
 a₂ŋio₂ dsí₅ Diú₄. Jaun₂ ne₄ 'uig₅₄ jaun₂, qui₂l₃ga'₅₄
 ni₁ŋi₁₂ 'uě₃ quein₂ co₂'ŋiog₅ jaun₂.

⁶ Ca₂le₃jě₃ a₂ně₅ ca₂lě₃ ia₁jaun₂ lě₅ caun₂ jág₁
 a₂jáng'₅ léi₄ quián₂ jniog₄ jmig₄ ně₃, ia₁jaun₂ tsá₃
 jmó₁ jniog₄ 'ín₅ dsí₅ ja₁con₂ a₂'lig'₅₄, jui₁lia'₂ ca₂jmo₃
 dsa₂ 'éi₂ 'ín₅ dsí₅. ⁷ Jaun₂ juig₂ jniá₂ 'nia'₂, tsá₃
 jme₁gan'₃ 'nia'₂ diú₄ lag₄, jui₁lia'₂ ca₂jmo₃ i₂lín₅₄ dsa₂
 'éi₂; jui₁lia'₂ juá'₂ ne₄ Si₂: “Ca₂tián'₂ dsa₂ ca₂guě'₃
 qui₂ca₂'in'₃ ně₃, jaun₂ guě₄ qui₂ca₂nau₂, ca₂co₃.”*

⁸ Tsá₃ ca₂tág₂ jniog₄ 'nióg₁ dso₄ jua'₅₄ nió'₄ jniog₄ jág₁
 quian'₅₄ jui₁'ein₂ guě₃, jui₁lia'₂ ca₂jmo₃ i₂lín₅₄ dsa₂
 'éi₂. Ne₄ 'uig₅₄ jaun₂, quian'₅₄ co₂jmig₄ ca₂dsan₃ con'₂
 guióg₂-ni₅ mei₅ dsa₂ 'éi₂. ⁹ On₃ guě'₂ ca₂tág₂ jniog₄
 a₂quiong₅₄ táu₂ Te₁gui'₅₄ jui₁lia'₂ ca₂jmo₃ i₂lín₅₄ dsa₂
 'éi₂, jaun₂ qui₂ca₂dsain₃, qui₂ca₂cag'₂ dsí₂mi'₂. ¹⁰ On₃
 guě'₂ chi₁'ín'₄ 'nia'₂ uig₅ Diú₄, jui₁lia'₂ ca₂jmo₃ i₂lín₅₄
 dsa₂ 'éi₂, jaun₂ ca₂chen₃ Diú₄ ángel i₂quian₅ 'mú₃,
 ca₂jme₃dsiain₂₃ dsa₂ 'éi₂.

¹¹ Le₂ně₅ bá₄ ca₂l₃ŋí₂ dsa₂ 'éi₂, ia₁jaun₂ jióg'₂ 'í₁
 lě₅ léi₄; ca₂l₃to'₅₄ ne₄ Si₂ co₂'nió'₄ caun₂ jág₁ a₂i₂'ag₅₄
 tě₃jniá₅, ia₁jaun₂ dsioğ'₂ dsí₅ jniog₄ jmig₄ ně₃, ia₁
 ma₂ja₂quián₃ bá₄ le₃'ŋia₅ jmig₄ a₂le₂ti₃ a₂lě₅ dsí₅ Diú₄

* **10:7** Éxodo 32:6.

jmo₃ ja₁con₂ jniog₄. 12 Le₂në₅ bá₄, chi₂jua'₂ 'ein₂
lín₂ chéin'₅ tiá'₂ a₂'éin₂, ju₁jmo₁₂ 'í₁ ia₁jaun₂ tsá₃
tiáin'₃. 13 Tsá₃ 'e₂ táu₂ ma₂i₂ñí'₂ 'nia'₂, jñia'₅₄ lia'₂
a₂qui₂dsi₂ñí'₂ dsa₂ mi₂güí₃. La₁ i₂rë₂ti'₅₄ bá₄ Diú₄,
tsá₃ cuë₃ jmig₄ jua'₅₄ ñí₄ a₂qui₂dsi₁juin₅₄ 'a₂ con'₂
jñia'₅₄ tiang'₃. Të₂le₃ 'ñiog₅ bá₄ Diú₄ jmo₃ caun₂ ju₁
'a₂ lia'₂ lé₂ jmó'₂ a₂tiang'₃, ju₁'e₂ guë₃ caun₂ táu₂ já₅.

14 Jaun₂ juí₂ jniá'₂ 'nia'₂ rín'₅₄ jniog₄, quiá'₂ 'nia'₂
cau₅ ja₁jme₂juin'₂ dsa₂ diú₄ lag₄. 15 Juí₂ jniá'₂
'nia'₂ dsa₂ i₂ñí'₂ dsí₅: quion₂ de'₂ 'nia'₂ caun₂ 'í₁
a₂juá'₅. 16 Ju₁lia'₂ jme₁quian'₅₄ jniog₄ rín'₅₄, 'ne'₂
jniog₄ a₂'a₄ copa jñió₅, cuë₂ ti₁'mag'₄ Diú₄: ¿on₁jua'₅₄
a₂quein'₄ jniog₄ jmí₄ Cristo? Le₂jaun₂ bá₄ ján₃
ju₁lia'₂ jme₁quian'₅₄ jniog₄ rín'₅₄ jmo₂ dsió₁ i₁ñí'₄:
¿on₁jua'₅₄ a₂quein'₄ jniog₄ ni₁ñí₁ Cristo? 17 Ju₁lia'₂
caun₂ bá₄ i₁ñí'₄ lë₅, ján₃ bá₄ le₂jaun₂ jniog₄ në₃,
o₁jñia'₅₄ la₂ juag₅ jniog₄ lë₂, la₁ caun₂ bá₄ ni₁ñí₅ lág₅
jniog₄, ia₁ caun₂ i₁ñí'₄ bá₄ que₂ jniog₄.

18 Quion₂ de'₂ 'nia'₂ 'í₁ 'a₂ lia'₂ lë₅ juí₂ Is-
rael: ¿Tsa₁ lín'₂ 'nia'₂, jñia'₅₄ dsa₂ i₂guë'₅ má₃ ñí₄
já'₂ a₂qui₂rë₂jen'₅₄ ne₄chei₂, le₂jaun₂ bá₄ quein'₅₄
guioin₅₄ ne₄chei₂ jaun₂? 19 Tsá₃ juí₂ jniá'₂ 'nia'₂
jua'₅₄ a₂cha₂ bí₂ 'io₅ diú₄ lag₄, on₃ guë'₂ le₂jaun₂ ñí₅
a₂te₁'i₁ ne₅₄. 20 Të₂le₃ juá'₅ jniá'₂, jme₁jen'₅ dsa₂ 'e₂
qui₂jen'₅ ne₄ 'éi₂, qui₂jen'₅ dsa₂ a₂jaun₂ ne₄ je₂na'₅₄,
on₃jua'₅₄ rë'₂ ne₄ Diú₄ të₃dsón'₂. Jaun₂ tsá₃ 'nio₃ jniá'₂
jua'₅₄ quen'₅₄ 'nia'₂ quian'₅₄ je₂na'₅₄. 21 Tsá₃ lé₂ 'ag'₅₄
'nia'₂ copa quió'₅ Te₁gui'₅₄, chi₂jua'₂ ján₃ guë'₂ 'ag'₅₄
táng₃ copa quió'₅ je₂na'₅₄. On₃ guë'₂ lé₂ quen'₅₄ 'nia'₂
ne₄ mesa quió'₅ Te₁gui'₅₄, chi₂jua'₂ ján₃ guë'₂ quen'₅₄
táng₃ 'nia'₂ ne₄ mesa quió'₅ je₂na'₅₄.

22 ¿'E₂ lé₂ ně₃? ¿O₃ bá₄ lé₂ le₃jmó₁ jniog₄ ia₁jaun₂ le₃dsí'₅ Te₁gui'₅₄ o₄quián₂ jniog₄? ¿O₃ bá₄ 'uau'₂ guě₄ jniog₄ lia'₂ con'₂ guě₄ 'éi'₂?

A₂ con'₂ jnia'₅₄ cuě₂₃ jmig₄ ia₁ a₂lág₅ jniog₄ dsa₂ quián₅ Cristo

23 Dsón'₂ bá₄ dsau₅: “I₄ bá₄ 'éi'₃ le₃jmo₃ dsa₂ 'e₂ 'nio₃ jmo₃”, la₁ tsá₃ jua'₅₄ ca₂le₃jě₃ a₂jaun₂ jme₂'o₅₄; dsau₅ bá₄: “I₄ 'éi'₃ le₃jmo₃ dsa₂ ca₂le₃jě₃ 'e₂ 'nio₃ jmo₃”, la₁ia₁ tsá₃ jua'₅₄ ca₂le₃jě₃ a₂jaun₂ jmo₃ a₂dsi₃cón₃ dsa₂ tē₂le₃ quió'₅ jme₂dsi₂. 24 'Nió'₅ bá₄ 'no'₂ dsa₂ jui₅ jmo₃ a₂dse₃ le₃ja₁con₂ riin'₅₄, on₃jua'₅₄ rē'₂ jmá'₃ lia'₂ a₂dse₃ ja₁coin₂ 'ŋiog₅.

25 Qué'₂ bá₄ 'nia'₂ lia'₂ 'ei₅ ne₄ a₂dsi₂'nag₂ 'ma'₅₄, lē₃ jua'₅₄ tsá₃ 'e₂ cáun'₂ 'nia'₂ 'í₁ o₄quió'₄ a₂qui₂dsi₂jñi₅ 'au'₂ 'nia'₂. 26 Ia₁: “Gua'₅₄ 'uě₃, quian'₅₄ guě₄ ca₂le₃jě₃ 'e₂ niog₅ cha₂ ja₁jaun₂, a₂quió'₅ Te₁gui'₅₄ jē₂ bá₄ jaun₂.”†

27 Nē₁jua'₂ 'ein₂ dsa₂ i₂tsá₃ 'én₂ ca₂tē₃ 'nia'₂ a₂o₁qué'₂ ja₁quió'₄, nē₁jua'₂ 'niog'₂ 'nia'₂ o₁nóg'₅, jaun₂ qué'₂ bá₄ 'nia'₂ ca₂le₃jě₃ 'e₂ niog₅ dsia₃ dsa₂ ne'₅₄, lē₃ jua'₅₄ tsá₃ cáun'₂ 'í₁ o₄quió'₄ a₂qui₂dsi₂jñi₅ 'au'₂ 'nia'₂. 28 La₁ nē₁jua'₂ chan₂ guě'₂ 'ein₂ juá'₂: “Má₃ a₂quě'₂ 'nia'₂ ně₅ a₂ma₂jáu'₅ jme₁rē₂jen'₅₄ ne₄ diú₄ lag₄ bá₄ ně₅”, co₂dsia₅ tsá₃ ma₃quě'₂ 'nia'₂, o₄quió'₄ i₂juá'₂ le₂ně₅, ján₃ bá₄ o₄quió'₄ a₂qui₂dsi₂jñi₅ dsí₅ ně₃. ‡ 29 A₂qui₂dsi₂jñi₅ dsí₅ dsa₂ 'éi'₂ bá₄ guě'₂, on₃jua'₅₄ rē'₂ 'nia'₂.

La₁ chan₂ guě'₂ i₂le₃juá'₂ táng₃: “¿'E₂ 'uig'₅₄ qui₂con₂ dsa₂ 'í₁ tē₂le₃ jui₅ a₂tsá₃ jnág₅ quió₃, o₄quió'₄

† 10:26 Salmo 24:1. ‡ 10:28 A₂lin₅₄ chog₅₄ si₂ juá'₂ ján₃: “Ia₁ gua'₅₄ 'uě₃, quian'₅₄ guě₄ ca₂le₃jě₃ 'e₂ niog₅ cha₂ ja₁jaun₂, a₂quió'₅ Te₁gui'₅₄ jē₂ bá₄ jaun₂.”

'a₂ lia'₂ niog₅ ŋí'₂ dsí₅ i₂sián'₂?' 30 Chi₂jua'₂ cuě₅ jniá'₂ ti₁'mag'₄ o₄quió'₄ caun₂ má₃ a₂quen'₅₄ jniá'₂ jë₄ guë'₅ dsa₂, ç'e₂ 'uig'₅₄ chi₂'ag₅ dsa₂ o₄quió'₄ a₂guë'₂ jaun₂, chi₂jua'₂ cuě₅ ti₁'mag'₄ ně₃? 31 Jaun₂ lë₃, chi₂jua'₂ quë'₂, 'ag'₂, ján₃ guë'₂ le₂jaun₂ chi₂jua'₂ 'e₂ guë'₄ niog₅ jmo'₂ 'nia'₂, jmo₄ bá₄ a₂jaun₂, la₁ jua'₅₄ le₃juin'₂ bá₄ Diú₄ le₃jë₃ a₂jaun₂. 32 La₁ tsá₃ cuë'₂ 'nia'₂ jmig₄ jua'₅₄ ja₁lé₂ tsi₃sén'₂ dsa₂ judíos, on₃ guë'₂ dsa₂ griegos, on₃ guë'₂ dsa₂ i₂tén₅ le₃quió'₅ guá'₅ quián₅ Diú₄ ně₃. 33 Jniá'₂ 'ŋi₃ ně₃ quín'₅ bí₂ jmo₂₃ a₂të₅ dsí₅ ca₂le₃jín₃, tsá₃ jmo₅ jniá'₂ dsi₃ a₂'nau'₅ jniá'₂ a₂dse₃ le₃ja₁cong₂ 'ŋi₃. Jmo₅ bá₄ jniá'₂ a₂dse₃ le₃ja₁con₂ i₂sián'₂, ia₁jaun₂ lióin₂.

11

1 Quian₂ 'nia'₂ juí₅ a₂ca₂can₃ jniá'₂, juí₁lia'₂ jniá'₂ ně₃, quian₅₄ juí₅ a₂ca₂can₃ Cristo.

A₂ lia'₂ dsi₂ten₅₄ jmo₃ dsa₂ m'í₂ jme₁tioin'₅₄ culto

2 Rin'₅₄ jniog₄, a₂'ŋi₂ dsi₃ lín₃ cuě₅ jniá'₂ ti₁'mag'₄ 'nia'₂, 'uig'₅₄ ia₁ a₂dsau'₂ bá₄ 'au'₂ jniá'₂, ia₁ chan'₅₄ bá₄ 'nia'₂ tiá₂ jág₁ con'₂ lë₅ ma₂ca₂jme₁tin₅ jniá'₂ 'nia'₂. 3 La₁ 'nio₃ jniá'₂ a₂le₃ŋi'₅₄ 'nia': juí₁lia'₂ lín₅ Cristo mi₂dsi₄ le₂jan₂ le₂jan₂ dsa₂ ŋe'₂, ján₃ guë'₂ le₂jaun₂ lín₅ dsa₂ ŋe'₂ mi₂dsi₄ dsa₂ m'í₂; jaun₂ lín₅ Diú₄ mi₂dsi₄ Cristo. 4 Jua'₅₄ mei'₂ guë'₃ jan₂ dsa₂ ŋe'₂ jlë₂ dsi₅₄ jme₁chi₂lén'₂ Diú₄ jë₁le₁ŋi'₂ dsa₂, o₃ jme₁ŋág₅ jág₁ a₂cuë₅ Diú₄, chein'₂₃ o₂guí'₃ mi₂dsi₅₄ chi₂jua'₂ le₂jaun₂. 5 La₁ chi₂jua'₂ jan₂ guë'₂ dsa₂ m'í₂ tsá₃ chi₁jlë₅ dsi₅₄ jme₁chi₂lén'₂ Diú₄, o₃ jme₁ŋág₅ jág₁ a₂cuë₅ Diú₄, chein'₂₃ o₂guí'₃ mi₂dsi₅₄ chi₂jua'₂ le₂jaun₂ ján₃; co₂jaun₂ bá₄ dsióg₅ ně₂jag₄

bá₄ rē₂chei₄ ŋi₂ dsi₅₄. ⁶ Chi₂jua'₂ tsá₃ 'nio₃ ju₁lia'₂ jan₂ dsa₂ mí₂ jlě₂ dsi₅₄, co₂nei'₅₄ o₁chéi₄ ŋi₂ dsi₅₄. La₁ chi₂jua'₂ caun₂ o₂gui'₃ jaun₂, a₂chéi₃ jan₂ dsa₂ mí₂ ŋi₂ dsi₅₄, o₃ a₂téi'₅ 'e₂, ju₁jlě₅₄ bá₄ mi₂dsi₅₄. ⁷ Tsá₃ ca₂tín₂ dsa₂ ŋe'₂ jlě₂ dsi₅₄, ia₁ 'éi₂ bá₄ lín₅ co₂'nió'₄ nió'₄ quió'₅ Diú₄, i₂jme₂nia₅ a₂jlá'₁ quió'₅ Diú₄. La₁ia₁ dsa₂ mí₂ ně₃, lín₅ i₂jlán'₁ quián₅ dsa₂ ŋe'₂. ⁸ Le₂'uig₅₄ lia'₂ con'₂ jme₁ca₂jmó'₂ Diú₄ dsa₂ ŋe'₂, ma₁ on₃jua'₅₄ quió'₅ dsa₂ mí₂ ca₂can₃ 'uig₅₄. Dsa₂ mí₂ bá₄ 'éi₂ ca₂já₃ ca₂lín₃ quian'₅₄ ni₁ŋi₁ dsa₂ ŋe'₂. ⁹ O₄quió'₄ dsa₂ ŋe'₂ bá₄ ca₂jmó'₂ Diú₄ dsa₂ mí₂, jaun₂ on₃jua'₅₄ rē'₂ dsa₂ ŋe'₂ ca₂lín₃ o₄quió'₄ dsa₂ mí₂. ¹⁰ 'Uig₅₄ jaun₂ guē'₂ ně₃, o₄quió'₄ ángeles, ca₂tín₂ dsa₂ mí₂ cán₂ caun₂ léi₄ ne₄ mi₂dsi₅₄, a₂'ein₅₄ 'éi'₃. ¹¹ La₁ tē₂le₃ quió'₅ Te₁gui'₅₄ ně₃, tsá₃ lé₂le₃chan₂ dsa₂ ŋe'₂ jua'₅₄ mei'₂ guě₃ tsá₃ dsa₂ mí₂ chan₂. Le₂jaun₂ guē'₂ ján₃ tsá₃ lé₂le₃chan₂ dsa₂ mí₂ jua'₅₄ mei'₂ guě₃ tsá₃ dsa₂ ŋe'₂ chan₂ táng₃. ¹² Ia₁ ju₁lia'₂ ca₂já₃ dsa₂ mí₂ dsi₁con₂ dsa₂ ŋe'₂, ján₃ bá₄ le₂jaun₂ guē'₂ ně₃ rē₂chan₂ dsa₂ ŋe'₂ cáun₂ dsa₂ mí₂. La₁ ja₂lé₂ ca₂le₃jě₃ ja₁con₂ Diú₄.

¹³ Quion₂ 'nia'₂ 'í₁ jín'₄ 'nia'₂ guiong'₅₄: ¿Dsi₁ten₅₄ chi₃lén'₂ dsa₂ mí₂ Diú₄ jme₁le₁ŋi'₂ 'nia'₂ tē₃ tsá₃ chi₁jlě₅ mi₂dsi₅₄? ¹⁴ ¿Tsa₁ léi₄, tsa₁ jág'₂ 'nia'₂ 'a₂ lia'₂ lě₅ dsi₂ten₅₄ i₂nió₄ dsa₂, caun₂ o₂gui'₃ bá₄ jaun₂ quió'₅ ju₁lia'₂ jan₂ dsa₂ ŋe'₂, chi₂jua'₂ quian₅ ŋi₂ dsi₅₄ jang₄? ¹⁵ La₁ dsa₂ mí₂ guē'₂ ně₃, jlá'₁ bá₄ tē₂le₃ quió'₅ 'éi₂ chi₂jua'₂ quian₅ ŋi₂ dsi₅₄ jang₄. Ia₁ con'₂ jaun₂ ca₂ŋi₂ ŋi₂ dsi₅₄ jang₄ co₂'nió'₄ caun₂ 'mi'₂ 'ŋjá'₂. ¹⁶ Chi₂jua'₂ chan₂ guē'₂ i₂'nio₃ tsín₃ quió'₅ jág₁

në₅, jaun₂ juá'₅ jniá'₂, ca₂lia'₂ ñja'₅₄ jnia'₅₄ guio₅₄, on₃
guë'₂ i₁caun₂ guá'₅ quián₅ Diú₄, tsá₃ tag₄ siá'₂ chí'₅.

*Ca₂i₁juin₅₄ ñag₅₄ ca₂guë'₃ dsa₂ ja₁jmo'g'₅ Má₃ quió'₅
Te₁gui'₅₄*

¹⁷ La₁ ne₄ si₂ la₂, 'éi'₃ a₂në₃ guë'₄ jmo₅₄ jniá'₂,
tsá₃ lé₂ jua'₅₄ juá'₄ jniá'₂ a₂dse₃ tion'₅₄ 'nia'₂. Ia₁
jmo'₂ 'nia'₂ daín₅₄ jme₁ñig'₂, 'nió'₄ a₂jme₁jmo'₂ 'nia'₂
a₂dse₃. ¹⁸ Jë₁le₂'uig₅₄ juá'₅ jniá'₂, ma₂guion₅₄ jág₁
a₂jmo'₂ 'nia'₂ le₁dsong'₅₄, lia'₂ jme₁ñi'₂ 'nia'₂. Mei'₂
tsá₃ tí₅ bá₄ ca₂la₂ jág₁ në₅, líng₂. ¹⁹ Dsón'₂ bá₄
jaun₂, tion₅₄ niog₅ qui₃jmo₃ dsa₂ jma₃quén₅ la₂-në₅,
ia₁jaun₂ le₃jniá'₂ jin'₄ 'nia'₂ jui₁lia'₂ dsa₂ i₂ma₂guei₃
Diú₄. ²⁰ Jaun₂ lë₃, jme₁ñi'₂ 'nia'₂, tsá₃ ma₂lë₅ quió'₅
Te₁gui'₅₄, má₃ a₂quë'₂ 'nia'₂ jaun₂, ²¹ ia₁ jë₁ma₂ca₂të₂
hora a₂quë'₅₄ 'nia'₂, jmo₅ dsa₂ i₂lin₅₄ jma₃quén₅
dsi₂jniá'₄ qui₂guë'₅. Chan₂ i₂lin₅₄ tion'₅₄ i₁cón'₅;
të₁lia'₂ tion'₅₄ i₂sián'₂ le₁'ein₅. ²² ¿Tsa₁ dsi₂néi₂ quián'₂
'nia'₂ cha₂ ja₁lé₂ le₃qui₁quë'₅₄ qui₁'ag'₅₄ 'nia'₂ në₃?
¿O₃ bá₄ ma₂jin'₅₄ 'nia'₂ sion₅ guá'₅ quián₅ Diú₄, ján₃
guë'₂ cuë'₂ 'nia'₂ o₂guí'₃ dsa₂ i₂tsá₃ 'e₂ cha₂ quió'₅?
¿'E₂ bá₄ juig₅₄ jniá'₂ 'nia'₂? ¿A₁juá'₄ jniá'₂ dse₃ lia'₂
tion'₅₄ 'nia'₂ ia₁ a₂jmo'₂ le₂jaun₂? ¡Dsón'₂ bá₄ tsá₃
le₂jaun₂!

Má₃ quió'₅ Te₁gui'₅₄
(Mateo 26:26-29; Marcos 14:22-25; Lucas 22:14-
20)

²³ Ia₁ a₂ca₂ñi₂ bá₄ jniá'₂ a₂ca₂jme₃tag₅ 'ñiog₅
Te₁gui'₅₄ a₂ma₂ca₂jme₁tin₅ guë'₂ jniá'₂ 'nia'₂: lia'₂
con'₂ le₃ca₂nei₂ jmi₃g₄ jme₁ca₂jáng'₂ dsa₂, ca₂can₃
i₁ñí'₄. ²⁴ Jme₁ma₂dsan₃ cuë'₅ ti₁'mag'₄ Diú₄, jaun₂
guë'₄ ca₂'niai₃ ca₂dsió'₃ i₁ñí'₄, jaun₂ ca₂juá'₂: “Qué'₂
'nia'₂; a₂la₂ bá₄ ñi₃ a₂rë₂'na₄ o₄quián'₂ 'nia'₂. Jmo₄

'nia'₂ le₂la₂ a₂dsiog'₂ 'au'₂ jniá₂.” ²⁵ Ján₃ bá₄ le₂nē₅,
 jme₁ma₂ca₂lē₃ guē'₅ i₁ñí'₄, ca₂can₃ táng₃ copa, jaun₂
 ca₂juá'₂: “A₂'a₄ copa la₂, lē₅ jág₁ 'mí₂ a₂lí'₅₄ tē₂le₃
 quian'₅₄ jmi₃.* Lia'₂ co₂ráun₂ 'ag'₅₄ 'nia'₂, jmo₄
 'nia'₂ a₂dsau'₂ 'au'₂ jniá₂.” ²⁶ Jaun₂ le₂nē₅ bá₄, lia'₂
 co₂ráun₂ tón'₄ 'nia'₂ quē'₅₄ i₁ñí'₄, 'ag'₅₄ 'nia'₂ a₂'a₄
 copa, qui₂'ē'₅ 'nia'₂ 'mú₃ quió'₅ Te₁gui'₅₄ ca₂lia'₂
 ca₂tē₂ jmi₃g₄ i₁guain'₂ táng₃.

*A₂ lia'₂ dsi₂ten₅₄ tón'₃ dsa₂ jmóg'₂ guē'₃ Má₃ quió'₅
 Te₁gui'₅₄*

²⁷ Jaun₂ lē₃, chi₂jua'₂ 'ein₂ guē'₅ i₁ñí'₄, 'ín'₂ a₂'a₄
 copa jaun₂, on₃jua'₅₄ ia₁ a₂léi₄ dsan₂ dsí₅, a₂rē₂cán'₄
 bá₄ 'éi₂ le₃ja₁con₂ ñi₄ jmi₄ Te₁gui'₅₄. ²⁸ 'Uig₅₄ jaun₂
 nē₃, né'₃ a₂guē'₃ jan₂ dsa₂ i₁ñí'₄, né'₃ a₂'ín'₂ a₂'a₄ copa,
 ju₁quion₂ 'í₁ ja₁con₂ 'ñiog₅. ²⁹ Ia₁ nē₁ca₂guē'₃ ca₂'in'₃,
 tē₃ tsá₃ rē₂ñí'₂ dsí₅, tsá₃ rē₂cuí'₅ ñi₄ Te₁gui'₅₄, cuē'₅ uig₅
 'ñiog₅ bá₄ nē₁ca₂guē'₃ ca₂'in'₃ le₂jaun₂. ³⁰ Ne₄ 'uig₅₄
 jaun₂, ju₁n₅ 'nia'₂ i₂le₁dso'₅₄, i₂'uan₅₄ nē₃; i₂lin₅₄ guē'₂
 ma₂qui₂ca₂dsain₃. ³¹ La₁ nē₁jua'₂ ca₂quiong₅₄ jniog₄
 'í₁ dsi₅ guio₅₄, tsá₃ 'e₂ 'í₁ con₂ Te₁gui'₅₄ ja₁con₂ jniog₄.
³² Jme₁con₂ Te₁gui'₅₄ 'í₁ ja₁con₂ jniog₄, jme₂rē₃ ju₁
 quián₂ jniog₄, ia₁jaun₂ tsá₃ guéi₁ uig₅ co₂lē₅ quian'₅₄
 dsa₂ mi₂güig₃.

³³ Jaun₂ le₂nē₅ bá₄, 'nia'₂ rín'₅₄ jniog₄, ju₁lia'₂ juá'₅
 jniá₂ chi₂jua'₂ líg'₂ jme₁tón'₂ 'nia'₂ long'₂ quian'₅₄
 ríng'₂ a₂jmog'₅₄ 'nia'₂ Má₃ quió'₅ Te₁gui'₅₄, jñia₄ 'nia'₂
 ríng'₂ jang'₂ jang'₂ a₂quē'₅₄ co₂dsia₅. ³⁴ Chi₂jua'₂
 chan₂ jan₂ i₁cón'₅, ju₁guē'₄ co₂ñei'₅₄ ja₁quió'₄,
 ia₁jaun₂ tsá₃ 'ē₂ Diú₄ uig₅ ju₁lia'₂ jē₁ñig'₂ 'nia'₂.

* **11:25** 'Nio'₂ ja₁ton₅ Mateo 26:28; Éxodo 24:8; 1 Corintios 10:16.

Jui₁lia'₂ jág₁ a₂'nió'₅ le₃rë₂, në₅ bá₄ jme₁rë₂ jniá₂
jë₁ma₂të₂ rë₁dsióg₄.

12

*Jui₁lia'₂ ta₁ a₂tin₂ dsa₂ a₂cuë₅ Jme₂dsí₂ Jñiós₅ cuë'₅
le₂jan₂ le₂jan₂ dsa₂*

¹ Në₃ në₃, rin'₅₄ jniog₄, jui₁lia'₂ të₂le₃ a₂gu₂dsí₂, tsá₃
'nió₃ jniá₂ jua'₅₄ tsá₃ le₃ñi'₅₄ 'nia'₂.

² Ma₂ñi'₅₄ bá₄ 'nia'₂, rin'₅₄ jniog₄, lia'₂ con'₂ tsá₃
dsa₂ 'én₂ jme₁ma₂lín'₅ 'nia'₂, jme₁të₁i₂nió'₄ 'nia'₂
chi₁co'₅₄ quió'₅ dsa₂ lag₄, on₃ i₂lé₂ le₃juá'₂ jág₁.

³ Jaun₂ në₃, juig₅₄ jniá₂ 'nia'₂, 'i₁jan₂ dsa₂ i₂dsia₅
jág₁ lia'₂ con'₂ jiog₅ Jme₂dsí₂ quián₅ Diú₄, tsá₃ juá'₂:
“¡Jui₁dsi₂'én₂ Jesús!” Ján₃ guë'₂ le₂jaun₂, 'i₁jan₂ tsá₃
lé₂ le₃juá'₂: “¡Jesús bá₄ i₂lín₅ Te₁gui'₅₄!” chi₂jua'₂ tsá₃
Jme₂dsí₂ Jñiós₅ jiog₅ guë'₂.

⁴ 'Lióng₂ bá₄ jui₅bí₂ cha₂ a₂lé₂ le₃ñe₂ dsa₂, la₁ia₁
jan₂ bá₄ Jme₂dsí₂ i₂cuë₅. ⁵ 'Lióng₂ ne₅₄ bá₄ ta₁ a₂cha₂
a₂lé₂ jme₃ti₃ dsa₂, la₁ia₁ jan₂ tan₅₄ bá₄ Te₁gui'₅₄
chan₂. ⁶ Cha₂ 'lióng₂ ne₅₄ bá₄ ta₁ a₂lé₂ le₃jmo₃ dsa₂;
jn₁ia'₅₄ lia'₂ jan₂ bá₄ Diú₄ i₂jmo₅ ca₂le₃jě₃ ta₁ jaun₂
ja₁con₂ ca₂le₃jín₃ dsa₂.

⁷ Në₃ në₃, a₂dse₃ quió'₅ ca₂le₃jín₃ bá₄ a₂jme₂jnia₅
Diú₄ jui₅bí₂ quió'₅ Jme₂dsí₂ ja₁con₂ le₂jan₂ le₂jan₂.

⁸ Të₂le₃ quian'₅₄ Jme₂dsí₂ bá₄ cuë₅ Diú₄ jui₅bí₂ cuë'₅
jui₁lia'₂ jan₂ dsa₂ a₂lé₂ le₃cuë₃ jág₁ a₂ñi'₂ dsí₅. I₂sián'₂
guë'₂ në₃, ñei₂ bí₂ a₂tin₂ 'a₂ lia'₂ le₃ñi₅ caun₂ jág₁,
të₂le₃ quian'₅₄ jan₂ Jme₂dsí₂ 'éi₂ bá₄. ⁹ Jui₁lia'₂ i₂sián'₂
guë'₂ në₃, rë₂'éin₂ 'ñio₅ lín₃, a₂jmo₅ 'ñiog₅ Jme₂dsí₂ 'éi₂
bá₄ ján₃. I₂sián'₂ guë'₂ qui'₅₄ jmig₄ a₂lé₂ le₃jme₃'lióin₂
jui₁lia'₂ dsa₂ dso'₅₄ në₃, të₂le₃ quian'₅₄ jan₂ Jme₂dsí₂

'éi₂, ¹⁰ I₂lin₅₄ guë'₂ t_{in}₅ jui₅bí₂ a₂jmo₃ léi₄ juë'₂; i₂lin₅₄ guë'₂ i₂lé₂ le₃'ë₂ jág₁ a₂jme₂jnia₅ Diú₄ ne₅₄; i₂lin₅₄ guë'₂ ηei₂ bí₂ a₂tiin₂ con₂ 'í₁ a₂rë₂lí'₄ dsí₅ j_{in}₄ jme₂dsí₂; i₂lin₅₄ guë'₂ ηei₂ bí₂ a₂lé₂ le₃dsia₃ jág₁ jmei₅ síá'₂; i₂lin₅₄ guë'₂ i₂qu_i'₅₄ jmig₄ a₂juá'₂ 'e₂ jein₅ jág₁ jmei₅ jaun₂. ¹¹ Ca₂le₃jë₃ jui₅bí₂ nē₅, jan₂ Jme₂dsí₂ quián₅ Diú₄ bá₄ cuë₅ a₂t_{in}₂ dsa₂ le₂jain₂ le₂jain₂, lia'₂ con'₂ lë₅ 'ηio₂ dsí₅.

Ca₂le₃jág₃ bá₄ jniog₄ lág₅ co₂'nió'₄ caun₂ bá₄ ηí₅

¹² Ia₁, jui₁lia'₂ lë₅ caun₂ ni₁η₁ dsa₂, 'lióng₂ a₂chei₂ le₂caun₂ le₂caun₂ a₂tén₅ quió'₅, la₁ caun₂ bá₄ ni₁η₁₂ lë₅; ján₃ bá₄ le₂jaun₂ lë₅ le₃quió'₅ Cristo. ¹³ Ia₁ ca₂le₃jág₃ bá₄ jniog₄, lia'₂ con'₂ jme₁qui₂ca₂ηó₂* jmig₂, tē₂le₃ quian'₅₄ jan₂ Jme₂dsí₂ 'éi₂ bá₄ ca₂ηó₂ jniog₄ jmig₂, ca₂lag₃ co₂'nió'₄ caun₂ ni₁η₁₅. Tsá₃ a₂lë₅ jaun₂ jui₁la₂ a₂lág₅ jniog₄ dsa₂ judíos, o₃ dsa₂ griegos 'e₂; o₃ jui₁la₂ lág₅ jniog₄ jui₁lia'₂ i₂jme₂ti₃ ta₁ ne₄ juig₅₄, o₃ dsa₂ i₂tsá₃ 'ein₂ ne₄ jua'₅₄ jme₂ti₃; ca₂le₃jág₃ bá₄ jniog₄ qui₂ca₂ηag₂ jan₂ Jme₂dsí₂ 'éi₂ i₂quein'₄ jniog₄, i₂'ne'₅₄ nē₂jag₄ bá₄ jmig₂.

¹⁴ Ia₁ tsá₃ lé₂ le₃jmó₁ jniog₄ dsí₅, jui₁lia'₂ caun₂ ni₁η₁ dsa₂ mi₂güig₃, jua'₅₄ cha₂ ca₂ne₅₄ a₂tén₅ quió'₅; ia₁ 'lióng₂ bá₄ a₂cha₂ chei₂ a₂tén₅ quió'₅. ¹⁵ Ia₁ jua'₅₄ mei'₂ guë₃ mi₂tag₄ dsa₂ lé₂ le₃juá'₂: “Uig₅₄ ia₁ tsá₃ mi₂gu₂ líng₅, jaun₂ tsá₃ ca₂tíng₂ téng₃ ni₁η₁₅”, la₁ on₃jua'₅₄ jaun₂ tsá₃ téin₅ ni₁η₁₅. ¹⁶ O₃ jua'₅₄ mei'₂ guë₃ rē₂gua₄ dsa₂ lé₂ le₃juá'₂: “Ia₁ a₂tsá₃ líng₅ mi₂ne₄, jaun₂ tsá₃ téng₅ ni₁η₁₅”, la₁ on₃jua'₅₄ jaun₂ tsá₃ téin₅ ni₁η₁₅. ¹⁷ Jua'₅₄ mei'₂ guë₃ ta₁caun₂ ni₁η₁ dsa₂ ca₂lë₃

* **12:13** lit. “lia'₂ con'₂ jme₁i₂tiog₃ jmig₂.”

jmá'₃ mi₂ne₄ dsa₂, ĉ'a₂ bá₄ lia'₂ lé₂ jme₁né₁ jniog₄?
 O₃ jua'₅₄ mei'₂ guě₃ ta₁caun₂ ni₁ñi₁ dsa₂ ca₂lē₃ jmá'₃
 rē₂gua₄ dsa₂, ĉ'a₂ bá₄ lia'₂ lé₂ jme₁jén'₂ jniog₄? 18 La₁
 'ñiog₅ bá₄ Diú₄ ně₃, lia'₂ con'₂ lě₅ 'ñio₂ dsí₅, jma₃quén₅
 qui₂ca₂jmo₃ ca₂tióng₃ lia'₂ ca₂ne₅₄ a₂cha₂ chei₂ quió'₅
 dsa₂ con'₂ ja₁ca₂tín₂ ni₁ñi₁ dsa₂. 19 Jua'₅₄ mei'₂ guě₃
 ca₂ne₅₄ lě₅ quió'₅ dsa₂, ĉ'a₂ lia'₂ lé₂ le₃juá'₂ dsa₂ caun₂
 ni₁ñi₁₂? 20 La₁ lě₅ ně₃, juí₁'a₂ guě₃ la₂ lě₂ 'lióng₂
 jma₃quén₅ a₂chei₂ quió'₅ dsa₂, caun₂ bá₄ ni₁ñi₁₂ lě₅.

21 Tsá₃ lé₂ le₃juá'₂ jme₁ne₁ dsa₂ tsí'₃ mi₂gu₂: “Tsá₃
 'ne₂ 'nió'₅ quió₃.” Ján₃ bá₄ le₂ně₅, tsá₃ lé₂ le₃juá'₂
 mi₂dsi₅₄ tsí'₃ mi₂tag₅₄: “Tsá₃ 'nia'₂ 'nió'₅ quió₃.”

22 Tě₂le₃ 'ñio₅ guě₄ dsen₅₄ juí₁lia'₂ ja₁lín₂ dsa₂ a₂'uan₅₄
 quió'₅. 23 Juí₁lia'₂ a₂tén₅ quián₂ jniog₄ ja₁tsá₃ lín₄
 quen₅, lág₂ jniog₄, a₂jaun₂ bá₄ guě'₂ 'ñio₅ guě₄ dse₃
 lio₂ jniog₄. Le₂jaun₂ bá₄ ján₃, juí₁lia'₂ ja₁tsá₃ lín₄
 dsi₂ten₅₄ rē₂jniá₂ quián₂ jniog₄, ja₁le₂jaun₂ bá₄ guě'₂
 jmo₂ jniog₄ 'í₁, 24 la₁ ja₁dsi₂ten₅₄ rē₂jniá₂ guě'₂ ně₃,
 tsá₃ lín₄ 'nió'₅ lě₅ 'í₁. Le₂jaun₂ bá₄ ca₂jme₃'ña₅ Diú₄

ni₁ñi₁₅, a₂ca₂jme₃dsen₅₄ juí₁lia'₂ ja₁tsá₃ lín₄ dsen₅₄
 25 ia₁jaun₂ tsá₃ lé₂ le₁dso'₅₄ ni₁ñi₁₅, tě₂le₃ juí₁dsian₂
 bá₄ dsí₅ o₄quió'₄ r'in'₅₄ le₂jain₂ le₂jain₂. 26 Chi₂jua'₂
 cha₂ ja₁qui'₂ uig₅ quió'₅ dsa₂, ca₂le₃jě₃ guě₄ ja₁siá'₂
 quió'₅ dsa₂ chain₂ uig₅ ján₃; chi₂jua'₂ cha₂ juí₁lia'₂
 ja₁rē₂dsen₅₄ quió'₅ dsa₂, le₂ně₅ bá₄ ján₃ lě₂ 'io'₂
 ca₂le₂con₂ quió'₅ dsa₂.

27 Le₂ně₅ bá₄ juí₁lia'₂ 'nia'₂ ně₃: guion'₅₄ bá₄ 'nia'₂
 caun₂ bá₄ ja₁ténḡ'₄ ñi₄ Cristo; le₂jan'₂ le₂jan'₂ 'nia'₂,
 líng'₅ lia'₂ caun₂ ja₁tén₄ quió'₅. 28 Le₂ně₅ bá₄ ján₃,
 jma₃quén₅ lě₅ bí₂ ma₂cuě₃ Diú₄ ma₂cuě'₃ le₂jan₂
 le₂jan₂ dsa₂ i₂tén₅ guá'₅ quiáin₅. Jě₁le₂'uig₅₄ ca₂'in₃

dsa₂ i₂chen₄ quiáin₅; jë₁ca₂të₂ tin₃, ca₂'iin₃ dsa₂ i₂'ë₂
 jág₁ quiáin₅; jë₁ca₂të₂ 'nag'₂, dsa₂ i₂jme₂tag₅ lín₅
 të₅; ñó₅ jaun₂, dsa₂ i₂'io₅ bí₂ jmo₃ léi₄ juë'₂; dsa₂
 i₂qui'₅₄ jmig₄ jme₃'lióin₂ dsa₂ dso'₅₄; dsa₂ i₂jme₂'o₅₄
 jme₂'oin₅₄ riin'₅₄; ñó₅ jaun₂, jui₁lia'₂ dsa₂ i₂cán₂ ne₄
 jui₅; dsa₂ i₂dsia₅ 'lióng₂ ne₅₄ jág₁ jmei₅. ²⁹ Jaun₂ në₃,
 ¿O₃ bá₄ ca₂le₃jín₃ lín₅ dsa₂ i₂chen₄ quián₅ Te₁gui'₅₄?
 ¿O₃ bá₄ ca₂le₃jín₃ 'ë₂ jág₁ a₂ñi₂ cuë₅ Diú₄? ¿Lín'₂
 'nia'₂ ca₂le₃jín₃ lín₅ të₅ i₂jme₂tag₅? ¿O₃ bá₄ ca₂le₃jín₃
 tin₂ jmo₃ léi₄ juë'₂? ³⁰ ¿Lé₂ le₃jme₃'lió₂ ca₂le₃jín₃
 jme₃'lióin₂ dsa₂ dso'₅₄? ¿O₃ bá₄ qui'₅₄ jmig₄ ca₂le₃jín₃
 dsia₃ jág₁ jmei₅ siá'₂? ¿Ján₃ bá₄ lé₂ le₃juá'₂ ca₂le₃jín₃
 'e₂ jein₅ jág₁ jmei₅ jaun₂? Ma₁ tsá₃ le₂jaun₂. ³¹ Jmo₄
 'nia'₂ 'ín₅ 'au'₂ jui₅bí₂ a₂dsen₅₄ guë₄.

La₁ a₂në₃ guë₄ 'ë₄ jniá₂ 'nia'₂ caun₂ jui₅ a₂dse₃ guë₄
 lín₃.

13

Jui₁lia'₂ a₂jme₂'nio₃ dsa₂ riin'₅₄

¹ Jui₁'a₂ guë₃ la₂ ting₂ dsia₅₄ quian'₅₄ jág₁ jmei₅
 quió'₅ dsa₂ mi₂güig₃ ríng'₃, o₃ jág₁ jmei₅ quió'₅
 ángeles në₃, la₁ në₁jua'₂ tsá₃ jme₂'nióg₄ guë'₂ ríng'₃
 në₃, tsá₃ 'e₂ ta₁ jmo₃ a₂jmo₅ jniá₂ a₂dseng₃. Líng₅
 në₂jag₄ bá₄ caun₂ ñí₁ të₂bong₅ a₂lë₁i₂ ein₅₄, o₃
 co₂'nió'₄ caun₂ ni₁ñí₁ tó'₅ mi'₅₄ bá₄. ² Jui₁la₂ qui'₅₄
 jniá₂ jmig₄ a₂'ë₄ jág₁ a₂jme₂jnia₅ Diú₄, jui₁la₂ guion₄
 jniá₂ jág₁ ca'₅₄ a₂jme₁rë₂'ma₄ le₂jniá₅, ján₃ bá₄ jui₁la₂
 ñí'₂ dsi₃ jniá₂ ca₂le₃jë₃, jui₁la₂ 'éng₂ 'ñio₅ lín₃, ca₂lia'₂
 qui'₅₄ jniá₂ jmig₄ le₃jñiog'₅₄ ni₁má'₂ në₃, la₁ në₁jua'₂
 tsá₃ jme₂'nióg₄ guë'₂ dsa₂ mi₂güig₃ ríng'₃ në₃, tsá₃

'e₂ ta₁ jmo₃ co₂ñí₂ quió₃ a₂jmo₂₃ a₂ting₂. ³ Jui₁la₂ qui₂ca₂dsio'₄ jniá'₂ 'e₂ a₂cha₂ quió'₃, quió'₅ dsa₂ ti₂ñé₂, o₁jñia'₅₄ la₂ ca₂cuíng₃ ni₁ñi₃ 'ñi₃ a₂dsi'₂, tsá₃ 'e₂ ta₁ 'i₄ co₂ñí₂ a₂jaun₂, në₁jua'₂ tsá₃ jme₂'nióg₄ guë'₂ dsa₂ mi₂güig₃ ríng'₃.

⁴ Jui₁lia'₂ dsa₂ i₂të₃dsón'₂ jme₂'nio₃ rin'₅₄, juin'₂ dsí₅ líin₅; ton'₂ 'ua₁ dsí₅ në₃; tsá₃ uig₅ dsí₅ quiaín'₅₄ 'i₁jan₂, on₃ guë'₂ jmo₂₃ táin'₅ ja₁con₂ rin'₅₄; on₃ guë'₂ jmo₂₃ róin₂ në₃. ⁵ Tsá₃ jmo₂₃ a₂tsá₃ dsi₂ten₅₄ jmo₃ ja₁con₂ riin'₅₄; tsá₃ 'no'₂ jmá'₃ lia'₂ con'₂ a₂dse₃ quió'₅ 'ñiog₅; tsá₃ con'₂ lë₁rë₂'nei₂, on₃ guë'₂ jmo₂₃ 'i₄ 'nei₂ dsí₅ në₃.

⁶ Jui₁lia'₂ dsa₂ i₂jme₂'nio₃ rin'₅₄, tsá₃ jmo₂₃ të₅ dsí₅ 'e₂ caun₂ 'lig'₅₄ ca₂jmo₃ i₂sián'₂, të₂le₃ jmo₂₃ 'io'₂ ja₁con₂ jág₁ tí₅. ⁷ Ca₂le₃jě₃ bá₄ jlě₂; ca₂le₃jě₃ bá₄ a₂'éin₂ ja₁con₂ riin'₅₄; ca₂le₃jě₃ bá₄ 'ín₂ dsí₅ a₂dsi₃ñí₂ riin'₅₄ caun₂ dse₃; ca₂le₃jě₃ bá₄ jmo₂₃ tió'₅ dsí₅, nau₂ tiá₂.

⁸ Tsá₃ líg'₂ jmig₄ dsian₅ a₂jme₂'nio₃ dsa₂ riin'₅₄. Dsón'₂ bá₄ já₅ jmig₄ jë₁tsá₃ ma₃'ein₂ 'ě₂ jág₁ a₂ñi₂ cuë₅ Diú₄, jë₁tsá₃ ma₃dsia₃ dsa₂ jág₁ jmei₅ siá'₂, jë₁dsi₃ñí₂ le₃jě₃ a₂ñi₅ dsa₂ niog₅ dsi₅₄. ⁹ Ia₁ tsá₃ rë₂'ñia₅ a₂ne₄ jniog₄, jaun₂ tsá₃ rë₂'ñia₅ jág₁ a₂jme₂jnia₅ Diú₄ a₂qui₂'ě₅ jniog₄. ¹⁰ La₁ jë₁ma₂të₂ jmig₄ a₂le₃'ñia₅ le₃jě₃, jaun₂ guë₄ dsi₃'én₂ bá₄ jui₁lia'₂ a₂tsá₃ rë₂'ñia₅ jaun₂.

¹¹ Lia'₂ con'₂ jme₁lín₄ jniá₂ jan₂ chi'₂ bë'₅₄, jme₁dsia₅ jniá₂ jág₁ lia'₂ dsia₅ jan₂ chi'₂ bë'₅₄, jme₁dsi₂jio₅ dsi₃ jniá₂, lia'₂ dsi₂jio₅ dsí₅ jan₂ chi'₂ bë'₅₄, ján₃ guë'₂ jme₁qui₂ñí'₂ dsi₃, lia'₂ ñí'₂ dsí₅ jan₂ chi'₂ bë'₅₄; la₁ jme₁ca₂lín₃ jniá₂ dsa₂ juin'₂, ca₂dsia₃ jniá₂ cau₅ jë₂ a₂ca₂tín₂ quió'₅ chi'₂. ¹² Le₂jaun₂ bá₄ lě₅

jui₁lia'₂ jmi_g₄ ně₃: ne₂ jniog₄ ně₂jag₄ bá₄ caun₂ ni₁'i₂
a₂jniá'₂ lian₂. La₁ já₅ bá₄ jmi_g₄ a₂ne₅₄ jniog₄ dsi₁ne₁
lia'₂ lě₅. Rě₂ně₃ ně₃, tsá₃ rě₂'ŋia₅ a₂cuig₅ jniá'₂; la₁ já₅
bá₄ jmi_g₄ ja₁le₃cuig₅ lia'₂ rě₂'ŋia₅, jui₁lia'₂ cuig₅ ŋiog₅
Diú₄ jniá'₂.

¹³ Jaun₂ ně₃, 'ni₅ a₂la₂ lě₂ a₂jio_g₅ guě₄ uě₂: a₂'én₂
dsa₂; a₂'ín₂ dsí₅ dsa₂; a₂jme₂'nio₃ dsa₂ r'in'₅₄. La₁ 'ŋio₅
lin₃ guě₄ dsen₅₄ a₂jaun₂ a₂jme₂'nio₃ dsa₂ r'in'₅₄.*

14

Jui₁lia'₂ a₂dsia₅ dsa₂ já_g₁ jmei₅ siá'₂

¹ Quen'₂ 'nia'₂ bí₂ a₂dsan₂ 'au'₂ jme₁'nió'₄ 'nia'₂
r'ing'₂, jaun₂ jmo₄ 'nia'₂ a₂'ín₅ 'au'₂ cuě₃ Diú₄ jui₅bí₂
a₂gu₂dsí₂, la₁ ja₂lin₃ guě₄ dsen₅₄ a₂lé₂ le₃'ě'₄ 'nia'₂ já_g₁
a₂jme₂jnia₅ Diú₄. ² Ia₁ jui₁lia'₂ dsa₂ i₂dsia₅ já_g₁ jmei₅
siá'₂, tsí'₅ Diú₄ bá₄, on₃jua'₅₄ dsa₂ mi₂güig₃, ia₁ tsá₃
ŋág'₂. Já_g₁ rě₂'ma₄ bá₄ dsia₂₃, tē₂le₃ quió'₅ Jme₂dsí₂.
³ La₁ jui₁lia'₂ dsa₂ i₂'ě'₂ já_g₁ tsí'₅ dsa₂ mi₂güig₃, dsia₂₃
já_g₁ a₂jme₃'o₅₄ a₂dsi₃cón₃ dsa₂ tē₂le₃ quió'₅ jme₂dsí₂,
cuě'₅ bí₂ r'in'₅₄, cuě₂₃ lián'₂ dsí₅ ně₃. ⁴ Jui₁lia'₂ dsa₂
i₂dsia₅ já_g₁ jmei₅ siá'₂ ně₃, ŋŋia'₅₄ jme₂oin₅₄ 'ŋiog₅
bá₄ a₂dsi₃cón₃, la₁ jui₁lia'₂ dsa₂ i₂'ě'₂ já_g₁ ně₃, jme₂'o₅₄
a₂qui₂dsi₃cón₃ guá'₅.

⁵ 'Nio₃ jniá'₂ jua'₅₄ ta₁j'in'₂ bá₄ 'nia'₂ ting'₅₄ a₂lé₂
le₃dsiá'₁ 'nia'₂ já_g₁ jmei₅ siá'₂. La₁ ja₂lin₃ guě₄ dsen₅₄
jua'₅₄ 'ě'₄ 'nia'₂ já_g₁ a₂cuě₅ Diú₄. Ia₁ jui₁lia'₂ dsa₂
i₂'ě'₂ já_g₁, dsen₅₄ guě₄ lia'₂ con'₂ guě₄ dsa₂ i₂dsia₅ já_g₁
jmei₅ siá'₂, ně₁jua'₂ tsá₃ juá'₂ 'e₂ jein₅ já_g₁, ia₁jaun₂
jme₃'o₅₄ a₂dsi₃cón₃ guá'₅. ⁶ Ně₃ ně₃, 'nia'₂ r'in'₅₄
jniog₄, jui₁la₂ ca₂dsió_g₃ jniá'₂ ja₁con'₂ 'nia'₂, a₂ŋŋia'₅₄

* **13:13** 'Nio'₂ ja₁ton₅ Colosenses 3:14.

con² i₁dsia₃ jniá₂ jág₁ jmei₅ siá'², ¿²e₂ bá₄ ta₁ tí₄ jág₁ jaun₂, ja₁con² 'nia'², nē₁jua'² tsá₃ i₂quian₅₄ caun₂ jág₁ a₂jme₂jnia₅ Diú₄, o₃ jág₁ a₂guion₅₄ jniá₂, o₃ a₂'é₄ jniá₂, o₃ a₂jme₂tág² 'e₂?

⁷ Jui₁lia'² ni₁ñí₁ a₂tsá₃ jme₂dsí₂ 'i₄, jui₁lia'² te₁fi₁, o₃ caun₂ tsí₁ton₅ *'e₂, ¿²a₂ bá₄ lia'² lé₂ le₃ñi₅ dsa₂ chi₂jua'² 'e₂ son₅₄ jéi₂ dsa₂, o₃ tsá₅ 'e₂, chi₂jua'² tsá₃ jma₃quén₅ i₂'ein₅₄, cuē₅ léi₄ 'a₂ lia'² dsó₅? ⁸ Le₂jaun₂ bá₄ ján₃ jui₁lia'² ne₄ 'nei₂. Nē₁jua'² tsá₃ ca₂né'² rē₂ i₂'ein₅₄ jéi₂ dsa₂ ñí₁ trompeta, ¿²'ein₂ bá₄ jmo₃ co₂ñia₅₄ quió'⁵ a₂quín'² ne₄ 'nei₂? ⁹ Le₂nē₅ bá₄ lē₅ jui₁lia'² quian'⁵⁴ 'nia'² táng₃. Nē₁jua'² tsá₃ ca₂ñág'² jág₁ a₂'uē₂ mi₂'o'⁵⁴ 'nia'², ¿²a₂ bá₄ lia'² lé₂ le₃ñi₅ dsa₂ 'e₂ juá'² 'nia'²? ¡A₂lē₁qui₂dsi₃dsí₂ dsi₃'én₂ jág₁ jaun₂ quiáng'²! ¹⁰ Mei'² tsá₃ 'lióng₂ bá₄ jág₁ jmei₅ cha₂ mi₂güí₃; la₁ tsá₃ cha₂ caun₂ jua'⁵⁴ tsá₃ jág₁ jein₅. ¹¹ Ia₁ jua'⁵⁴ mei'² gué₃ jan₂ dsa₂ tság₃ jniá₂ quian'⁵⁴ jág₁ jmei₅ quió'⁵ a₂tsá₃ ñíg'², co₂'nió'⁴ dsi₂nau₂ bá₄ 'éi₂ le₃ja₁con₂ jniá₂; le₂jaun₂ bá₄ jniá₂ táng₃, líng₅ co₂'nió'⁴ dsi₂nau₂ le₃ja₁con₂ 'éi₂. ¹² Le₂nē₅ bá₄ lē₅ jui₁lia'² quian'⁵⁴ 'nia'² táng₃. Ia₁ a₂ñí₄ lē₃ 'ín₅ 'au'² 'nia'² guéi'¹ a₂tíng'⁵⁴ jui₅bí₂ a₂gu₂dsí₂, quen'² 'nia'² bí₂ a₂dsi₃tsón'³ 'nia'² quian'⁵⁴ jui₅bí₂ a₂jme₂'o₅₄ a₂dsi₃cón₃ guá'⁵.

¹³ 'Uí₅₄ jaun₂, jui₁lia'² i₂dsia₅ jág₁ jmei₅ siá'², jui₁mi₁₂ ne₄ Diú₄ a₂lé₂ le₃juá'² 'e₂ jein₅ jág₁ jaun₂.

¹⁴ Jua'⁵⁴ mei'² gué₃ mi₅ jniá₂ ne₄ Diú₄ quian'⁵⁴ jág₁ jmei₅ siá'², jme₂dsí₂ quió₃ bá₄ chi₂lén'² Diú₄; la₁ a₂ñí'² dsi₃, tsá₃ 'e₂ ta₁ jmo₅. ¹⁵ ¿²A₂ bá₄ lia'² jmo₅₄ jniá₂ jaun₂ nē₃? Ca₂tíng₂ bá₄ chi₁leng'⁴ Diú₄ jui₅ jme₂dsí₂ quió₃, la₁ ján₃ bá₄ ca₂tíng₂ chi₁leng'⁴ Diú₄

* 14:7 griego: kithara.

a₂ŋí'₂ dsi₃ ně₃. Le₂ně₅ bá₄ ján₃, ca₂tíng₂ 'ë₅₄ tē₂le₃ juí₅ jme₂dsí₂ quió₃, la₁ ján₃ bá₄ ca₂tíng₂ 'ë₅₄ a₂ŋí'₂ dsi₃ ně₃. **16** Ia₁ chi₂jua'₂ jme₂juín'₂ 'ne₂ Diú₄ jmá'₃ tē₂le₃ juí₅ jme₂dsí₂ quiáng'₂, ħ'₂a₂ bá₄ lia'₂ lé₂, le₃quió'₅ juí₁lia'₂ jan₂ dsa₂ lē₁dsa₂ i₂'en₅₄, i₂tsá₃ ŋí'₂? ħ'₂A₂ lia'₂ lé₂ le₃juá'₂ a₂méi₃ jme₁cuē'₂ 'ne₂ ti₁'mag'₄, chi₂jua'₂ ján₃ guē'₂ tsá₃ ŋi₅ 'e₂ juá'₂ 'ne₂? **17** Dsón'₂ bá₄ jaun₂ jlá'₁ a₂cuē'₂ 'ne₂ ti₁'mag'₄, la₁ia₁ tsá₃ jme₂'o₅₄ a₂jaun₂ a₂dsi₃cón₃ i₂sián'₂. **18** Cuē'₅ jniá₂ ti₁'mag'₄ Diú₄ ia₁ a₂qui'₅₄ jniá₂ jmíg₄ le₃dsia₅₄ guē'₄ jág₁ jmei₅ siá'₂, lia'₂ con'₂ guē'₄ ca₂le₃jín'₃ 'nia'₂. **19** La₁ juí₁lia'₂ jme₁le₁ŋí'₂ dsa₂, ja₂lín₃ guē'₄ 'nio₃ juig₅₄ dsa₂ 'ŋiá₂ jon₄ jág₁ a₂ŋíg'₂, ia₁jaun₂ lé₂ jme₁tín₅ i₂sián'₂, lia'₂ con'₂ guē'₄ a₂jme₁juig₅₄ dsa₂ guia₃ mei₅ jág₁ a₂tsá₃ 'ein₂ ŋí'₂.

20 'Nia'₂ rín'₅₄ jniog₄, tsá₃ ma₃juí₁dsi₂jio₅ 'au'₂ 'nia'₂ juí₁lia'₂ dsi₂jio₅ dsí₅ i₂bē'₅₄. Jmo₄ bá₄ a₂líng'₅ i₂bē'₅₄ tē₂le₃ ja₁con₂ a₂'lig'₅₄. La₁ juí₁qui₂le₂ŋí'₂ 'au'₂ 'nia'₂ co₂'nió'₄ dsa₂ can'₅₄. **21** Juá'₂ bá₄ ne₄ Si₂:

Juig₅₄ jniá₂ dsa₂ juig₂ nación la₂
 tē₂le₃ quian'₅₄ dsa₂ i₂dsia₅ jág₁ jmei₅ siá'₂,
 le₃juí₅ mi₂'o₄ dsí₂nau₂ ně₃;
 la₁ on₃ bá₄ guē'₂ le₂jaun₂ jua'₅₄ a₂qui₃tón'₂ dsa₂ juí₅
 jág₁ quió₃,
 juá'₂ Te₁gui'₅₄.†

22 Jaun₂ le₂ně₅ bá₄ lē₅ a₂dsia₅ dsa₂ jág₁ jmei₅ siá'₂. Quian'₅₄ jág₁ jmei₅ jaun₂ jáng'₅ caun₂ léi₄ tē₂le₃ ja₁con₂ dsa₂ i₂tsá₃ 'én₂, on₃jua'₅₄ rē'₂ le₃quió'₅ dsa₂ i₂'én₂. La₁ juí₁lia'₂ jme₁'ě₂ dsa₂ jág₁ a₂jme₂jnia₅ Diú₄, jág₁ le₂jaun₂ ně₃ jáng'₅ táng₃ caun₂ léi₄ le₃ja₁con₂ dsa₂ 'én₂ bá₄, on₃jua'₅₄ le₃ja₁con₂ dsa₂ i₂tsá₃ 'én₂.

† **14:21** Isaías 28:11-12; Deuteronomio 28:49.

23 Jaun₂ le₂në₅ bá₄, jme₁le₁ñi'₂ guá'₅, jua'₅₄ mei'₂ gué₃ ca₂le₃jín₃ dsia₂₃ jág₁ jmei₅ siá'₂, në₁jua'₂ të₃jë₄ jaun₂ ca₂dsi₁lén₂ ju₁lia'₂ dsa₂ i₂tsá₃ lin₄ ñi₅, o₃ i₂tsá₃ 'én₂ në₃, ħtsa₁ lé₂ le₃juá'₂ 'éi₂: “Dsa₂ ñá₅ bá₄ në₅ tion'₅₄”, 'in₃ 'nia'₂? 24 La₁ në₁jua'₂ ca₂dsi₁óg₃ jan₂ dsa₂ i₂tsá₃ ma₂'én₂, o₃ i₂tsá₃ lin₄ ñi₅ 'e₂, të₁lia'₂ tion'₅₄ ca₂le₃jín₃ 'ë₂ jág₁ a₂ma₂cué₃ Diú₄, jaun₂ gué₄ le₃lí'₄ dsí₅ 'ñiog₅ 'a₂ lia'₂ chain₂ le₃jniá₂ dsáu₁, co₂'nió'₄ a₂con₂ 'í₁ jág₁ a₂nag₂₃ a₂'ë₂ dsa₂ tioen'₅₄. 25 Jaun₂ gué₄ le₃jniá₂ a₂rë₂'ma₄ jlë₅ a₂niog₅ dsí₅. Jaun₂ bá₄ chi₃jnë₃ jme₃juin'₂ Diú₄, ton'₂ juá'₂: “Të₃dsón'₂ bá₄ 'en₅₄ Diú₄ jin'₄ 'nia'₂”.

Jmo₄ bá₄ 'nia'₂ ca₂le₃jë₃ con'₂ dsi₂ten₅₄, dse₃ jniá₂

26 ħ'E₂ bá₄ jaun₂ në₃, rin'₅₄ jniog₄? Jë₁ma₂të₂ rë₁tón'₄ 'nia'₂ long'₂, le₂jan'₂ le₂jan'₂ 'nia'₂ quian'₅₄ caun₂ salmo, o₃ caun₂ jág₁ a₂jme₂tág'₂ 'nia'₂, o₃ caun₂ jág₁ a₂jme₂jnia₅ Diú₄, o₃ caun₂ jág₁ a₂juá'₂ quian'₅₄ jág₁ jmei₅ siá'₂, o₃ caun₂ jág₁ dsau₅ ju₁lia'₂ 'e₂ jein₅ jág₁ jaun₂; la₁ ju₁le₅₄ ca₂le₃jë₃ a₂në₅ o₄quió'₄ a₂dsi₃cón₃ dsa₂ të₂le₃ quió'₅ jme₂dsi₂. 27 Jë₁ma₂të₂ rë₁dsia₃ 'ein₂ dsia₃ jág₁ jmei₅ siá'₂, ju₁dsia₁₂ on₃, chi₂jua'₂ ñí₄ lë₃ ca₂jué'₃, ún₂ jniá'₄, të₃ qui₂jáin₃, jaun₂ 'nió'₅ le₃chan₂ jan₂ i₂juá'₂ 'e₂ jein₅ jág₁ jaun₂. 28 La₁ në₁jua'₂ tsá₃ 'ein₂ chan₂ i₂lé₂ le₃juá'₂ 'e₂ jein₅ jág₁ jaun₂, co₂dsia₅ ju₁jmo₁₂ tei₄ dsi₂héi₂ guá'₅, ju₁dsia₁₂ të₂dsí₅ 'ñiog₅, ju₁chi₂lén'₄ Diú₄.

29 Le₂në₅ bá₄ ján₃ ju₁lia'₂ i₂'ë₂ jág₁ a₂jme₂jnia₅ Diú₄: ju₁jua'₅₄ on₃-ún₂, la₁ ma₂tion'₅₄ i₂sián'₂ i₂con₂ 'í₁. 30 La₁ në₁jua'₂ ca₂jme₃jnia₅ Diú₄ caun₂ jág₁ ne₄ jan₂ i₂guá₅ jë₄ le₁ñi'₂ dsa₂ jaun₂, ju₁jmo₅₄ i₂le₂uig₅₄ 'éi₂ tei₄. 31 Ia₁ lé₂ le₃'ë'₄ ca₂le₃jín'₃ 'nia'₂ jág₁ të₃

qui₂jáng'₃, ia₁jaun₂ ca₂le₃jín₃ qui₁le₃tín₂, gue₃ lián'₂
dsí₅ ján₃. ³² Ca₂tín₂ dsa₂ i₂'ě₂ jág₁ a₂cuē₅ Diú₄ a₂qui'₅₄
jmig₄ jme₃'uáin₂ jme₂dsí₂ quió'₅. ³³ Ia₁ jmo₅ Diú₄
a₂'ei₅ tei₄, on₃jua'₅₄ rē'₂ a₂gó₂.

Jui₁lia'₂ lě₅ ca₂le₃jě₃ ja₁ñi'₂ dsa₂ rin'₅₄ jniog₄, †
³⁴ ca₂tín₂ bá₄ dsa₂ mí₂ jmo₃ tei₄ dsi₂néi₂ guá'₅. Tsá₃
'i₄ 'éi'₃ táun₂ jág₁, tē₂le₃ ca₂tín₂ nag₃ gau₂ bá₄, jui₁lia'₂
juá'₂ Si₂ 'Éi'₃. ³⁵ Chi₂jua'₂ 'e₂ 'nio₃ le₃ñi₅, ca₂tín₂ ñi'₃
dsi₂i₂gu₂ guioin₅₄, dsi₂néi₂ quió'₅. Ia₁ caun₂ o₂guí'₃
jaun₂, jua'₅₄ mei'₂ guě₃ dsa₂ mí₂ táun₂ jág₁ dsi₂néi₂
guá'₅.

³⁶ ¿O₃ bá₄ ca₂rē₃lióg₃ jág₁ quió'₅ Diú₄ ja₁con'₂ 'nia'₂?
¿O₃ bá₄ jmá'₃ lia'₂ ja₁con'₂ 'nia'₂ ca₂dsióg₃ jág₁ dse₃?

³⁷ Chi₂jua'₂ chan₂ jan₂ i₂lín₂ lín₅ jan₂ i₂'ě₂ jág₁ a₂cuē₅
Diú₄, O₃ i₂'io₅ a₂tín₂ caun₂ jui₅bí₂ a₂gu₂dsi₂, jui₁le₂ñi₅
bá₄ rē₂jiá₃ jág₁ a₂tó'₅ jniá₂ ne₄ si₂ la₂ a₂juíg₂ jniá₂
'nia'₂, co₂ně₅ lě₅ 'éi'₃ quió'₅ Te₁gui'₅₄ bá₄. ³⁸ Chi₂jua'₂
chan₂ guě'₂ i₂tsá₃ tón'₂ jui₅ jág₁ ně₅, tsá₃ ton'₅₄ 'nia'₂
jui₅ dsa₂ 'éi₂. §

³⁹ Le₂ně₅ bá₄ jaun₂ 'nia'₂ rin'₅₄ jniog₄, quen'₂ 'nia'₂
bí₂ a₂lé₂ le₃'ě'₄ 'nia'₂ jág₁ dse₃ a₂já₅ le₃ja₁con₂ Diú₄.
Tsá₃ jmo₂ 'nia'₂ jua'₅₄ a₂tsá₃ cuě'₁ 'nia'₂ jmig₄ a₂dsia₃
dsa₂ jág₁ jmei₅ siá'₂. ⁴⁰ La₁ia₁ jmo₄ 'nia'₂ ca₂le₃jě₃ lia'₂
con'₂ dsi₂ten₅₄, lia'₂ con'₂ lě₅ ca₂tín₂ jmo₃ le₂jain₂
le₂jain₂.

15

Jui₁lia'₂ a₂ca₂jen'₅₄ Cristo

† **14:33** lit. “dsa₂jñiós.” § **14:38** A₂lin₅₄ chog₅₄ si₂juá'₂: “Chi₂jua'₂
chan₂ guě'₂ i₂tsá₃ tón'₂ jui₅ jág₁ ně₅, tsá₃ lě₅ jui₁tioin'₅₄ jui₅ guě'₂ jaun₂.”

1 Nē₃ ně₃ rīn'₅₄ jniog₄, jmo₅ jniá'₂ a₂dsiog'₂ 'au'₂ 'nia'₂ 'a₂ lia'₂ lě₅ jág₁ dse₃ a₂ma₂ca₂ě'₃ jniá'₂ jīn'₄ 'nia'₂, a₂ma₂ca₂gue'₅₄ 'nia'₂, a₂tión'₂ 'nia'₂ tiá'₂.
 2 Těle₃ quian'₅₄ jág₁ dse₃ la₂ bá₄ a₂lión'₂ 'nia'₂, chi₂jua'₂ chan'₅₄ 'nia'₂ tiá'₂ jág₁ a₂ma₂ca₂ě'₃ jniá'₂ 'nia'₂. Chi₂jua'₂ tsá₃ le₂jaun₂ ně₃, tsá₃ ta₁ tí a₂ma₂ca₂rě'₃ én'₂ 'nia'₂.

3 Jěle₂'uig'₅₄ juá'₅, ca₂jáng'₃ jniá'₂ jág₁ a₂ma₂ca₂ŋi₂ jniá'₂: a₂ca₂jon₃ I₂rě'₂ín₁ quián₅ Diú₄ 'uig'₅₄ dsáu₁ jniog₄, lia'₂ con'₂ lě₅ juá'₂ ne₄ Si₂; ⁴ a₂ca₂ó'₂ dsa₂, a₂ca₂jein'₅₄ táng₃ ja₁ŋá'₄ 'ni₅ jmig₄, lia'₂ con'₂ lě₅ juá'₂ ne₄ Si₂ bá₄ ján₃; ⁵ a₂ca₂jme₃jniai₂₃ ne₄ Pe₄;^{*} jaun₂ guě₄ ca₂jme₃jniai₂₃ ne₄ chi'₂ dsi₂guia₃-tín₂. ⁶ Cang₂ jaun₂, ca₂jág₂ co₂nio₄ lě₅ guě₄ ca₂jau₅₄ mei₅ dsa₂ rin'₅₄ jniog₄; mei'₂ tsá₃ ca₂le₃jín₃ bá₄ dsa₂ i₂ca₂jág₂ 'éi₂ chain₂ bá₄ guě₄ jmig₄ ně₃, o₁ŋia'₅₄ la₂ ma₂dsan₃ i₂līn₅₄. ⁷ Cang₂ jaun₂, ca₂jme₃jniai₂₃ ne₄ Jacobo, ŋó₅ jaun₂ ca₂jme₃jniai₂₃ ne₄ ca₂le₃jín₃ dsa₂ i₂chen₄ quián₅.

⁸ Jěca₂tó'₂ guě₄ ně₃ ca₂jme₃jniai₂₃ ne₃ jniá'₂, o₁ŋia'₅₄ jme₁lín₄ jniá'₂ ně₂jag₄ bá₄ jan₂ i₂tsá₃ dse₃ ca₂rě₃chán₃. ⁹ Ia₁ lín₅ jniá'₂ i₂'uīn₃ guě₄ ju₁lia'₂ con'₂ guě₄ ca₂le₃jín₃ dsa₂ i₂chen₄ quián₅, ca₂lia'₂ jŋia'₅₄ tsá₃ ca₂tíng₂ a₂quiong₃ dsa₂ a₂lín₅ i₂chen₄ quián₅. Ia₁ qui₂ca₂co₃éng₃ dsa₂ 'én₂ le₂jŋiá'₅. ¹⁰ La₁ 'uig'₅₄ ia₁ a₂'ua₁ dsí₅ bá₄ Diú₄, lín₅ jniá'₂ 'e₂ lín₅; jaun₂ ju₁lia'₂ a₂ca₂dsia₃ Diú₄ dse₃ dsí₅ ja₁cong₂, tsá₃ lě₅ jua'₅₄ a₂tsá₃ ta₁ tí₄. La₁ 'ŋio₅ līn₃ guě₄ ma₂jmo₃ jniá'₂ ta₁ lia'₂ con'₂ guě₄ ca₂le₃jín₃ i₂chen₄ quián₅; ton'₂ on₃jua'₅₄ ca₂jmo₃ jniá'₂ 'ŋió₃, a₂ma₂ca₂jme₃quiong'₅₄

* 15:5 griego: Cefas.

a₂'ua₁ dsí₅ Diú₄ bá₄ ma₂guio₃. ¹¹ La₁ tsá₃ a₂lě₅ jaun₂ jua'₅₄ jniá₂, o₃ 'éi₂ 'e₂ ma₂jmo₃, la₁ caun₂ jág₁ la₂ bá₄ ma₂ja₂náu₅ jnia'₅₄ 'ě₅. Jág₁ ně₅ bá₄ a₂ma₂ca₂nei'₂ ca₂rě₃'én'₂ guě'₂ 'nia'₂.

Jui₁lia'₂ a₂já₅ caun₂ jmig₄ a₂jen'₅₄ 'lag₄

¹² La₁ chi₂jua'₂ ma₂qui₂rě₂'ě₂ jág₁ a₂ca₂jen'₅₄ bá₄ Cristo a₂jme₁rě₂'lín₅₄, ċ'a₂ bá₄ lia'₂ lě₅ a₂juá'₂ 'nia'₂ i₂lín₅₄ a₂tsá₃ jen'₅₄ 'lag₄? ¹³ Ně₃ ně₃, chi₂jua'₂ tsá₃ jen'₅₄ 'lag₄, jaun₂ ca₂lia'₂ jñia'₅₄ Cristo tsá₃ rě₂jen'₅₄ chi₂jua'₂ le₂jaun₂; ¹⁴ jaun₂ chi₂jua'₂ tsá₃ ca₂jen'₅₄ guě'₂ Cristo, le₃jua'₅₄ tsá₃ ma₃'e₂ ta₁ tí₄ jág₁ a₂'ě₅ jnia'₅₄, jaun₂ tsá₃ ta₁ tí₄ a₂'én'₂ 'nia'₂. ¹⁵ Chi₂jua'₂ le₂ně₅, jnia'₅₄ ně₃ ma₂ja₂náu₅ jag'₅₄ 'nia'₂ a₂lág₅ dsa₂ tě₂jín₁, tsá₃ tí₅ jág₁ quián₂ jnia'₅₄ a₂'ín₅ jnia'₅₄ Diú₄. Ia₁ ma₂ja₂náu₅ jnia'₅₄ 'ín₅ Diú₄, a₂ca₂jme₃jen'₅₄ Cristo i₂tsá₃ rě₂jen'₅₄ chi₂jua'₂ tsá₃ dsau₅ jág₁ ně₃ a₂jen'₅₄ 'lag₄. ¹⁶ Chi₂jua'₂ le₂jaun₂ tsá₃ jen'₅₄ 'lag₄, le₂jaun₂ guě'₂ ján₃, on₃ guě'₂ Cristo 'ñiog₅ ca₂jein'₅₄ ně₃; ¹⁷ ně₁tsá₃ guě'₂ ca₂jen'₅₄ 'éi₂, tsá₃ 'e₂ ta₁ jmo₃ a₂'én'₂ 'nia'₂ le₃quió'₅ ně₃, jaun₂ lia'₂ ma₂le₁cán'₄ jaun₂ bá₄ 'nia'₂ dsáu'₂ ně₃. ¹⁸ Ján₃ guě'₂ le₂jaun₂, jui₁lia'₂ dsa₂ i₂ma₂dsan₃ le₃quió'₅ Cristo, i₂rě₂'én₄ bá₄ 'éi₂, chi₂jua'₂ le₂jaun₂. ¹⁹ Jaun₂ jniog₄ ně₃, chi₂jua'₂ a₂jñia'₅₄ 'ín₂ dsi₅ jniog₄ le₃quió'₅ Cristo jui₁lia'₂ jmig₄ tě₁lia'₂ chong₂ la₂, 'e₂ guě₄ juíg₂ jniog₄ con'₂ guě₄ ca₂le₃jín₃ dsa₂.

²⁰ La₁ a₂tě₃dsón'₂ bá₄ dsau₅ a₂ca₂jen'₅₄ Cristo a₂jme₁rě₂'lín₅₄; lín₅ co₂'nió'₄ míg₂ le₂'uig₅₄ a₂'ag₅ a₂ro'₂ dsa₂, ia₁ lín₅ i₂le₂'uig₅₄ i₂ca₂jen'₅₄ jin₄ dsa₂ i₂ma₂dsan₃. ²¹ Le₂jaun₂ bá₄, jui₁lia'₂ 'uig₅₄ quió'₅ jan₂ dsa₂ ca₂'í₃ 'mú₃ mi₂güí₃, ján₃ bá₄ 'uig₅₄ quió'₅

jan₂ dsa₂ ca₂rë₃lió₃ a₂jen'₅₄ 'lag₄. 22 Ia₁ ju₁lia'₂ lë₅
a₂dsan₂ ca₂le₃jín₃ ia₁ a₂lín₅ tsi₁jon₂ Adán, já₃n bá₄
le₂në₅ le₃chan₂ ca₂le₃jín₃ ia₁ a₂lín₅ i₂quián₅ Cristo,
23 Ia₁ia₁ le₂jan₂ le₂jan₂ bá₄ 'a₂ lia'₂ lë₅ niog₅ tiin₃:
Cristo le₂'uig₅₄, co₂'nió'₄ jon₂ le₂ne₁ a₂ráu₃; jaun₂
guë₄ 'éi₂, dsa₂ quián₅ Cristo, jë₁ma₂të₂ rë₁guain'₂,
ja₃te₅₄ 'éi₂ të₂le₃ ja₁coin₂. 24 Jaun₂ guë₄ në₃, jiá₃
jmig₄ jë₁dsian₅ ca₂le₃jë₃, jë₁ma₂të₂ rë₁já₃ng'₃ ta₁
a₂lín₅ a₂goin₂, ne₄ Diú₄ Jmei₂, cang₂ jë₁ma₂ca₂'éin₂
ca₂le₃jë₃ 'éi'₃, ca₂le₃jín₃ dsi₂tan₅₄, ca₂le₃jë₃ jui₅bí₂.
25 Ia₁ tion₅₄ bá₄ ca₂tin₂ 'éi₂ goin₂, ca₂lia'₂ ca₂të₂
jmig₄ i₁guan'₃ Diú₄ o₄tag₁₂ ca₂le₃jín₃ i₂'iog₅₄. 26 Ia₁
i₂jë₁ca₂tó'₂ i₂'iog₅₄ i₂dsi₃'én₂, 'mú₃ bá₄ jaun₂. 27 Ia₁
Diú₄ bá₄ “ma₂ca₂guiog'₃ o₄tag₄ 'éi₂ ca₂le₃jë₃ jui₅bí₂.”†
Në₃ në₃, ju₁lia'₂ jme₁juá'₂ Si₂ a₂ca₂guiog'₃ ca₂le₃jë₃,
jaun₂ nág'₂ rë₂jiá₃, tsá₃ quen'₅₄ Diú₄ niog₅ jin₄ dsa₂
i₂le₁gan'₅₄ o₄tag₄ Cristo, ia₁ 'niog₅ bá₄ Diú₄ ca₂guiog'₃.
28 Jë₁ma₂ca₂dsió₃ jmig₄ jaun₂ a₂niog₅ ca₂le₃jë₃ o₄gú₃
Ja₁ni'₅₄, jaun₂ guë₄ në₃ 'niog₅ Ja₁ni'₅₄ jín'₂ tá₃ng₃ o₄gú₃
i₁ca₂guiog'₃ 'éi₂, ia₁jaun₂ lén₂ Diú₄ jui₅g₅₄ ca₂le₃jë₃, ne₄
ca₂le₃jë₃.

29 Në₃ në₃, në₁juá'₂ tsá₃ jen'₅₄ 'lag₄, ¿'e₂ guë'₂ jmo₃
ju₁lia'₂ dsa₂ i₂jñó₂ jmig₂ o₄quió'₄ 'éi₂? Chi₂juá'₂
dsón'₂ rë'₂ dsau₅ a₂tsá₃ jen'₅₄ 'lag₄, ¿'e₂ guë'₂ lë₃ jñó₂
dsa₂ jmig₂ o₄quió'₄? 30 Ju₁lia'₂ jnia'₅₄ në₃, ¿'e₂ bá₄ ta₁
jmo₃ i₁nió₄ jnia'₅₄ 'ei₅ gau₂ co₂tan₅₄? 31 Le₂o₃ jmig₄
bá₄ gue₅ jniá₂ 'mú₃. Dsón'₂ bá₄ jaun₂, rín'₅₄ jniog₄,
ju₁lia'₂ dsón'₂ bá₄ jmo₅ jniá₂ tá₃ng'₅ o₄quián'₂ 'nia'₂
i₂'én₂ le₃quió'₅ Cristo Jesús, Te₁gui'₅₄ quián₂ jniog₂.
32 Chi₂juá'₂ ca₂quín'₂ jniá₂ quian'₅₄ dsa₂ tsau₂ dsí₅

† 15:27 Salmo 8:6.

i₂chan₂ juig₂ Efeso, con'₂ dsi₂jiog₅ dsí₅ dsa₂ mi₂güig₃,
 ¿'e₂ a₂dsí₂ quió₃? Chi₂jua'₂ dsau₅ jaun₂ a₂tsá₃ jen'₅₄
 'lag₄,

juí₁que₅₄ juí₁'en'₅₄ jniog₄,
 ia₁ con'₂ tsá₃ ñó₅ ně₁jua'₂
 ca₂dsau₃ bá₄ juí₁la₂ 'ióg₃.†

³³ Jaun₂ juí₂ jniá₂ 'nia'₂, tsá₃ lē₁jme₁gan₅ 'nia'₂
 'au'₂. Tsá₃ i₂jmo₂ 'nia'₂ juí₁lia'₂ juá'₂ caun₂ jág₁
 a₂cha₂: “Juí₁lia'₂ dsa₂ i₂jme₂quian'₅₄ dsa₂ i₂con'₂
 lē₁lín₄, dsí₃'én₂ tag₄ a₂dse₃ a₂'io₂₃.” ³⁴ Jaun₂ juá'₅
 jniá₂, jme₁jnio₂ 'nia'₂ ne'₅₄, jen'₅₄ táng₃ 'nia'₂ juí₅
 co₂dsau₅, tsá₃ ma₃'nau₂ 'nia'₂ dso₄. Ia₁ i₂chan₂
 bá₄ i₂lín₅₄ 'nia'₂ i₂tsá₃ cuin₅ Diú₄. Juá'₅ jniá₂ le₂nē₅
 ia₁jaun₂ cán'₁ 'nia'₂ ca₂la₂ o₂guí'₃.

'A₂ lia'₂ lé₂ a₂jen'₅₄ táng₃ 'lag₄

³⁵ Chan₂ bá₄ i₂le₃ñag₃: “¿'A₂ bá₄ lia'₂ lē₅ jaun₂
 a₂jen'₅₄ 'lag₄? ¿'A₂ lia'₂ lín₅, 'a₂ lia'₂ lē₅ ni₁ñi₁₂
 jē₁ma₂ja₂lein₃?” ³⁶ ¡Caun₂ jág₁ co₄ bá₄ ně₅! Ia₁ juí₁lia'₂
 jme₁jne₅ dsa₂ 'e₂ jon₂ jne₂₃, tsá₃ 'ia₂ jua'₅₄ tsá₃ dsí₃'én₂
 jon₂ a₂dsi₂jnia₄. ³⁷ Ia₁ juí₁lia'₂ jme₁jan'₂ 'e₂ jan'₂,
 on₃jua'₅₄ a₂jan'₂ tag₄ a₂lé₂ cang₂. Le₂jaun₂ lē₅ juí₁lia'₂
 cui₂g₂, § juí₁'e₂ guē₃ jon₂ siá'₂ ján₃. ³⁸ Le₂jaun₂ bá₄
 jmo₅ Diú₄: cuē₂₃ cho'₅₄ lia'₂ con'₂ lē₅ 'ñio₂ dsí₅; lia'₂
 ca₂ne₅₄ mí₂g₂ 'io₂₃ cho'₅₄ con'₂ a₂ca₂lín₂. ³⁹ Le₂jaun₂
 bá₄ lē₅ quian'₅₄ juí₁lia'₂ ni₁ñí₅: tsá₃ le₃jē₃ lē₅ co₂rē₂.
 Jma₃quén₅ bá₄ lē₅ ni₁ñi₁ dsa₂ mi₂güig₃, quian'₅₄
 ni₁ñi₁ já'₂ náu₂, juí₁lia'₂ quió'₅ i₁tan₅; juí₁lia'₂ guē'₂
 quió'₅ i₁ju₁ ján₃. ⁴⁰ Le₂nē₅ bá₄ lē₅ juí₁lia'₂ a₂cha₂
 guei'₅₄ mi₂güig₃, quian'₅₄ a₂cha₂ ne₄ gua'₅₄ 'uē₃. Tsá₃

† 15:32 Isaías 22:13. § 15:37 lit. “trigo.”

co₂rē₂ jlá'₁ tág₅ a₂cha₂ guei'₅₄ quian'₅₄ a₂jlá'₁ a₂cha₂
ne₄ gua'₅₄ 'uē₃. ⁴¹ Le₂nē₅ bá₄ siá'₂ tág₅ quió'₅ 'iog₂,
quian'₅₄ tsi'₂, quian'₅₄ guē'₂ nei₅ táng₃. Ján'₃ bá₄ siá'₂
tág₅ nei₅ jē₄ rin'₅₄. *

⁴² Le₂nē₅ bá₄ guē'₂ niog₅ lé₂ quian'₅₄ dsa₂,
jē₁ma₂ca₂jein'₅₄. Dsi₃'o₃ caun₂ ni₁ñí₅ a₂niog₅ siá'₃;
jaun₂ jen'₅₄ táng₃ caun₂ a₂tsá₃ ton₅ jmig₄ siá'₃.

⁴³ Dsi₃'o₃ caun₂ ni₁ñí₅ co₂'nió'₄ a₂lě₅ o₂guí'₃; jaun₂
náu₃ caun₂ ni₁ñí₅ jlá'₁. Dsi₃'o₃ caun₂ ni₁ñí₅ 'uan₅₄; la₁
jen'₅₄ táng₃ caun₂ a₂bén₂. ⁴⁴ Dsi₃'o₃ caun₂ ni₁ñí₅ a₂lě₅
a₂ca₂tín₂ gua'₅₄ 'uē₃ la₂; jaun₂ guē'₄ jen'₅₄ táng₃ caun₂
ni₁ñí₅ a₂gu₂dsí₂.

⁴⁵ Jaun₂ bá₄ lě₃ chi₁ton₅ ne₄ Si₂: “Ca₂lín₃ Adán
le₂'uig₅₄ jan₂ dsa₂ i₂'i₄ jme₂dsí₂.”† La₁ i₂lín₅ Adán
i₂co₂'nió'₄ jē₁ca₂tó'₂ guē'₂ ně₃, ca₂lín₃ jan₂ jme₂dsí₂
i₂to'₂ jme₂dsí₂ jniog₄. ⁴⁶ La₁ on₃juá'₅₄ jme₂dsí₂
ca₂gua₃ de'₂ le₂'uig₅₄. A₂ca₂tín₂ gua'₅₄ 'uē₃ bá₄ ca₂lě₃
le₂'uig₅₄; cang₂ jaun₂ ca₂gua₃ a₂gu₂dsí₂. ⁴⁷ Dsa₂
i₂le₂ne₁ 'éi₂ jme₁lín₄ quian'₅₄ ti₁gua'₅₄ quió'₅ 'uē₃ la₂;
i₂jē₁ca₂tě₂ on₃ dsa₂ ně₃, i₂ca₂já₃ guei'₅₄ i₂juí₃ bá₄
'éi₂. ⁴⁸ Ca₂le₃jín₃ dsa₂ i₂chan₂ ne₄ gua'₅₄ 'uē₃, lín₅
ju₁lia'₂ jme₁lín₄ dsa₂ i₂ca₂lín₃ quian'₅₄ ti₁gua'₅₄ 'éi₂;
ján₃ bá₄ le₂jaun₂ lín₅ dsa₂ i₂tín₅ guei'₅₄ i₂juí₃, ju₁lia'₂
lín₅ i₂ca₂já₃ guei'₅₄ i₂juí₃. ⁴⁹ Ju₁lia'₂ quióng₂ jniog₄
quió'₅ dsa₂ i₂ca₂lín₃ quian'₅₄ ti₁gua'₅₄ 'éi₂, ján₃ bá₄
le₂nē₅ quiong₅₄† jniog₄ lia'₂ jniá₂ i₂ca₂sión₃ guei'₅₄
i₂juí₃.

* **15:41** Co₂'nió'₄ le₃juá'₅₄, cosa a₂tsá₃ 'i₄ jme₂dsí₂, a₂ca₂jmo₃ Diú₄.

'Nio'₂ ja₁ton₅ Salmo 8:3, Romanos 1:25. † **15:45** Génesis 2:7.

† **15:49** A₂lín₅₄ chog₅₄ si₂ guí'₅₄ juá'₂: “ju₁quiong₅₄ jniog₄.”

50 Juíg₂ jniá₂ 'nia'₂, rin'₅₄ jniog₄, tsá₃ ca₂tín₂ dsa₂
i₂quian₅ mu₅-ñí₅ ja₁gon₂ Diú₄; on₃ guë'₂ ca₂tín₂
juí₁lia'₂ a₂siá'₃, caun₂ ja₁tsá₃ ton₅ jmíg₄ siá'₃. 51 Nei₂
'nia'₂. La₂ 'ě₄ jniá₂ caun₂ jág₁ a₂jme₁rë₂'ma₄
le₂jniá₅: tsá₃ dsióg₃ ca₂le₃jág₃. La₁ ca₂le₃jág₃ bá₄
jniog₄ le₃tság₃, 52 con'₂ tiá₂, në₂jag₄ bá₄ a₂'méi'₂
dsa₂ co₂ráun₂ jme₁ne₁₂, jë₁ma₂i₁'ein₅₄ ñí₂ trompeta
jë₁ca₂tó'₂. Ia₁ dsi₃'ein₅₄ ñí₁ trompeta, jaun₂ guë'₄
jen'₅₄ ca₂le₃jín₃ dsa₂ i₂ma₂dsan₃, jaun₂ guë'₄ o₁líg'₂
jmíg₄ tsá₃ ma₃dsiáin₃. Jaun₂ jniog₄ ca₂le₃jág₃ në₃,
qui₂le₃tság₃. 53 Ia₁ ca₂tín₂ qui'₃ a₂siá'₃ quian'₅₄ caun₂
a₂tsá₃ siá'₃; a₂qui'₃ a₂jón₂ quian'₅₄ caun₂ a₂tsá₃ líg'₂
jmíg₄ jón₂. 54 Jë₁ma₂qui'₂ ni₁ñí₅ a₂siá'₃ la₂ quian'₅₄
a₂tsá₃ siá'₃, jë₁ma₂qui'₂ ni₁ñí₅ a₂jón₂ la₂ quian'₅₄
a₂tsá₃ líg'₂ jón₂, jaun₂ guë'₄ le₃ti₃ jág₁ la₂ a₂tio'₅₄ ne₄
Si₂:

Co₂dsia₅ ca₂lí'₃ co₂ñei'₅₄ Te₁gui'₅₄ ne₄ 'mú₃.§

55 ¿A₂já'₄ bá₄ ñó₅ a₂jme₁lén'₂ 'ne₂, 'mú₃?

¿'E₂ bá₄ ca₂lë₃, 'ne₂ 'mú₃,

quian'₅₄ uig₅ a₂jme₁'ág'₁ jnia'₅₄?*

56 Në₃ në₃, juí₁lia'₂ uig₅ a₂jme₁'ág'₁ 'mú₃ jniog₄, dsá_{u1}
bá₄ jniog₄ jaun₂; juí₁lia'₂ bí₂ a₂'io₅ dsá_{u1} jniog₄,
Si₂ 'Éi'₃ bá₄ jaun₂. 57 ¡La₁ ti₁'mag'₄ Diú₄ i₂cuë'₅
bí₂ a₂lág₂ jniog₄ të₂le₃ quian'₅₄ Te₁gui'₅₄ Jesucristo
quián₂ jniog₄!

58 Jaun₂ lë₃, 'nia'₂ rin'₅₄ jniog₄, i₂'nióg₃ guë'₄ lín₃,
nau₂ bá₄ 'nia'₂ tiá₂, tsá₃ cuín₅ 'nia'₂ jmíg₄ jua'₅₄
'ein₂ guë'₃ jnióg'₂ 'nia'₂ cau₅; juí₁dsi₂tsón'₃ bá₄ 'nia'₂

§ 15:54 Isaías 25:8. * 15:55 o₃, “¿'E₂ bá₄ ca₂lë₃, 'ne₂ 'mú₃, quian'₅₄
uig₅ a₂jme₁'ág'₁ jnia'₅₄? ¿A₂já'₄ bá₄ ñó₅ a₂jme₁lén'₂ 'ne₂, tau₂ 'ñio₅?”
Oseas 13:14.

quian'₅₄ ta₁ quió'₅ Te₁gui'₅₄. Ia₁ ma₂ñi'₅₄ bá₄ 'nia'₂ tsá₃ lě₅ jua'₅₄ a₂lě₁jmo'₂ can'₂ 'nia'₂ ta₁ le₃quió'₅ Te₁gui'₅₄.

16

Ca₂cág'₃ cu₄ a₂jme'₃oin'₅₄ r'in'₅₄

¹ Ně₃ ně₃, tē₂le₃ quió'₅ guē'₂ cu₄ a₂cag'₄ 'nia'₂ jme'₁ong'₁ r'in'₅₄ i₂'én₂, * le₂jaun₂ bá₄ jmo'₄ 'nia'₂ ján₃ con'₂ lě₅ jág₁ ma₂cuě₃ jniá'₂ guá'₅ i₂chan'₂ uē₃ Galacia. ² Le₂caun₂ do₂mei'₅₄, † ca₂tín'₂ bá₄ 'nia'₂ le₂jang'₂ le₂jang'₂ cáu'₁ ca₂la₂ 'a₂ con'₂ tí₅ ca₂ling'₃. A₂jaun₂ con'₂ quiog₂ 'ma₄ 'nia'₂, ma₂lě₅ co₂jñia'₅₄ ia₁jaun₂ tsá₃ lě₅ jua'₅₄ jaun₂ guē'₄ cag'₅₄ 'nia'₂ jē₁ma₂dsióg'₃ jniá'₂. ³ Jaun₂ bá₄, jē₁ma₂tě₂ rē₁dsióg'₄ jniá'₂, jaun₂ le₃chen₄ dsa₂ r'in'₅₄ i₂'ín'₄ 'nia'₂ guiong'₅₄, dsi₃lén₂ 'éi₂ juig₂ Jerusalén quian'₅ caun₂ si₂ a₂lě₂. Jaun₂ 'éi₂ bá₄ cán₂ cu₄ quián'₂ 'nia'₂ a₂cag'₅₄ ně₅ a₂jme'₁ong'₁ r'in'₅₄ ja₁jaun₂. ⁴ Nē₁jua'₂ dsi₂ten'₅₄ guē'₂ nei'₅₄ 'ñi₃ ně₃, jme'₃quiong'₅₄ 'éi₂.

Jmo'₅ Pa₄ co₂jñia'₅₄ a₂'l₂jui'₅

⁵ Jē₁ma₂tě₂ rē₁nei'₅₄ i₁ñig₁₂ le₂tan'₅₄ uē₃ Macedonia, jaun₂ guē'₄ dsióg'₄ ja₁con'₂ 'nia'₂. ⁶ Con'₂ tsá₃ ñó₅ ně₁ca₂jan₄ ca₂la₂ uē₂, o₃ ně₁ca₂lě₃ ñig₅ le₂tan'₅₄ jein₂ güig₂ quian'₅₄ 'nia'₂, ia₁jaun₂ lé₂ tsag'₅₄ 'nia'₂ juí₅ chi₂jua'₂ ja₁ca₂tín₂ jniá'₂ nei'₅₄. ⁷ Ia₁ tsá₃ 'nio₃ jniá'₂ nei'₅₄ tē₂ně₃, jua'₅₄ con'₂ ca₂ñig₅ bá₄ ja₁tion'₅₄ 'nia'₂. Jaun₂ 'ín₂ bá₄ dsi₃ jniá'₂ i₁jñia'₁₂ ca₂la₂ uē₂ quian'₅₄ 'nia'₂, ně₁jua'₂ ca₂cuě₃ Te₁gui'₅₄ jmig₄. ⁸ La₁ i₁jñia'₁₂ jniá'₂ juig₂ Efeso ca₂lia'₂ ca₂tě₂ Jmí₄ Tē₂lá₃-guiá'₂.

* 16:1 lit. “dsa₂jñi₃ós.” † 16:2 lit. “jmí₄le₂uig₅₄ quió'₅, semana.”

⁹ Ia₁ 'ηio₅ bá₄ cuin₅ jmig₄ rē₂na₄ jui₅ lé₂ le₃i₁jmo₃ ta₁ quió'₅ Te₁gui'₅₄, a₂léi₄ a₂tē₃dsi₅₄ dsón'₂; ton'₂ le₂jaun₂ bá₄ juin₅ dsa₂ i₂náu₃ 'io'₅₄ táng₃.

¹⁰ Nē₃ jua'₂ ca₂dsióg₃ Timoteo rin'₅₄ jniog₄, jag₄ 'nia'₂ jaun₂, jaun₂ tsá₃ lē₅ jua'₅₄ a₂gó'₅ 'ein'₅₄ jē₄ quián'₂ 'nia'₂, ia₁ ma₂já₅ 'éi₂jmo₂₃ ta₁ quió'₅ Te₁gui'₅₄, ju₁lia'₂ jniá₂ ján₃. ¹¹ Jaun₂ tsá₃ jmo'₂ 'nia'₂ 'au'₂ jua'₅₄ tsá₃ 'e₂ quein₅. Tē₂le₃ chéin'₂ 'nia'₂ jui₅ a₂'ag₃ tei₄ dsí₅, ia₁jaun₂ jiá₃ ja₃jag₅₄ jniá₂. Ia₁ chi₁jain₁₂ jniá₂ quian'₅₄ rin'₅₄ jniog₄.

¹² Nē₃ nē₃, ju₁lia'₂ Apolos rin'₅₄ jniog₄, jme₁chi₂quian'₅₄ jniá₂ jmig₄ a₂dsó₃ quian'₅₄ rin'₅₄ jniog₄ dsi₁jiin₁₂ 'nia'₂. Co₂dsia₅ tsá₃ ca₂lē₃ dsí₅ dsó₃ rē₂nē₃, la₁ nē₅ bá₄ dsióg₄ líg'₂ ca₂cuin₃ jmig₄ dsó₃.

Já₁ a₂'ág'₃ já₁ jē₁ca₂tó'₂

¹³ Jmo₄ 'í₁, nau₂ 'nia'₂ tiá₂ a₂'én'₂ 'nia'₂. Jmo₄ ma₂chang'₂ a₂lē₅ 'au'₂ ma₂ca₂cang'₅₄ ma₂ηi'₅₄, tión'₁ 'nia'₂ a₂'uang'₂. ¹⁴ Ca₂le₃jé₃ 'e₂ niog₅ jmo'₂ 'nia'₂ ja₁con₂ ríng'₂, jmo₄ léi₄ a₂'nióg'₃ tē₃dsón'₂ ríng'₂.

¹⁵ Nē₃ nē₃, ju₁lia'₂ ma₂ηi'₅₄ 'nia'₂, rin'₅₄ jniog₄: Estéfanos, quian'₅₄ dsa₂ dsi₂néi₂ quió'₅, ca₂liin₃ dsa₂ i₂le₂'uig₅₄ i₂ca₂rē₃'én₂ já₁ dse₃ 'uē₃ Acaya. Dsa₂ rin'₅₄ 'éi₂ nē₃ ma₂ja₂lén₂ ca₂ne₅₄ jme₁jme₂ti₃ ja₁con₂ rin'₅₄ jniog₄ dsa₂ 'én₂ ja₁jaun₂. Chi₂quian'₅₄ jniá₂ 'nia'₂ jmig₄ jaun₂ nē₃, ¹⁶ jme₁gan'₃ 'nia'₂ ju₁lia'₂ dsa₂ le₂'éi₂, quian'₅₄ guē₄ ca₂le₃jín₃ rin'₅₄ ju₁lia'₂ i₂jme₂'o₅₄ quian'₅₄ ta₁ le₂jaun₂. ¹⁷ 'Io'₂ jmo₅ jniá₂ nē₃, ia₁ ma₂guan₅ Estéfanos, Fortunato, quian'₅₄ Acaico; ma₂ca₂jme₃'ηiai₂₃ ju₁lia'₂ a₂jme₁'nió'₅ ja₁con₂ jniá₂ 'uig₅₄ ia₁ a₂tsá₃ 'nia'₂ chan'₂ ja₁lá₃. ¹⁸ 'Éi₂ bá₄ ma₂jmo₃ lián'₂ dsi₃ tē₂le₃ jui₅ jme₂dsí₂, le₂jaun₂ bá₄

ma₂qui₂ma₂jmo₃ lián'₂ 'au'₂ 'nia'₂ ján₃. Jaun₂ 'nió'₅
jme₁gan₃ jniog₄ dsa₂ le₂'éi₂.

19 Ca₂le₃jín₃ guá'₅ ja₁tén₄ le₂tan₅₄ 'uë₃ Asia, cui_{in}₂₃
Diú₄ 'nia'₂. Le₂jaun₂ bá₄ Aquila quian'₅₄ Priscila[†]
ně₃, quian'₅₄ co₂nió'₃ dsa₂ rin'₅₄ i₂ñi'₂ dsi₂néi₂ quió'₅
ně₃, cui_{in}₂₃ Diú₄ 'ñio₅ lin₃ 'nia'₂, le₃quió'₅ Te₁gui'₅₄.

20 Ca₂le₃jín₃ rin'₅₄ jniog₄ i₂tion'₅₄ ja₁lá₃, cui_{in}₂₃ Diú₄
'nia'₂. Qui₁cui_{in}₅₄ 'nia'₂ Diú₄ ríng'₂ le₂jang'₂ le₂jang'₂
a₂qui₁chén'₁ § jú'₅ ríng'₂, a₂lě₅ léi₄ a₂ma₂'ei₅ caun₂
jág₁ a₂le₁jě₃ 'au'₂ quian'₅₄ ríng'₂.

21 Jniá₂ Pa₄, cui_{ng}₅ Diú₄ 'nia'₂ ne₄ si₂ la₂, quian'₅₄
gu₃ 'nió₃.*

22 Chi₂jua'₂ chan₂ jan₂ tsá₃ 'nioi₃ Te₁gui'₅₄, co₂dsia₅
bá₄ jui₁ dsi₂'éin₂. iñiá'₅ 'ne₂, Te₁gui'₅₄!†

23 Jui₁jme₂gu'₅₄ bá₄ Te₁gui'₅₄ Jesucristo i₂'ua₁ dsí₅.

24 Ca₂le₃jín'₃ bá₄ 'nia'₂ 'nióg₃, le₃quió'₅ Te₁gui'₅₄
Cristo Jesús. A₂méi₃.†

Co₂ně₅.

† 16:19 griego: Prisca. § 16:20 Caun₂ tag₄ a₂jme₁chí'₄ lia'₂
con'₂ jme₁ca₂jmo₃ Pa₄ si₂ la₂. * 16:21 'Nio'₂ ja₁ton₅ Gálatas 6:11;

Colosenses 4:18; 2 Tesalonicenses 3:17; Filemón 19. † 16:22
griego: maranatha, jág₁ arameo a₂juá'₂ “Ñiá'₅ 'ne₂, Te₁gui'₅₄.”

† 16:24 A₂lin₅₄ chog₅₄ si₂ tsá₃ chi₁ton₅ “A₂méi₃.”

Jag₁ 'mí₂ a₂ma₂li'₅₄ quian'₅₄ Diu₄
New Testament in Chinantec, Tepetotutla
(MX:cnt:Chinantec, Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 30 Dec 2021

5c52af9e-3086-5d57-9b7e-2e495fea8899